

Istorgia culturala

Autor(en): **[s.n.]**

Objektyp: **Group**

Zeitschrift: **Annalas da la Societad Retorumantscha**

Band (Jahr): **95 (1982)**

PDF erstellt am: **12.07.2024**

Nutzungsbedingungen

Die ETH-Bibliothek ist Anbieterin der digitalisierten Zeitschriften. Sie besitzt keine Urheberrechte an den Inhalten der Zeitschriften. Die Rechte liegen in der Regel bei den Herausgebern.

Die auf der Plattform e-periodica veröffentlichten Dokumente stehen für nicht-kommerzielle Zwecke in Lehre und Forschung sowie für die private Nutzung frei zur Verfügung. Einzelne Dateien oder Ausdrucke aus diesem Angebot können zusammen mit diesen Nutzungsbedingungen und den korrekten Herkunftsbezeichnungen weitergegeben werden.

Das Veröffentlichen von Bildern in Print- und Online-Publikationen ist nur mit vorheriger Genehmigung der Rechteinhaber erlaubt. Die systematische Speicherung von Teilen des elektronischen Angebots auf anderen Servern bedarf ebenfalls des schriftlichen Einverständnisses der Rechteinhaber.

Haftungsausschluss

Alle Angaben erfolgen ohne Gewähr für Vollständigkeit oder Richtigkeit. Es wird keine Haftung übernommen für Schäden durch die Verwendung von Informationen aus diesem Online-Angebot oder durch das Fehlen von Informationen. Dies gilt auch für Inhalte Dritter, die über dieses Angebot zugänglich sind.

Istorgia culturala

Il temp da Güerg Jenatsch i'l spievel d'ün cudesch da protocols dal colloqui d'Engiadin'Ota dal 1618

da Gion Gaudenz

(segunda cuntinuaziun)

Scha'l lectur s'interessa cu më cha'l cudesch cun protocols latins dals ans 1618 – 1632 saja gnieu scuviert, schi chattess el alchüns sclarimaints losupra illa prüma publicaziun davart quist tema; quella as chatta illas Annalas dal 1980.

Cun nossa segunda «etappa», illas Annalas da l'an passo, essans nus rivos fin al protocol cun la data als 26 october 1620. Insembel cun quel dals 29 settember da listess an, sun que ils prüms documaints colloquiels zieva il terribel mordrarettsch da Vucligna chi avaiva piglio principi als 19 lügl dal 1620. A s'inclegia scha'd es discuors da «hoc tempore miserrimo» (*in quist mumaint schnuaivel*). Ils predichants, stos reunieus a Samedan, haun stüdgio che ch'els pudessan piglier a maun. A sun gnieu adaquella, cha in tuot il chantun ils colloquis as dessan raduner, cura ün, cura duos insembel, ch'els dessan tratter la situaziun ed alura stabilir che cha saja «*l'urgenza da nos servezzan*».

Il protocol da la tschanteda da Bever (als 26 october) manzuna üna radunanza a Filisur chi vain numneda per latin «congregatio». A tuotta via cha quella stu avair gieu las cumpetenzas d'üna sinoda, perche ella ho pudieu piglier decisiuns chi quintaivan pels colloquis.

Il pü remarchabel dal colloqui da Bever es sto da gnir a savair cha'ls capuriuns da la resistenza, «*magister Blasius Alexander e Güerg Jenatsch ans scravunan melamaing giò tar quels da Turich, cha'ns schnomnan Spagnöls e desertuors da la chosa da Cristus ed auncha cun oters tituls.*» Il colloqui ho decis da scriver üna charta da defaisa a «quels da Turich». A nun es da's der da buonder scha'd es darcho il predichant Andreja Albertin chi dess rediger la charta – s'inclegia per latin – el, chi tres sieu bun stil

dals protocols, demuossa d'esser sto prubabelmaing quel chi savaiva s'exprimer il pü facilmaing e bain.

Pigliand sü cò il fil dal cudesch dals protocols giosom la pagina 31, arrivains nus be dalum al «Exemplum litterarum»:

Copcha da la charta

Homens stimos e cuntschaintischems, Nus ruvains per vus per la grazcha (cò vain druvo il pled grec «eulogian») da nos Segner Gesu Crist.

Dals magisters Blasius Alexander e Güerg Jenatsch, üna geda noss frers e noss collegas, nun essans nus gnies offais e meltrattos be in nossa patria daspö lönch (variis iniuriis diu affecti lacerati sumus) – cun dan per la Baselia da nos Segner – mo eir a l'ester. Scu cha'ns es gnieu quinto, gnins nus achüsos greivamaing, gnins nus attachos (laedimur), a tüert gnins nus schnumnos Spagnöls, desertuors da la chosa da Cristus e cun oters surnoms chi soulan esser uschigliö ils cuntrasegns dals pü noschs erramaints.

Es que propi uschè cha quels homens nun haun auncha fuo avuonda cunter chöntschs serviaints da Dieu? (itane homines isti sinceris Dei servis impie exagitandis nondum sunt defessi?) Nun es que forsa il cas cha quels as daun taunta paina e fadia per achüser ils buns, be per s-chüser ad els stess, e da schmacler ils oters per as salver nets (ut se purgent)? S'inclegia cha quecò ans fo melavita, perche cun lur cuntegn (hac ratione) chaschuneschan els ad a nus, ad oters ed ad els stess grand dan e dischavantag (fraudi et danno sunt non exiguo). Ma nus ans allegrains dal fat cha nus nu'ns vains cuntgnies (eo quod non ita gesserimus) in möd per plaschair a la gliend. Nus interpretains (que cha quels dian da nus) scu indiz d'üna vita mneda tuot oter cu bain (non tenue bene actae vitae indicium interpretamur). Ma nus nu vulains render listess cun listess, a l'incuntrari, nus giävüschains a noss adversaris ün meglder spiert (mentem precamur meliorem) al lö dal tüert ch'els ans haun fat – scu ch'els as daun da cugnuoscher güst tres quel fat (ut ipso opere se declarant). Nus ruvains chodamaing, homens respettos, cha vus reservas l'otra uraglia per nus, cha vus nu prastas be dalum fè a las calumnias, cha nu dubiteschas da nossa buna fè ed integrited. Siand cha vus nu'ns avais auncha udieus, pretendains nus bain da bun cunggüst da nu gnir be udieus – nus vulessans impü cha vus füssas pü tard noss güdischs (arbitres) (e dschessas) scha, seguond vos sentenzcher, nus essans degns da lod u da blasem. Nus nu vains pisser cha quecò pudess forsa gnir spetto da nus püchöntsche cu dad oters (quid hoc amplius a nobis desiderari possit, non providemus). Per cha vus percunter ans possas tadler e

cugnuoscher las motivaziuns e radschuns da nos cuntegn (consilii nostri causas rationesque) cha nus as avains descrit, schi ruvains nus a vus ad ün ruver (etiam atque etiam) cha vus portas a la glüsch (aperiatis) las manzögnas ed ils misfats (errores et facinora) cha noss adversaris – oramai ch'els vöglian uschè – büttan our cunter nus cun laungias mel lavedas (labiis illotis), schi gnaros vus in cleras (significetis) in che chosa chi'ns schmuorvan «Spagnöls» ed in chenüna «desertuors da la chosa da Cristus». Nus nu pudains savair dal sgür cu mê (unde) ch'els ans confruntan cun tels (nos tales effingant). Perche els tscherchan lös zuppos, ans achüsan illas giassas (in angustis), inua cha la vusch d'ün defensur nu po gnir udida, scu chi ho fat eir Absalon (absolonico more). Tar vus vögliane sainza dubi scra-vuner, scha na a tuots schi a divers (apud vos, si non omnes, at certe aliquos procul dubio effundunt).

Nus as ruvains darcho per l'amur da Dieu (per viscera Domini nostri) cha vus indreschas che cha daresan sur da nus, per cha vus survegnas finelmaing nossa resposta. Scha vus fais quello, schi mettarons nus, scha Dieu voul, in glüsch cha nus vegnans numnos «Spagnöls», pervi cha nus avains vulieu fer frunt als Spagnöls, e «desertuors da la baselgia da Cristus», pervi cha nus essans stos pü cu disposts (paratissimi) a defender la chosa da Gesu Crist. Immez la charta steda scritta da la ven. Sinoda da Bravuogn (dal 1618) ed approveda da vus tres charta (vegna tuottüna dit) cha nu saja da fer il mel cun l'ideja cha vegna landrouer il böen. Ouravaunt tuot ruvains nus a sigr. Johann Rudolph Lavater ch'el nu'ns attacha pü lönch pervi da quista chosa (ne amplius indicta causa mordeat) e ch'el nu'ns offenda profuöndamaing cun sieus plets.

Vus homens davaira stimos, vus gnaregias ad artschaiver invidas e cun dulur tuot quecò e vus gnaros a refletter quel chi'd ho dad esser vos sench devoir (pietas) – cha quel nu s'ho d'impacher cun lagns ma cun urazchuns (non querelibus, sed precibus esse insumendam). Eir nus as scrivains cunter vögli. Pür chi'ns gnissan fattas quellas ingüstias chi pudessan (facilmaing) gnir sepulidas cun üna schmanchaunza eterna (que nu'ns fess ünguotta)! Ma pü invidas e cun pü grand led suppurtains nus, homens pre-dschos, frers e collegas ils meglers da tuots, eir avaunt ans scu magisters, ils pü meritavels in vers nus, cha aint in vus a pudess piglier pè (oriatur) quel nosch managiamaint davart nus (sinistra de nobis opinio), il quel es gnieu sduvlo sü tres «l'art» da quels melvugliaints. Cun quaunt dan cha tuot quecò es collio savais vus il pü bain, perfin scha vus taschais (tacentibus vobis). Chenün hom sapchaint surlascha gugent sieu bun nom a leivs melnets,

sainza as fer pissers u indifferentamaing (securus ac negligens)? Impü as mettains nus fich a cour (obsecramus): Admuni a quels homens cha gliوران finelmaing (tandem exuant) cun quista inumanited, per nu druver ün pled pü asper (ne durius loquamur). Pünavaunt giavüschains nus grandamaing cha vus cuntinuas a'ns amer (uti... nos amplecti pergatis) cun listessa favur da vossa bainvuglientscha, cha vus ans assistas uossa cha'd essans suot il tagliaint dal curtè (nobis in acie novaculae versantibus) cun urazchuns, cun agüd, cun cussagl. Perche da quello avains nus dabsögn il pü da tuot, per cha possans vendscher las difficulteds, river tres ils prievels e cumbatter cun curaschi, e que curaschusamaing e sainza trücha fin a l'ultim respir (usque ad extremum spiritum).

Sajas schlass, homens stimos, frers i'l Segner, da tuots ils megl ders! Cha'l Segner as stetta tiers, scu a nus, cun sieu maun ferm e ch'el bütta aint il fö la percha da sia ira chi s'ho invideda cunter nus (virgam irae suae in nos accensae in ignem abiciat)! Amen.

Deda a Zuoz, l'ultim di dal mais october i'l an 1620.

Voss frers e collegas, serviaints da las baselgias da Gesu Crist chi sun in Engiadin' Ota, nus chi'S stimains e predschains sül pü ot.

III. Als 29 october es gnida missa avaint quista charta a Las Agnas (ad Paludes) als frers; ella es gnida dad els examineda ed appruveda.

A's po rester surprais cha quista lungia charta chi eira adresseda a tuotta via als collegas da la cited da Turich, nu manzunaiva niauncha cun ün pled que chi eira urto in Vucligna. La charta avaiva apunta tuot ün oter böt: quel dad indraschir in che möd precis cha'ls predichants Alexander e Jenatsch avessan discurrieu melamaing da lur collegas in Engiadin' Ota. Da gnir taxos scu «Spagnöls» e «desertuors da la chosa da Cristus» avaiva per els natürelmaing üna ficha mordainta.

Dal rest vegnan druedas speratiers sumaglias chi espriman bain avuonda la schmurdüm dal mumaint: cha's rechattan suot il curtè, cha la percha da l'ira dal Segner s'hegia invideda cunter dad els. Melavita nu gnivan registredas eir las respostas sü da Turich aint il cudesch da protocols, uschè cha nus nu pudains savair ünguotta dapü cu que chi'd es gnieu ad uraglia fin cò.

Nos cudesch da protocols fo in quist lö üna posa da bod ün an; zieva gnaregia ün silenzi auncha pü lung. Scha s'algorda cha in october dal 1621 ad ho gieu lö la prüma invasiun dals Austriacs in Engiadina Bassa (suot Baldirun) e cha sun idas ouravaunt bgeras agitaziuns e

da tuotta sorts scumpigls, schi inclegiains nus cha'ls temps eiran memma inquiet per as raduner a discussiuns colloquielas.

Per recapituler ün pêr dals evenimaints principels chi scuntrettan traunter las duos tschantedas colloquielas:

Als 6 november 1620 eira gnieu spüert a *l'ambaschadur frances Gueffier* (sto manzuno eir in noss protocols) ün artschaivamaint triumfel a Cuira. Quist rinforzamaint da la vart francesa-refurmeda clama be dalum a reacziuns da l'otra vart.

In favrer dal 1621 vegnan approvus ils *Artichels da Milaun* davart da la Ligia Grischa, las duos otras lias ils sbütan.

Als 25 favrer 1621 vain mordragio *Pompejus Planta* in sieu chastè da Rietberg. Güerg Jenatsch es da la partida, prubabelmaing quel chi ho insceno l'assagl davent da Grisch.

Vers la fin marz 1621 vegnan sullevedas *las binderas in Engiadina e Bravuogn*. Ils homens armos passan our dal Schin Vegl. A vain a cum-battas cunter ils adversaris da la Lia Grischa sper Seglias, zieva (cun granda perdita a Valandau) ed in ultim vegnan listess viantos tuot ils auxiliars da la Svizra interna sur l'Alpsura.

Suot il dücha *Serbelloni* eira ieu mel a maun als refurmos da Clavenna. Lur chesas sun gnidas schmuschnedas. E nu schmanchain ils duos predichants *Chasper Alesch e Jon à Porta* chi suspiravan intaunt in üna praschun a Puntina. Digià als 6 october 1620 eiran els gnieu clappos sper Breisach in Austria, cur ch'els eiran in viedi vers ils lös dals cunts germanais e vers Ollanda, inua cha vulavan cunvgnir per impromischiuns d'agüd.

Sül ultim (ultimo) *dal mais avuost 1621 es gnieu tratto il seguaint in nos colloqui sto raduno a Zuoz* (corret our da «ad Pontem»):

I. Sar Gian Planta s'ho preschanto ed ho fat valair cha sieu servezzan da predicatur vegna giavüscho, sch'el vegna examino e piglio sü i'l Chapitel (pro certum affirmavit ministerium suum desiderari si examinetur ac recipiatur). *Per quello ho el pretais* (petiit) *da gnir examino suainter la decisiun da la radunanza da delgios* (iuxta decretum Filisurianaee congregationis).

Vis quel decret e zieva s'avair cusglios e cuschidro aunch' otras chosas, ho il colloqui stimo per bön da l'examiner. Zieva cha l'examen es sto glivro, es gnieu decis: pervi cha'l (candidat) *nu s'ho demusso capabel avuonda* (non satis idoneum se exhibuit), *eir pervi ch'el nu voul munter in chanzla* –

cunter la stricta prescripziun sinodela – neir brich cur ch’el varegia fat l’examen ne scu sinodel (nec examinatus nec receptus suggestum ascendit), nun il pudains nus absolutamaing brich piglier i’l uffizi dal servezzan dal pled da Dieu, ne l’impuoner ils mauns a tel fin (adeoque manus imponere non possumus). E tiers dschains nus tuots decisamaing (uno ore pollicemur): 1) Nus nu vulains repeter l’examen. 2) Eir davaunt la Sinoda sustgnarons nus quecò scu il pü arcumandabel (commendatissimum habituros). 3) Scha üna raspeda giavüscha sieu servezzan, schi prastarons nus bun agüd (nos pium officium facturos), da maniera cha’l premanzuno sar Gian (dominus Johannes) nu’s possa almanter da nus d’ünguotta cun buna radschun. A l’es eir gnieu miss a cour chodamaing ch’el as dessa dedicher pü ferm a sieus stüdis (addita est etiam sincera ad studia adhortatio).

II. Nus vains retgnieu cha saja bön e zuond necessari in quists temps da misiergia da fixer cha las dumengias as raduna duos gedas (bis concionari) per il cult divin, eir il marcurdi üna geda (die mercurii semel), e dad instituir in baselgia il mardi, la gövgia e la sanda uras d’urazchun dal zievamezdi süllas trais (preces vespertinas ad horam tertiam), da möd cha quistas uras d’urazchun sajan in mincha raspeda las medemmas. Per scriver quellas urazchuns unifuormas (ad preces uniformes componendas) sun gnieurs tschernieus sar Lüzi Papa, sar Erhard, Esaja Schuchau ed Andrea Albertin. Pünavaunt vain fatta la cundiziun (additur), cha vegna dumando e survgnieu il consens (la perinçletta) da las raspedas in quista chosa.

Las tractandas dal colloqui da Bever, als 13 favrer 1623:

I. Gian Planta da Zuoz s’ho preschanto ed ho pretais cun insidenza (absolute recipi petiit) da gnir piglio sü sainz’ üngün oter examen i’l numer dals serviaints da Gesu Crist, e que permur da la cumpetenzza, steda concessa a nos colloqui da la sinoda da Filisur.

Cun granda melavita ho indraschieu il colloqui cha’l surnumno Gian Planta, da que temp innò ch’el es gnieu examinò dals collegas i’l colloqui da Zuoz e ch’el es gnieu admunieu da’s dedicher pü diligiaintamaing a sieus stüdis, as hegia cumpurto in möd poch simpatic e chi nu’s cunfo cun ün student da la teologia (indecore, nec convenienter theologiae studioso se gessisse) e ch’el hegia pers quel temp ch’el avess debito a sieus stüdis, saja cun surpiglier uffizis, saja in as dand our in nos colloqui per qualchün ch’el nun es (aut in colloquio nostro falso traducendo), saja ch’el s’ho fat terribelmaing da grand (se superbissime iactando). Perche:

1) *Prümavaira scuorsa nun avess el accepto üna raspeda chi eira vacanta ne cun sforz ne da libra volunted, ma ho abratscho üna carica politica, vould dir la cuvianza (eir per latin esa scrit: Coviaunza suscepit).*

2) *El ho lascho passer mincha chaschun per fer l'examen colloquiel chi füess sto pü cu umaun (facil), e zieva ho el stüert las chosas fin al puonch da'l numer ametodic (cunter la metoda), terribel difficil, qualchosa më pratcho, ed uschè ho el vulieu zuppanter sieu savair mangluoss (ita suam niscitiam tegere voluit).*

3) *Davaunt la gliend ho el straquinto il motiv, pervi dal quèl el nun es gnieu admiss a la Sinoda: cha que nu saja forsa cha mauncha tar el (saepissime asseruit non esse suam ipsius imbellicitatem), bgeraunz saja que l'invilgia ch'el hegia cunter se – scu ch'el disch cun egens plets: «Permur ch'el nun hegia gieu la cuvida.»*

4) *Na consciaint da sia inconseguenza (suae imbellicitatis ignarus) ho el be dalum zieva dit e repetieu: «Eau se dad esser degn (da l'uffizi).»*

5) *Ad ün dals collegas chi l'ho impromiss cha'l colloqui vöglija esser buntadai vel cun el (promittenti benignitatem), ho el respus: Dafatta brich, eau nu giavüsch la bunted dal colloqui, ma da gnir admiss scu predichant per spür miert (ex merito volo recipi). El ho cuffesso (fessus est) d'avair dit tuot quecò ed ho dumando per pardun, perfin ho'l impromiss rat e ferm da's megl drer (emendationem sancte pollicitus est).*

Siand cha las chosas staun uschè, nun ho il colloqui in üngün möd ne vulieu ne stuvieu piglier sü il prenumno sar Gian i'l numer dals ministers e neir brich impuoner ad el ils mauns (per l'ordinaziun), ma ho piglio la seguainta decisiun: Prüma cuffermains nus la decisiun da la fin d'avuost (a vain agiunt ün pled chi'm pera incuntschaint «ebzerni», il sen stu esser «d'avaunt duos ans») in tuottas parts e la declarains valaiola (ac ratam esse volumus).

Secundariamaing concedins nus, per ch'el possa assumer plaun a plaun la chüra per üna raspeda, sch'el fo progress pü grands, ch'el possa tgnair privatamaing, per s'exerciter, duos predgias (duas conciones) a Zuoz in preschentscha da sar Esaja Schuchaun, Giachem Pallo (predichant e vschin da S-chanf inua ch'el es sto in uffizi dal 1614 fin al 1624, cur ch'el murit a l'eted da be 32 ans) e da me, Andrea Albertin. Sch'el as tegna bain (si bene se gesserit), scu ch'el fo sperer, schi permettains nus ch'el possa munter in chanzla in üna da nossas baselgias chi'd es adatteda als prüms principis da quist gener (suggestam... primis initiis accomodam).

Terza: El es gnieu admunieu severamaing ch'el s'artegna da la vanited e da quella granda temerited ch'el ho demusso fin uossa (temeritate hactenus adhibita). El ho eir impromiss da fer quello.

Quarta: Danövmaing avains nus do cul sprun (calcar adhibitum est) per ch'el as dedicha pü diligiaintamaing pussibel a sieus stüdis e ch'el cum-pensescha sia negligentscha cun diligenza.

Aunz cu lascher ir a fin quist verbel, es forsa a sieu lö da's fer alchü-nas ponderaziuns davart quist candidat insolit per l'uffizi da predi-chant. Sieu «cas» pudess d'üna vart parair da memma poch interess per gnir adüt cò zieva 370 ans. Da l'otra vart am peran güsta telas cuntai-sas i'l ravuogl dal colloqui da preciser eir sias egnas conturas. Bod cun ün miel invilgia vezzains nus colloquiels dad hoz che forza directiva chi sortiva da quella instituziun! Da l'otra vart nu pera que tuot logic que cha'l colloqui d'üna vart scumanda, da l'otra imbütta al pover candi-dat: A d'eira perfin gnieu decis ch'ün seguond examen per sar Gian nu vegna pü in dumanda. Tuottüna cuntegna nos ultim protocol il rim-prover ch'el avess pudieu assumer da prümavaira 1622 üna raspeda, ma ch'el hegia preferieu la cuviaunza! Medemmamaing al vain que imbütto ch'el hegia lascho passer las chaschuns per fer l'examen. Po-der cha nos cudesch da protocols nu saja cumplet. Cha's fatscha üna geda il confrunt dal numer da colloquis i'ls ans 1618–20 e zieva 1621–23! – Remarchabel eir il cuntegn dals examinatuors: d'üna vart vögliane as tegner strictamaing vi dals uordens, da l'otra vart als disch lur cour da gnir ün pò incunter al candidat e da'l splaner la via illa pra-venda. A tuotta via cha'l register dals sinodels grischuns da Truog so da dir ch'ün Gian Planta da Samedan (ma que stu esser il listess) saja gnieu ordino al ministeri dal 1628 e ch'el saja sto fin l'an da sia mort, dal 1642, predichant a Chasatscha. Prubabelmaing nun avaiva el, murind, auncha l'eted da 40 ans!

II. Il stimo decan Lüzi Papa ho ruvo in nom da la raspeda chi vain num-neda «dal Sench Murezzan» (quae Sancti Mauritiü vocatur) ed in nom da sar Conradin Toutsch cha nus cuffermans la clamaschun, cun la quela il sur-manzuno Toutsch es gnieu clamo i'l servezzan da quella raspeda.

Il ven. colloqui chatta cha scha vöglian qualchosa, saja quels da San Murezzan, saja Conradin Toutsch, schi cha's preschaintan svess e nu drou-van il decan scu delegio (nec D. Decano utantur delegato). Impü esa eir gnieu decis cha'l sar decan dess dir cleramaing (monendum) a Conradin

Toutsch ch'el nu possa cuntinuer pü lönch (ne ulterius pergat) cun la chüra da la raspeda da San Murezzan, aunz cha'l colloqui nu saja cuntanto.

III. Clo Ruond (Nicolaus Rondius) ho surpiglio la chüra da la baselgia da Silvaplauna sainza salüder ils predichants dal colloqui (patribus colloquii insalutatis) – que chi fin uossa staiwa ad els da permettre. Perque ho il colloqui decis cun vuschs unidas cha'l sar decan hegia da scriver üna charta al manzuno Ruond, cun la quela al dess gnir dumando perche ch'el hegia surpiglio il servezzan da quella raspeda per que aint (temere) e sainza avertir ils frers. Alura al dess dir (il decan) ch'el hegia da's preschanter al prossem colloqui e render quint da sieu agir (factirationem reddat); cha sch'el vess da manchanter quecò (quod si neglexerit) e da passer surour la pretaisa dal ven. colloqui (si iudicium contempserit), schi cha'l colloqui vegna a pisserer (facturum officium) ch'üna tela impertinenzza nu possa dürer (ne tanta temeritas locum habere queat).

IV. Davart ils absaints esa gnieu decis rat e ferm, seguond l'artichel 8 (da noss statüts) cha sch'els refüsan da gnir, schi ch'els hegian da pajer al colloqui chi seguero prosmamaing ün chastih chi nu pudaro gnir s-chasso (poenam irrogatam). Ad es gnieu güdicho (per els) scu per quels chi spredschan ils frers. Ils absaints sun stos: Andreja Gallunus (da Madulain), Johannes Jodocus (da Puntraschigna) e Conradin Castelmur (da Segl).

Scha nus avains pruvo da resümer che chi eira dvanto illa politica düraunt la prüma posa da protocols, quella fin in tard utuon 1621, schi vulains nus recapituler cò eir que chi'd es ieu sül viv düraunt la seguonda posa, quella d'ün an e quatter mais, fin in favrer dal 1623.

In october dal 1621 avaivan fat ils Grischuns üna invasiun sur il Pass Chaschauna in Livign e fin a Buorm. A d'eira ieu mel a glivrer. Scu risposta cumpera als 26 october Baldirun culs Austriacs a Scuol. Battaglia intuorn suneri, l'Engiadina Bassa patescha ferm. Colonel Brion es irruot i'l Partenz; ils Spagnöls, suot la guida da Serbelloni, invadan la Bergiaglia e mettan in tschendra püssas vschinaunchas, dücha Feria occupescha la Vucligna e Clavenna. Il chavalier Ruduolf Planta aintra als 22 november cun Baldirun in Cuir.

Bgers predichants e patriots stöglian fùgir da lur patria... güst eir quels chi vaivan aschaschino a Pompejus Planta. Chapitauni Giacum Ruinelli vain clappo e mno scu praschuner a Puntina. In favrer dal 1622 vain conclüt il *Capitulat da Milaun*, poch zieva üna Lia eterna

cun la Spagna. Il Partenz e l'Engiadina Bassa vegnan declaredas scu intschess suottamiss a l'Austria. Incunter a las impromischiuns da Baldirun vain scumando il cult divin refurmo. La dumengia da las Palmas cumainza la revolta dals Partenzers chi glivra als 16 gün cun la capitulaziun da Baldirun a Cuira. A vain ad üna cunvegna per deliberer ils praschuners da Puntina: Ils predichants Alesch, à Porta, Alexander ed il chapitauni Ruinelli avessan da gnir miss in liberted cunter duos praschuners da Cuira, ma Blasius Alexander stu suspirer inavaunt in praschunia.

In lügl 1622 cumainza l'offensiva dals Grischuns cunter ils Austriacs in Engiadina Bassa, guidata da colonel Rudolf de Salis. A glivra cun üna noscha sconfitta eir dals Partenzers e cul *Dictat da Lindau*. Uossa eira il Grischun ün pajais occupo, la liberted da la cretta eira schmutileda, a d'eira da pajer gabellas e da destiner ostagis chi's vaivan da surder a Feldkirch als Austriacs. – Scha'd es eir cuntschaint cha Baldirun ho incendio la vschinauncha da Zuoz, schi saro tuottüna da dir cha l'Engiadin' Ota avaregia soffert bger da main cu la Bassa. Ils predichants paressan tuots sül lö. Da restricziuns da cretta nu s'oda our dals protocols, ma innatschas e temmas nu manchaivan.

Per Nadel 1622 pervgnit da Puntina la nouva cha «Blech» (= Blasius Alexander) saja gnieu decapito, zieva cha l'eira gnieu taglio giò il maun dret. – Per il colloqui d'Engiadin' Ota saro que sto üna curiosa surpraisa, in schner dal 1623, d'udir cha'l predichant da Puntraschigna, Johannes Jodocus (Gian Giosch), dschender da Israel Jenatsch e quino da Güerg Jenatsch, saja passo a la cuffessiun catolica. – Eir ils refurmos da Puschlev passantaivan noschs temps, 21 d'els gnittan mordragios e la stamparia dals Landuolfs füt melamaing splündrageda. La dischuniun illa Trais Lias eira incumparabla.

Las tractandas dal colloqui, sto raduno als 27 favrer da l'an 1623 a La Punt-Chamues-ch illa chesa da Murrezzan (in aedibus Mauriti):

I. Conradin Toutsch es cumparieu ed ho giavüscho cha la clamaschun, cun la quela el eira gnieu clamo da la raspeda da San Murrezzan vegna cufffermeda. Il medem ho dumando il cuvih (idem petiit convicus) in nom da tuot la raspeda.

Il ven. colloqui ho decis: Zieva avair cuschidro bgeras chosas, cufffermains nus quista clamaschun, almain taunt inavaunt cha sto ad a nus da fer quetaunt (quantum in nobis situm est).

II. Clo Ruond pünavaunt e'l cuvih sun stos in nom da la raspeda da Silvaplauna ed haun ruvo cha Ruond vegna arcuntschieu scu paster (Pastor) da la raspeda da Silvaplauna.

Il colloqui ho decis scu segua: *Quista clamaschun nun appruvains nus plainamaing (absolute) e sainza cundiziuns (simpliciter). Nus dains unicamaing il permiss in quists temps burrascus (temporibus hisce turbulentis), quaut chi sto a nus, per cha'l dit Ruond possa servir a quella baselgia (ut... Ecclesiae illi inservit – sic!). Cur ch'ün an saro passo (absoluto. a. anno), saregia la cumpetenzza tar la Sinoda. Scha quella percunter nun as vöglija raduner, schi cha'l colloqui guardaregia e decidaregia a la megladra (pie).*

Que cha'l colloqui da Schlarigna ho tratto als 3 lügl 1623:

1. *A la raspeda da Puntraschigna chi fo la dumanda, concedins nus cha sar Giachem Ramp (eira da Zuoz, sto il prüm predichant a Brüschi, zieva dal 1609 – 23 a Puschlev, ma avaija gieu da fùgir la prüma vouta già dal 1620) surpiglija l'uffizi (Episcopatum) dal pseudo-predichant Gian Giosch (Johannis Jodoci), percunter in tela maniera cha que dvainta cun tuot resguard (bona cum venia) per la raspeda da Puschlev, inua cha'l numno sar Giachem eira pastur ufficiel (Pastor ordinarius) e chi'd es uossa sprovista (nunc exulantis).*

2. *A vain drizzo ün incuraschimaint vschandaivel (exhortatio mutua) per cha tuot ils predichants trattan, cun occasiun, giò da chanzla ils artichels cuntravers (articulos controversos) e que in möd, ch'els possan declarar la vaira opiniun (meram sententiam) dals ortodoxs e ch'els cufferman (quella) cun tischmuongias da la Sencha Scrittüra. Els dessan preschanter eir l'incletta dals Papas (Pontificiorum item opinionem proferant) (forza cha'd es managio: dals respunsabels catolics) e la dessan refüser cun schlass argumaints (solidisque rationibus refellant), ma cun taunta precauziun (hac tamen adhibita cautione), cha nu's dess druver tridas expressiuns (ut absint maledicta) e cha nu dessan avair lö inscunters zuppos (comitia clandestina), mo cha's fatscha tuot cul spiert da toleranza (adsit vero spiritus mansuetudinis).*

Que chi'd es gnieu tratto al colloqui da La Punt-Chamues-ch, als 20 avuost 1623:

1. *Ils duos frers Curdin e Constantin à Planta (a nu's tratta forza da predichants) s'haun preschantos (a nossa radunanza) ed haun testificho be*

a buocha e sainz' üngüinas scrittüras cha vessan pudieu musser (ac proposuerunt oretenus nullis exhibitis scriptis) scu segua: E per cha nu's possa fer tiers üngün errur – quists sun stos ils plets exacts illa lingua terrera (formalia ex vernacula haec fuere verba):

«1) *L'archidüchia Leopold s'vess s'ho almanto dals predichants (el gnaregia in avuost dal 1624 cun severas «prescripziuns da revisiun») da noass Cumöen cun dir chia els dian mael in chianzla e giu d'chianzla. Sun dit frars dumandos che mael l'dian ls' Praedichants d'Engiadina zura? Haun respundieu: Ell nun ho dit oter, ne savains oter.*

2) *L'archidüchia s'ho almanto chia ls' Praedichants da noass Cumöen tschearchian da muantaer da noeff üna seditiun incunter ell. Sun süsura dumandos dit frars, in che möed u in che grò quella seditiun vengia muantaeda? Haun respundieu: Nus nu savains oter, ell nu'ns ho dit oter.*

3) *L'archidüchia giavüscha chia vegna licentio ls' Preadichants, e chia stettan giu e desistan dall'uffici da pradgaer, infina chia ell eis maelg aschüro (infin cha s'hegia la garanzia) chia l'trattat da Lindau saja salvo.*

4) *Nu faschiand l' Cumöen u'ls Preadicants lotiers, chia scha dvainta quael (= ün) cuntraedi u inconveniaint, chia nus nun dettan la cuolpa otar co à nus.»*

Quecò es que cha'ls duos frers Planta haun paleso (proposuerunt), que cha nus (= eau) avains dalum miss in scrit (quae subito a nobis scriptis sunt mandata) e zieva avains prelet in preschentscha dals frers Planta. In tuots puonchs (omnimodo) es que gnieu cuffermo dad els. Ed insembel (uno ore) haun els do l'appruvaziun culs plets: «Madischi, all eis uschea.»

II. Cur cha'l colloqui ho gieu udieu quistas chosas, ho'l decis da fer ün mumaint da ponderaziun (a tuotta via cha'ls duos frers haun stuvieu ir our intaunt), dal quèl es sto il chavazzin (initium), cha dessa gnir dumando dals frers Planta lur cussagl (consilium), na taunt pervi cha stuvess esser cha s'hegia lur parair scu imsüra per nos uffizi (pro regula officii nostri), ma püchöntschi per cha lur intenziun pudess gnir cuntschida vi da tscherts segns (ut animus eorum aliquibus signis cognosceretur). Zieva s'ho clamo ad els, a sun gnieu aint e, dalum cha s'ils ho dumando, haun els respundieu (illi vocati accesserunt, rogati risponderunt), il prüm Curdin cun quists plets: «Par que nu s'schmari bricchia!» E Constantin cun quists: «Que nus havain fat, schi havains fat par ns'agüdaer, in l'areist schi vulains viver e murir cun vus. Plü innavaunt nu savains che diir, vus eschas buns e sabbis e savais que vus havais da faer.»

III. *Ils frers Planta (Plantei) haun giavüscho cha vegna cuffermo cun ün manuscrit (scriptis manu) u a nom dal colloqui que ch'els hegian dit e cha que als vegna cusgno (ac ipsis traderetur). Ma il colloqui, zieva avair cuschidro püssas chosas, ho refüso da fer quetaunt, tgnand bain in ögl (satis ecc. iudicans) (las consequenzas), scha më cha nos Cumön mettes in practha que cha gniva dit (cha vegna fat) a qualchün chi fess (qualchös' uschè) (si comunitas nostra id factitet ut facturo dicebatur). Cur cha'd haun gieu quista resposta, haun taschieu ils Plantas (acquieverunt Plantei).*

IV. *Ad es gnieu decreto rat e ferm cha tuot ils frers dessan salver cults divins ils marcurdis. Quista decisiun es gnida tratta, pervi cha püs frers, scu cha resulta da lur egna palanteda, haun negligieu digià per ün temp pü lung quist servezzan uschè zuond bsögno.*

V. *Ad es gnieu decis cha minchün da nus dess dir prosma dumengia (ut unusquisque ex nostro numero die dominico proxime sequenti... proponat), cur cha'l cult es a fin, davaunt la raspeda, que cha'ls frers Planta haun dit ed eir paleser nossa resposta, da la quela sun ils duos puonchs principels quels (cuius duo sunt capita): cha que es üna calumnia u manzögna scha dian da nus cha schmuorvans (maledicere) da l'archidücha Leopold sün chanzla e suot chanzla, ubain cha nus sdouvans sü üna revolta; cha nus dessans clamer scu perdütas a nossas egnas raspedas (in testes nos advocare ipsas ecclesias nostras), cha's dess dumander scha nossas raspedas forsa nu vöglian pü, u scha cumandan u giavüschan (rogare an ecclesiae nostrae nolint, iubeant, desiderent) cha nus persevereschans in nos uffizi. Cha sch'ellas ans licenzcheschan (quod si nos dimittant), schi cha nus giarons davent, sainza dubiter cha'l maun da nos Dieu restaro a nus zuond favuravel (nil dvbitantes de Dei nostri praesentissima manu).*

VI. *A vain decis cha scha vess da dvanter (si occurrat) cha's preschainta qualchosa da tela purteda (ut aliquid eiusmodi momenti se offerat), cha que nu cumporta üngüna suspaisa e neir bricha cha que possa spetter fin a la prosma radunanza da tuot ils frers, schi cha in ün simil cas dessan gnir insembel ils frers pü ardaints (fratres viciniore convenient) e dessan decider cun la plaina cumpetenzza ed in nom da tuot il colloqui que ch'els stiman per bön e salüdaivel (quae pia ac salutaria ipsis videbuntur).*

Cun quecò essans nus rivos fin giosom la pagina 44 da nos cudesch da protocols dal colloqui d'Engiadin' Ota. A nun es da dubiter: la tensiun avaiva raggiunt in quist mumaint ün cuolmen per ils povers predichants d'Engiadin' Ota. Nus ils vulains lascher ir inavous tar lur raspe-

das e – la prosma dumengia – interroger in quel möd scu cha la decisiun i'l ultim protocoll ils obliaiva da fer. A's vezza cha la pü granda anguoscha, sgüramaing motiveda, eira in quels ans da gnir disfamo tals pussaunts. Cha's confrunta cu cha'd es la situaziun tar glieud dad hoz chi'd ho da tmair di per di da gnir missa no scu tradituors da la patria! A's po inaccordscher fich bain cu cha «las novas» da Curdin e Constantin Planta haun fat trembler internamaing l'inter colloqui. Scha's realisescha cha'l cult divin refurmo eira gnieu suppress in Engiadina Bassa e Partenz daspö ün bun an, schi il «giavüsch» da l'archidücha Leopold (il bap dal pach da Lindau), seguond il quèl ils predichants d'Engiadin' Ota avessan da glivrer da predger e da gnir licenzchos... nun eira be ün spass. Cò eira da guardar bain che cha's faiva!

Fin al prossem colloqui passaron duos s-charsas eivnas. Quel purtaro cun se la decisiun da scriver svesa a l'archidücha, pü diplomaticamaing pussibel, mo eir cun tuotta fraunchezza evangelica. La copcha es mantgnida in nos cudesch.

Cuortamaing saja auncha revgnieu al predichant Clo Ruond, manzuno i'ls protocols dals 13 e 27 favrer dal 1623. Cun sieu proceder temerari da surpiglier la pravenda da Silvaplauna – «*temerari*» per las imsüras d'alura – avaiva el melamaing rabgianto sieus collegas. Il register da Truog dals sinodels grischuns so be novas d'ün predichant Gion Töna Tschenett da Zernez per Silvaplauna, düraunt ils ans 1616–26, ma manzuna tuottüna eir il nom Nicolaus Rund. Truog sapchainta cha Ruond da Scuol nu saja sto sinodel e ch'el nu vegna manzuno uschigliö inüngür. Noss protocols chi manzunan las discussiuns davart el, sclareschan speratiers eir la glista dals predichants.

(Cuntinua)

Scenas our da la vita populara in Engiadina Bassa dal 18avel tschientiner (Descrittass da Martin Peider Schmid aint il «Chiantun verd»)

da Jon Mathieu

L'istorgia sociala nun es neir in Grischun üna scuverta da nos temp. Fingia avant sessant'ons ha scrit Chasper Pult in quist periodic: «Na tras il stüdi bod exclusiv del svilup del art e della scienza, del destin e möd da viver d'alchünas classas privilegiadas, da pacas famiglias potentas, ma be tras l'observaziun conscienziusa e detagliada del far e demandar da quels chi cun las süuors da lur frunt suolchan minch'an lur düra terra e sun liats vi dad ella cun lur infants e'ls infants dels infants – be tras l'observaziun da lur möd da's cuntgnair, gnin nus a cognoscher a fuond ils factuors chi determineschan il cumbat per l'existenza dels abitants d'üna data cuntrada, e l'istorgia nun ais oter co'l reflex da quaist cumbat per drets e bsögns materials e morals.»¹

Ün text remarchabel, na be pervia dal spiert democratic, ch'el exprima. Eir dal püt da vista scientific: Chasper Pult ans renda attent cha las causas chafuollas dal svilup istoric sun zoppadas aint illa vita populara, la vita da minchadi e da minchün.

I nu's po pretender, cha'ls istorikers grischuns hajan tut fermaing a cour quist cussagl.² Mo i nun es neir ün affar uschè leiv, chi'ns

¹ Annalas, annada 35, 1921, p. 30. Eu less ingrazchar a sar Cla Riatsch, chi m'ha güdà cul rumantsch.

² Quai muossa ün tschüt aint il Bibliographisches Handbuch zur bündnerromanischen Sprache und Literatur, zur rätsch-bündnerischen Geschichte, Heimatkunde und Volkskultur, 1950–1977, bearbeitet von Alexi Decurtins et al., Chur 1977.

vain proponü quia. Co laina observar ün paur dal 18avel tschientiner (o dad avant) sül chomp e sülla prada? Co til seguir in sia chasa, in ustaria, sülla faira? Las ledschas dal temp – per gronda part fich lungas e detagliadas – ans quintan p. ex. bler da las *prescripziuns* d'üna società paurila e pac da la *pratica*, quai chi nun es tschertamaing na il listess.

Üna da las qualitats necessarias pel manster d'istoriker es la furtüna. E sco furtüna as poja tenor mai resguardar il fat, cha'l tenent Martin Peider Schmid de Grüneg da Ftan ha scrit dal 1773 al 1782 duos cudeschs cul titul «Chiantun verd in chronographia rhetica illustrada dels anos 1773, 1774, (1775), 1776, 1777 etc.»³ La litteratura istorica ha dat paca bada a quist manuscrit monumental da bod duamilli paginas in folio. Johann Andreas v. Sprecher til manzuna, mo be per illustrar la vita da l'aristocrazia sül pajais e per muossar, chi haja dat tanter ils exuffizials ün per «tips curius» («recht wunderliche Käuze»)⁴. Effettivmaing nu's poja bain metter a lö quista «chronographia rhetica» in ün dals geners tradiziunals da funtanas istoricas. L'autur ha copchà tuot ils documaints ch'el ha chattà per chasa intuorn o ch'el ha pudü tschüffer dad alch otra vart nan; el ha scrit sü tuot quai chi capitaiva intuorn el, ed ils impissamaints ch'el s'ha fat lapro, sainza dar ün sistem inclegiantaivel a sia ouvra. Mo in «chronizond» in quist möd ans dà'l üna schurma da detagls our da la vita da seis temp. Schi's metta quels in ün connex dad argumentaziun ün pa coerent, es quai üna funtana da prüma qualità per ün'istorgia sco cha Chasper Pult tilla ha postulada. E tanteraint as poja chattar eir descripziuns chi dan ün purtret vaira cumplet da tschertas üsanzas. Quatter da quellas (la lavur cumüna, la faira, las bacharias e las nozzas) lessa publicar in quai chi

³ «Chiantun verd» es la fuorma rumantscha per «Grüneg». Il prüm tom (nel seguaint cità I: pagina) as rechatta aint il Staatsarchiv Graubünden, A 722; il seguond tom (cità II: pagina) pro la Fundaziun Planta, Samedan, Al 1. I nu's tratta dad üna dubletta, dimpersè d'üna cuntinuaziun.

⁴ Johann Andreas v. Sprecher, *Kulturgeschichte der Drei Bünde im 18. Jahrhundert*, herausgegeben und neu bearbeitet von Rudolf Jenny, Chur 1976, p. 268 sg, 367. L'unic chi nun ha dovrà il «Chiantun verd» be in möd anecdotic es – quai ch'eu sa – Ludwig Johann Vital, Aggiunta allas «Pratchas» da Sent e Scuol (1735–1737), stampa separada our dal Fögl d'Engiadina, Samedan 1918; el ha fat adöver dal seguond tom, chi's rechattaiva quella jada aint il archiv Salis-Marschlins (plü tard aint illa biblioteca privata da Peider Linsel), sco funtana pel affar Marnia; vair eir Ludwig Johann Vital, Sent in Engiadina bassa, stampa separada our dal Fögl d'Engiadina, Samedan 1919, p. 2 sg.

segua. Mo ant co laschar quintar al cronist da quistas scenas our da la vita populara in Engiadina Bassa da plü bod, ans laina occupar dad el svess e da sia ouvra.

Martin Peider Schmid ed il «Chiantun verd»

Martin P. Schmid de Grüneg es nat ils 23 october 1743 sco figl da Peider Padrotsch Schmid e da Mengia Schucan a Ftan (I: titul). Ils Schmids da Ftan faivan part da la pitschna nöblia. Il predicat «de Grüneg» varana tut ad impraist da la gronda schlatta aristocratica cul listess nom our in Surselva. Mo i d'eiran stats daspö almain duos generaziuns adüna darcheu mastrals e facultà vaivna eir (I: 21, 37, 52, 195).⁵ La mamma derivaiva da la schlatta medemmamaing benestanta da ravarendas Schucan (I: 79, 105, 350). Quista trinità da pussanza politica, cultura intellectuala e ricchezza ha influenzà profundamaing la vita e l'ouvra da l'autur. Sainza seis fittadins nu vess el gnü temp da scriver d'incuntin, sainza erudiziun sco valor fundamentala nu vess el gnü la motivaziun lapro, e «l'honnur» (chi's acquistaiva culs uffizis politics) es il pled cardinal da sia cronica.

Sia famiglia plü stretta però nu vaiva gnü tant success social e d'eira plüchöntschi sülla via chi maina aval. A seis bap po'l onurar be cul titul da «medicus» – probabelmaing acquistà sainza stüdis universitaris. Il manster principal da quel d'eira da far il chastör, el nu vaiva l'ambiziun pels uffizis sco chi vess toc, e plünavant para, ch'el haja sguazzà üna part da la facultà (I: 362 sgg, 382, 605, 753). Eir invers seis bapsegner da la vart da la mamma es Martin P. Schmid plüchöntschi critic: Da seis tat Riet Schucan quinta'l, ch'el saja stat praeses ed ün scriptur cuntschaint,⁶ dal bapsegner, ravarenda Martin Schucan, impè ch'el haja maglià oura seis credits considerabels a Ftan in ustaria (I: 135). Seis frar plü vegl, Peider, d'eira bainschi ün hom cuntschaint, mo quai pustüt per quai ch'el d'eira capabel da cumpensar ün defet corporal in

⁵ Aint il estim da Ftan da ca. 1715 avaiva il bapsegner, mastral Peider Smit, üna facultà da renschs 6800 (aggiunta: + renschs 1450), seis frar anvolt Jon Smit renschs 7200. La facultà mezdana d'üna *chasada* d'eira renschs 3650 (archiv cumünal da Ftan, C 14/1).

⁶ Ch'el haja tanter oter scrit eir üna cronica gnüda dovrada da Peider Dumeng Rosius a Porta (I: 28).

ün möd stupend. El vaiva pers la vezzüda dad uffant (pervi da las viroulas) e savaiva listess far da tuotta sorts lavurettas finas ch'el daiva da regal als paraints e a l'aristocrazia da la regiun.⁷ Seis bap ha perfin chattà üna duonna per el, mo quella derivaiva da la schlatta dals Steffenins da Guarda-Giarsun chi vaiva be importanza locala. Eir nos cronist nun es stat capabel da dar nouva splendor sociala a sia famiglia. Quista schmuntada e l'inferiurità aint illa parantella as muossa in sia ouvra cun ün tschert trat compensatoric.

Las experiencias cha Martin ha fat in sia infanzia saran statta ambivalentas. Dad üna vart ha'l badà fich svelto ch'els nu d'eiran «be» paurs: Tschels uffants stavan far per cumond a lur genituors ed ir a lavur, el però survgniva giovarets cha seis bap cumpraiva dals «crommers de miravalgias» our dal Tirol (I: 372). Mo fingià da puobet – cun trais ons – ha'l pers a sia mamma. Il bap nun ha maridà plü, ed il giuven Martin es creschü sü in ün ambiaint somber: Il bap nu's daiva blera fadia da far da chasarin, il frar d'eira orb, in chasa vaivna adüna darcheu oters fittadins, famagls e fantschellas (I: 374, 385).

Dalunga ch'el ha «savü tschantschar et ir» ha'l stuvü cumanzar la scoula, il prüm pro seis pin e pro'l ravarenda Nicolai. Cha sia diligenza d'eira in uorden, scriva'l, ch'el haja tschüf be il solit quantum da «svercladas» e plü tard «inguota dafatta». Davo ha'l lura cuntinuà la scoula giò Scuol (tanter oter pro'l ravarenda e cronist Not à Porta) ed a Ramosch. Star staiva'l pro paraints. A la fin è'l tuornà a Ftan, ingio cha'l cuntschaint ravarenda e scienzà Peider Dumeng Rosius à Porta (il vegl) es stat seis magister (I: 372 sg).

«Avanzà in age per ir als stüdis our d'pajais et in eisters» – el vaiva uossa deschedot ons – nu savaiva'l inandret che tour a man. Plü precis: Seis bap nu savaiva, a che carriera chi's dess dar la preferenza. Ravarenda, jurist o docter? O maridar? (I: 374) A la fin s'hana decis pel militar. Quai cuostaiva pac (I: 674). Tras la quinada dal bap d'eirna plünavant paraints culs Stupans da Sent chi possedaivan üna cumpagnia aint il regimaint Salis in Frantscha. Là d'eira eir amo ün cusdrin da Martin, Jon Peider Schmid de Grüneg, chi vaiva fat daspö desch ons

⁷ El ha vivü da 1741–1775. Seis indschign es gnü descrit fich detagliadamaing da Johann Georg Amstein, *Nachricht von der seltenen Kunstfähigkeit eines Blinden*, in: *Der Sammler*, 6. Jahrgang, 1784, p. 1–11. Vair eir la remarcha da Ludwig Johann Vital, *Aggiunta...*, op. cit. Üna pitschna biografia eir in I: 377 sgg.



Il prüm fögl dal «Chiantun verd»: purtret da l'autur Martin P. Schmid (funtana; Staatsarchiv Graubünden, A 722)

üna stupenda carriera militar.⁸ Vita d'üranta es Martin stat suot la protecziun, ma eir aint illa sumbriva da quist paraint famus.⁹ 1762 banderal aint illa cumpagnia Stupan, 1763 suotuffizial, 1771 «suetaide-maior» e dal listess on avanzamaint a tenent aint illa cumpagnia Saluz – quist es stat la carriera na güsta eminenta da nos autur (I: 673).

Mo almain vaiva'l filà guliv fin uossa.¹⁰ Pür d'ürant seis congedi d'inviern dal 1772/73 ha'l cumanzà ad ir ün'aigna via, quai cha'ls paraints nun han vis gnanca zich jent (I: 700) e chi plü tard til ha procurà aint ill'istoriografia la reputaziun d'ün «tip curius». Perche nun è'l tuornà pro'l militar, Martin? Perche ha'l cumanzà impè da quai a scri-ver clap cudeschs?

Il motiv principal sarà stat cha'l militar nu til plaschaiva. Cler ch'el vaiva gust vi dals raps e vi da l'onur chi's pudaiva acquistar cul militar in üna società aristocratica. Mo sias spranzas nu d'eiran gnüdas accumulidas in quel regard (I: 696).¹¹ La vita in guarnischun chattaiva'l lungurusa (I: 705). I para ch'el nun haja neir gnü tanta paschiun per quella. Seis cusdrin scriva cha sia decisiun da bandunar il militar saja bain infantila e plufra, ma cha ad el saja quai dal tuot listess: «i sarà be ün chastörün da main aint il regimaint» («il n'y aura qu'un paresseux de moins au regiment»; I: 695). I nun es bricha be ün cas cha Martin ha muossà la rain al militar güsta in quel mumaint: Seis bap d'eira mort in favrer dal 1772. Sainza l'autorità paterna, ma cun la facultà paterna pudaiva'l sperar da far üna vita chi correspuondaiva plü bain a sias inclinaziuns, üna vita onuravla sco «gentilhom» (I: 619). Per esser «gentil» as stuvaiva posseder tanta facultà da pudair viver sainza fadia.

⁸ El ha vivü da 1733 – 1819. Per sia carriera: I: 205 sg; Historisch-Biographisches Lexikon der Schweiz, Band 6, Neuenburg 1931, p. 212. Daspö 1795 ha'l dat plüs gronds credits sainza fit al cumün da Ftan (archiv cumünal, C 15 / 3) ed ha accumulid diversas caricas politicas. Sepuli e'l gnü in baselgia.

⁹ Quai es inavant eir aint ill'istoriografia: in Johann Andreas v. Sprecher, Kulturgeschichte..., op. cit., p. 819, tschüffa'l perfin las datas da vita da seis cusdrin.

¹⁰ Forsa na güsta dal tuot. Dal 1768 e'l gnü achüsà insembel cun tschinch cumpogns d'avair «puchà» cun üna «pitana» da Martina (I: 620 – 640). Vardà o achüsa da parti?

¹¹ Quai nu d'eira be per cas: Quella jada gnanca ün uffizial (subaltern) nu pudaiva bod plü viver dal guadogn militar. Il temp «glorius» da guadogn e carriera aint il mercenariat d'eira a fin (voir p. ex. Walter Bühler, Der Zürcher Solddienst im 18. Jahrhundert, Bern 1977).

Christen ved in Chronographia rhetica elubada de Randi de by. von vil 2. Mar. 1511. Anno 1511. à 76.

CHILANTE
VN VERD

IN

CHRONOSRAPE
REHETICA

ILLVSTRADA

DELS ANNOS

1515. 1516. (1516.) 1516. 1517. ex. 1517.

TRAS MAI

MARTIN

PELDERPES ROTIL

SCHIMIDI

VON SHVN: EG

A PETTAN

Il seguond fögl:
titul (funtana: Staatsarchiv Graubünden, A 722)

Quella vaiva'l eir scha na güst massa blera.¹² Per esser ün «hom» as stuvaiva avair üna duonna, e per s'acquistar «onur» as pudaiva cumanzar üna carriera politica o lura provar la via malsgüra da la scienza.

Davo ch'el vaiva bandunà il militar, d'eira üna carriera politica plüchöntsch difficila. Ma tuot ils problems füssan gnüts scholts in üna jada cun ün bun spusalizi. E propcha, el ha tut in vista la figlia da seis chapitani, dal guvernadur Andrea de Stupan. Che idea! Seis cusdrin til ha scrit cler e net cha'l guvernatur nu saja mai plü uschè «stüpid» («imbecil») da til dar sia figlia; forsa ch'el tschüffess amo quella dal mastral Jon Saluz, sch'el fess ün pa svelt (I: 1113). Ma nos cronist nu's laschaiva persvader uschè svelt. Cun perseveranza ha'l tgnü ferm via da sia grond'amur e tilla scriva üna pruna chartas. Gnanca set ons davo (dal 1780) nu vaiva'l amo dat sü la spranza (I: 459), schabain chi'd es fich probabel ch'ella vaiva tut ün oter fingià dal 1777.¹³ Quista perseveranza e la cretta exagerada in sias pussibilitats characteriseschan eir sia «chronica rhetica».

Sia inclinaziun per la scienza e per üna tala scrivonda as decleraran per part our da la tradiziun culturala da Ftan (Vulpius, à Porta) e da sia famiglia. Pustüt eir seis bap para dad esser stat illatrà.¹⁴ Davo la scoula ha Martin cuntinuà seis stüdis aint il militar cun gronda paschiun. Ma il success nun es güst stat persvasiv: Schabain ch'el pretendia d'avair scrit in quel temp ün cudesch da trigonometria, vaiva'l stuvü tour uras supplementaras per nu restar inavo in matematica (I: 691; II: 672).

¹² Il bap d'eira ün dals pü richs (il tschinchavel) aint il estim da ca. 1765 cun üna facultà da renschs 10 600 (archiv cumünal da Ftan, I B Fasch. 4). El ha laschè als duos frars üna chasa gronda, 223 stera d'chomp e 90,5 charra prada (II: 180 sgg). Scha Martin fittaiva sia part als fits curraints, pudaiva'l far üna buna vita, mo na güsta üna da mich'e lat. Ils paraints provaivan da til far tuornar in Frantscha cun argumaints economics, e minchatant plondschaiva'l da manguel da munaida bluotta (I: 558, 619; II: 600, 774).

¹³ Üna notizia na datada sper ün disegn da Maria Stupan: «NB ella es maridada cun il illm. sigr. Müsan de Samade e han infants etc.» (I: 845). Aint il cudesch da baselgia da Sent nu's poja verificchar quai: Ils Stupans vivaivan üna buna part dal on in Vucolina e lur naschenzas, matrimunis, mortoris sun manzunats be d'inrar (eu ingrazch a sar Töna Schmidt per quaista indicaziun). Aint il cudesch da baselgia da Samedan (1639 – 1806, archiv cumünal) nu's poja neir chattar quaista lai; mo aint il cudesch da la baselgia evangelica da Brusio (1735 – 1832, archiv da la pravenda) esa notà, ch'als 16 favrer 1777 ün illmo. sigr. landma. Gio. T. de Mysani haja maridà ün'illma. sra. Maria Stupana.

¹⁴ El vaiva üna biblioteca da bod 350 toms (II: 654 sgg).

Martin consideraiva quist' actività scientifica davopro sco'l resultat il plü substanzial da seis temp militar, ed el tilla ha cuntinuada eir in congedi, in scrivond ün cudesch da las pratchas e dad istorgia militara (II: 672 sgg).¹⁵

Dal 1773 ha'l cumanzà cul «Chiantun verd». Ils paraints as vaivan bainbod miss cunter ed eir otra gliעד faiva remarchas dubiusas. Uschea ha'l sviluppà adüna daplü ün'idea da sai svesc sco scienza: Üna proposta da matrimuni, üna da las megltras partidas in Engiadina Bassa (chi til vain fatta per til tour pel chül), refüsa'l culla motiva-ziun, ch'el «aja auters problems scientifics à resolver co quel chi po esser impero plü agreabel» (I: 300). La lavur vi da seis manuscrit douvra'l invers seis superiors militars sco argumaint per restar a Ftan (I: 700 sg). Interessant es il möd ch'el ha per guadagnar simpatia per sia ouvra. In üna charta als Stupans da Sent scriva'l cha in copchond tuot la documainta familiara lessa'l far uorden in chasa, e sco böt principal vögli'a'l «far bler' onur als paraints, als amis, al Engiadina ed a tuotta nossa chara patria griso-retica». Cul giavüsch da «pudair far ümilmaing la cuort» a sia prediletta conclüda'l (original frances I: 703 sg). Onurar tras eternisar – quai es il fil cotschen dal «Chiantun verd» (ad el svesc vess natüralmaing eir da tocker üna dretta porziun d'onur; I: 446).

Il surpudent vi da sia cronica es però da verer ch'el rinserra in quista noziun. Na be ils perdavants ed ils contemporans cuntschaints nu d'eiran onuraivels, dimpersè eir ils «originals» chi tenor seis parair cumprovaivan quai vaivan svesc üna qualità dad onurar. Schi, perfin il solit minchadi d'eira combel da «buns exaimpels». Tuot stuvaiva gnir scrit sü per nun ir in invlidanza, quai chi til paraiva alch dal pè sün quist muond (I: 316). La largezza da seis interess e la diligenza empirica han ün pa l'ajer d'ün temp nouv,¹⁶ mo sia arsaja da resguardar tuot il pussibel nun es cun quai declarada sufficiaintamaing.

Ils paraints e cuntschaints vaivan paca incletta per seis «chronizar», ed eir l'aigna famiglia para da til avair be impedi (II: 184, 295, 774).

¹⁵ Extrats landroua in II: 427 sgg.

¹⁶ L'interess per istorgia famigliara d'eira üna moda veglia in Grischun, mo da quel temp dvainta'l plü raffinà, plü empiric e plü extais (vair p. ex. Peter v. Planta, Chronik der Familie von Planta nebst verschiedenen Mittheilungen aus der Vergangenheit Rhätians, Zürich 1892, p. 315 sg, 379 sg.).

Daspö seis retuorn da la Frantscha staiva'l insembel cul frar, sia duonna e seis uffant. In avrigl dal 1775, pac davo la partiziun da la jerta, es mort il frar, ed il cuntschaint cusdrin Jon Peider es gnü avuà dal figliet (II: 294). Avant però, dūrant l'inviern dal 1774, han «inemis» tut davent il manuscrit a nos autur ed el til ha tschüf inavo pür ün on davo.¹⁷ I füss bain pussibel cha quists «inemis» d'eiran paraints chi vaivan ün'evidainta disfiduzia pustüt invers sias masüraziuns e glistas da bains (II: 184).¹⁸

La gronda part dal prüm tom dal «Chiantun verd» datescha dals ons 1773 e 1774 güst davo'l retuorn a Ftan. Davo l'interrupziun sforzada ha'l darcheu tschüf curaschi dal 1776 e pustüt dal 1777, ha scrit la gronda part dal seguond tom e vaiva perfin plans per la stampa. Cha'l problem sajan be ils raps (I: VI sgg; II: 600). In quels ons vaiva'l eir alch uffizis plü modests¹⁹ e s'orientaiva – ün pa plü tard – vers la società esclusiva dals «amis da l'agricultura».²⁰ El as titulaiva perfin da commember da quel circol, mo quai sarà stat plü giavüsch co realtà (I: titul) Las ultimas notizias derivan dals ons 1780 – 82 (duos fögls perfin dal 1787). Il cuolmen da sia arcugnuschtscha publica ha'l raggiunt ün on plü tard, cur ch'el es gnü tschernü sco capo da cumün.²¹ Davo quai svanisch a l'autur chi ha «memorizà» uschè bler aint illa s-chürdüm da

¹⁷ Pervia da quai la parantesa intuorn l'on 1775 nel titul dal «Chiantun verd».

¹⁸ In quel connex ha'l scrit ün oter cudesch, il «Chiantun dret de 90 Plans inverdi» (II: 672). Ils plans detaglats dals bains familiars aint illa prüma part dal seguond tom derivaran da quel.

¹⁹ Dal 1777 disch el dad esser stat mess dal mastral fiscal, dal 1778 burser (I: 375). Il seguond as poja controllar, quai correspuonda a la realtà (archiv cumünal da Ftan, C 15 / 5). Johann Andreas v. Sprecher ha cret, ch'el nun haja gnü ingüens uffizis – per el üna cumprova da plü pel «esser curius» («wunderliches Wesen») da Martin P. Schmid (Kulturgeschichte..., op. cit., p. 268, ann. 8). Forsa nun es quai listess na fallà: Peider Lansel chi'd es nat be quarant'ons davo la mort dal cronist dschaiva, ch'el saja stat cuntschaint per sias extravaganzas in tuot Engiadina Bassa (amiaivla comunicaziun da sar Töna Schmidt).

²⁰ Vair la glista da commembers pro Willi Dolf, Die ökonomisch-patriotische Bewegung in Bünden, Aarau 1943, p. 100 sgg. El laiva acquistar ils privilegis da stampa pro quista società, mo tschantscha al futur (I: V).

²¹ Archiv cumünal da Ftan, C 15 / 3; vair eir Andrea Schorta, Tschantamaints d'Engiadina Bassa – Die Dorfordnungen des Unterengadins. Rechtsquellen des Kantons Graubünden, Serie B, Band 1, Chur 1965, p. 354.

l'istorgia. Be da temp in temp as doda amo alchet dad el.²² Mort è'l als 11 october 1821 sco giuven vegl da 77 ons.²³ Sch'el ha scrit amo plüs toms davo quels duos da sia cronica, sco ch'el ha annunzià dal 1777 (II: 672), nu m'es cuntshaint.

Il «Chiantun verd» es caracterisà dad ün contrast da uorden e dischuorden. A verer dad oura nan es quai ün uorden stupend: Mincha pagina ha ün listess ur culuri e lavurà cun pissier, la scrittüra resta adüna listess clera e bella ed aint ils disegns²⁴ – da quels esa ter blers – s'exprima üna preferenza per fuormas militaras-geometricas. Mo il text nun ha a prüma vista üna logica generala. Be cul temp chatta il lectur las differentas lingias, chi van tras il cudesch: la prouva d'üna istorgia da famiglia cun cuorts artichels sur da singuls perdavants e paraints; in connex cun quai la copcha da documainta familiara (in uorden cronologic); la descripziun da bainquantas schlattas, pustüt nöblas; e tanteraint adüna darcheu raquints ed observaziuns our dal preschaint ed il minchadi, in prüma lingia in temps da grond' actività sociala (visitas, nozzas, fairas).²⁵ Cul temp ha il cronist sviluppà eir aint il text ün stil bod geometric, cun quai ch'el metta a lö da tuotta sorts cuntgnüts in pitschens chaschuots, in «paragraphs» stricts. Il plü casual am para però seis möd da sriver, chi'd es minchatant (na adüna) uschè cumplichà ed uschè associativ, chi fa fadia da til incleger.

Seis güdicat sur d'evenimaints e sur da persunas ha ün character armonisont, quai as muossa fingià pro seis «onurar» sainza fin da tuot la gliend cun tituls reals ed eir inventats (vair sia «titologia» I: 525). Be in pacs lös rumpa'l quist' armonia cun ün per remarchas agressivas o

²² El ha scrit la glista da perdita cha Ftan ha gnü pro las invasiuns a la fin dal tschientiner; eir el d'eira pertoc (Andrea Vital, Ftan e l'invasiun austriaca-francesa da 1798, 1799, 1800; Chalender Ladin, annada 23, 1933, p. 53 sgg). Magister Rösch til manzuna plü tard – darcheu aint illa sumbriva da seis cusdrin (Fortsetzung der Nachträge über das Unter-Engadin; in: Der neue Sammler, 3. Jahrgang, 1807, p. 41).

²³ Uffizi da stadi civil da Ftan, cudesch da baselgia, C 15 / 7.

²⁴ Ün pèr da quels sun da gronda valor, pustüt il plan da Ftan (I: 453) ed ils disegns da la lavur da paura (II: 19, 30), chi muossan ch'el d'eira ün bun observatur. Ils plans da bal a la fin dal prüm tom sun uschè bain fats, cha la «Studiengruppe für historischen Tanz» da Turich tils douvra per rapreschantaziuns da sots vegls (p. ex. als 15 gün 1980 a Grüningen).

²⁵ Per ün' enumeraziun plü detagliada dals differentes temas aint il prüm tom (mo neir ella cumpletta) vair Rudolf Jenny, Handschriften aus Privatbesitz im Staatsarchiv Graubünden, Chur 1974, p. 630 sgg.

tristas. Minchatant dvainta quist' idealisaziun bod paradoxa, p. ex. cur ch'el pretenda, cha «la politica dels fittadins saimper mira(nd) uschè dalöng da volair contentar lur patruns plü bain chi pon», e per demonstrar quista tesa ans quinta'l sco cha seis fittadins hajan refüsà cun üna «s-chüsa» da til dar sem furmoint per ün chomp (I: 180). Pro la lectüra as stoja sgrattar davent üna vernisch superficiala e's laschar pustüt sün descripziuns da fats concrets.

Da las jadas s'haja eir l'impreschiun cha quai ch'el descriva sco evenimaint exteriur, capita plüchöntschi aint in seis cheu, in prüma lingia scha quai reguarda directamaing sia persuna. Sia grond' amur ans preschainta'l p. ex. adüna darcheu sco sia spusa, schabain ch'el nun ha gnanca tschüf üna resposta sün sia dumonda matrimoniala (I: 1111).

Adonta da (o per part güsta pervi da) quistas particularitats es il «Chiantun verd» da gronda valor istorica. I nun exista üna funtana per quist temp e quista regiun chi'ns descriviss la vita sociala aint ils cumüns in ün möd uschè concret. I's po propcha – sco cha l'autur scriva – imprender landroura «la situatiun del temp, ils meurs, modas, stylos et üsanças de nos paias» (I: 1090). Sco etnograf e'l ün toc plü interessant co la litteratura da viadi contemporana pervi da quai ch'el nu descriva la società be da dadoura. A sia situaziun da classa sco «gentilhom» vaina fingià rendü attent. Mo vivond in ün cumün stret nu po'l surverer neir ils paurs e la vita populara.²⁶

Lavur cumüna a Ftan (29 lügl 1773)²⁷

La lavur cumüna ha gnü per las cumünanzas paurilas in Engiadina Bassa üna ter gronda importanza. Ils tschantamaints ans dan blers detagls

²⁶ Üna scena tipica es p. ex. üna gita süllas alps da Ftan, dingionder ch'el observa da suringì il far cul fain dals paurs cul «speiel de campagne» e descriva quai in plets entusiastics (I: 308). Da las parts istoricas da sia ouvra esa pustüt da dar bada a sias copchas dad «originals», ch'el disch d'avair scrit giò «da pled in pled» (I: 258). Per quels chi's po controllar cun otra documainta, tuorna quai (p. ex. ils luamaints in I: 714, 813 ed archiv cumünal da Ftan, C 15 / 3; la dumonda da schelpcha dal 1773 in I: 169, 283 ed archiv cumünal da Ftan, I B Fasch. 5).

²⁷ Martin P. Schmid, Chiantun verd in chronographia rhetica..., Staatsarchiv Graubünden, A 722, p. 275 – 276. Eu nun ha segui seis möd fich inconsequaint da dovrar majusclas; minchatant n'haja eir ris-chà da far alch correcturas pro l'interpuncziun, e pro'l scriver ourdglioter da plets (el scriva bler insembel).

dal funcziunamaint giuridic da quistas instituziuns, mo da la cultura da lavur nu dischan inguotta. Precis ils muossavias sün quist context social am paran dad esser l'important vi dal text seguaint da nos cronist. Cumanzar cumainza'l cun la lingua raffinada dals sains da cumün.

Tras il ir à commün non vaina inclet auter co far sunnar 3 jadas il sain grond sulet, et il sain il plü pitschen davo, et in quellas trais jadas observand trais intervals distincts cun sunnar il dit sain grand de commün, chi fuos tant co 9 jadas uschea, la 1^a vouta sunnar significhiescha il avertissamaint dad ir à commün, sea ün, 2 oder tuots 3 tersals, ils intervals dels sains ils distinguant, schabain eir la veillie il maschialg de commün avertescha você cun sbrair pro tuots ils cantuns delas chiasas; il 2. sunnar vain de commün significhiescha l'assemblé et gnir insembel dels vaschins de commün sün publica plaza, chi provis cun pallas, chi cun zappas, chi cun sgürs, et quai üna persuna per chiasa per l'ordinarj reservand ils cas particulars, oder toutas las vuschs de toutas las chiasas, de tout il commün, oder bè ün tersal. Il 3^{vel} sunnar il dit grand sain de commün in trais distinctas repausas et dopo il sain pitschen significhiescha, chia tuots sa stuon rechiater redunats insembel, acio chia ingiün non esa exempt d'excusa, non s'rechiatand a lur devair, et gmand chiastià vigur legè da commün dels cuvits, ils quals nombren exactamaing la dita lieut per cognoscher lur exactituda, ils condüisand dopo in order ils sig^{rs} cuvits à la tête, fin sül terrain ingio dessen far las lavurs et reparatiuns delas stradas de commün, ils sig^{rs} cuvits aviand l'commando et autoritat plenipotentiaara dels far lavur et chiastiar ils chiastörs, s'laschen per auter persuader per non vclair passar per crudels et barbars inversa lur sujets, et particularmaing aviand il dit commando sur üna compagnia da bellas femnas, ils sig^{rs} cuvits per l'ordinarj essendo eir mats juvenes, et postüt schi vezen eir quà la presentia da lur marusas, et uschea vegnen las grondas fureurs et emportamaints inpa moderats tras spür respect et decentia, et tuots lavurand il main chi pon, raramaing chi fan oura il di inter pro ditas lavurs commünavlas, spartind per l'ordinarj davo pischain our del commün, cioè suainter il ir à commün, et in certas occasiuns non vaina admis femnas oder persunas fick juvnetas mo homens robusts et fermes per podair star conter alla lavur, schal'es düra et penibla, mo in ir à commün à scrappar las veas et paschs, chi vain fat in temp da prümavaira à minchonn, es tuot sufficiaint. Per auter il ir à commün davo serraduors es fatigant, be in gualivar ün pa las rouderas

dels tralliuns, chi ordinariamaing dvainten chiaforgias et auals d'ün onn à l'auter, dala gronda quantità d'auas chi culen davò las ditas veas gio, causa las grondas naiveras crudadas sün nos auts munts interamaing cuverts in temp d'jviern da naiv, in temp d'esta gnand alguada oura; pro ditas reparatiuns l'honnur del command appartegna directamaing als 4 sig^{rs} cuvits, impero subordinats al commando superiur dels 4 sig^{rs} da redschamaint et cheu d'commün, ils cuvits non sun obligats à lavurar, et non porten auters instrumaints in ditas occasiuns co la ciana,²⁸ et dopo livra la lavur, returnand à chia van à baiver üna da compagnia in lusterea sün chiamp dit de cuvits, impero srechiatand qualchia d'ün plü experimentà co'ls cuvits sves in ir à commün, müraders, maisters etc., per dessinar gio alg reparatiun, oder lavur nouva, in allignar et far las veas drettas, et per dar alg bon consail lapro, schi'ls vaina conces l'honnur de lur part, il command à l'hura gnand commün et general sco quaj chia la lavur es commüna et generala, ils parais dels vegls saimper la preferentia.

La faira d'Ardez (21 settember 1773)²⁹

Da las veglias fairas in Engiadina Bassa as saja fich pac. Ils protocols da la dieta sun bod ils unics documaints chi tillas manzunan da temp in temp. La seguonda mità dal 18avel tschientiner – quai as poja imprendder da quists protocols – las fairas da nossa vallada han gnü üna conjunctura favuravla: lur numer ha augmentà sten ferm.³⁰

Martin P. Schmid d'eira ün amatur da las fairas e nu manchantaiva bod ingüna. Quella dad Ardez ha'l descrit in ün text plü lung. Lung per differentas radschuns. Prüma l'autur fa vaira blers excurs (üna part da quels laschaina davent). Seguonda d'eira'l sves preschaint a la faira (quai chi nu

²⁸ Bastun sco segn d'autorità d'uffizi (Dicziunari Rumantsch Grischun, tom 3, p. 272).

²⁹ Martin P. Schmid, Chiantun verd in chronographia rhetica..., Staatsarchiv Graubünden, A 772, p. 468 – 478.

³⁰ Fin aint ils ons 1760 existivan probabelmaing be quatter fairas in Engiadina Bassa, intuorn 1800 d'eiran quai fingià ündesch (Jon Mathieu, Eine Region am Rand: das Unterengadin 1650 – 1800. Studien zur Ökonomie, unpubl. Lizentiatsarbeit an der Universität Bern 1980, p. 434 sg).

d'eira il cas pro la lavur cumüna e neir pro la part da lavur da las bacharias). Lura la faira es ün lö ingio chi s'inscuntra glied, ingio chi's fuorman relazioni socialas – occasiuns per nos cronist per «memorizar» noms.

Id es propcha da star stut quant pac chi vain discurrü in seguit da l'economia. Schabain chi s'ha da considerar la perspectiva da l'autur (chi nu vaiva ni da vender ni da cumprar muvel), nun es quai dal tuot fallà: Las fairas valladras da quel temp nu vaivan tant pais economic.³¹ I's produiva daplü gran quella jada e main muvel co plü tard.

Il di da la faira a bunura nos cronist munta a chavagl (el til vaiva imprastà ouravant) e va a Giarsun per far üna visita a paraints da la vart da sia quinada. Per via inscuntra'l fingià blers hommens dels honorats cummüns di Guarda, Lavin, Susch et Cernez sco eir d'Engadine alta, üna part cun s. h. muvel et auters gnüts per cumprar sü s. h. bestiam in la faira di Ardez. Davo la visita til tira eir ad el da quellas varts...

Arrivâ uschè in il pra dela faire vers mez dj, dopô chia'ls sunnaders cun la brillanta juventüm del dit honorat cummün di Ardez suainter il solit d'iminch'on, aveiva fat lur turnèe in il prà de la faira cun sunnar la gia, primieramaing naj toccâ man Bartholomè Singer de Lavin, chi eira bè gnü our de Francia in livree de domestic de scharlata galonada sün las cutüras cun galons d'camelor à peu pres sco quels dels tambours suot il regiment grison de Salis in Francia, il qual naj eug tgnü ingageà anno 1766 suot la compagnie de Stapanj de Sent, dopo seis temp de suda fini, es el stat servitur suot il multo illustrissem et nobillissem signor capitanej et chevalier Jachien de Saluz de Lavin estimissem, il qual avant co gnir in semester l'anno passâ l'a'l cedü al multo illustrissem et nobillissem signor capitanej de Latur dela Ligue Grisa, 'm aviand quintâ il dit Singer, ün bel et brav juven, ch'essendo seis patrün gnü in semestre fingia et natüralmaing per rapport de sa chere madame epouse, essendo maridâ avant 4 anns incirca cun üna Scarpatetina, sco eir il multo illustrissem et nobillissem signor capitanej Michel de Sevis maridâ l'ann passâ à Majenfeld cun üna Gasnarina sch'eug non'm fall, bella juvna et richia femna, es eir gnü ün pa

³¹ Martin P. Schmid scriva ch'a la faira da Scuol dal 1773 sian gnüts vendüts be quatter armaints (I: 509). El ha dudi quai dal ravarenda Peider Dumeng Rosius à Porta il vegl (chi d'eira il vendader da tuots quatter tocs). Eir scha quai sarà exagerà ed eir scha l'on d'eira nosch in general (predschs ots), po quai servir sco exaimpel ün pa dramatic.

plü bot per avair l'honnur de far sa cuort à madame sa chere epouse, 'm quintand eir chia l'multo illustrissem et nobillissem signor capitanj et chevalier de S^t Louis de Cavietzel de Paspels grison, sea maridâ quista estâ in Longwy la garnison, aviand tgnü l'honnur d'epousar mademoiselle de Crepin multo estimatissima, illustrissima et nobillissima filgia del monsieur major de place de la dita cita, [...] et finalmaing aviand dumandâ al Singer scha'l stess löng in Engadina, ch'el sea solum tras buna permissiun de seis patrun per 10 ou 12 dits à vera las fairas et salüdar seis paraints in Susch et Lavin, 'm aviand eir dit chia dels nos d'Engiadina non sea gnü fin al presaint in semestre con ün sulet cioè Nicolas Corv de Ramuosch, ün bel juven grand et bain fat et bun soldat, il qual naj dalungâ tscherchiâ per il tocar man, essendo eug seis lieutenant suot la compagnie Balthasar de Saluz de Fettan, per il dumondar scha meis sclopet nouv, giberne et büfterie fuossen in bun gubern, non ils aviand podü metter in meis coffer, 'ls laschand uschè in seis mans [...].

Non solum svezeiva in il pra de la faire del honorat cummün dj Ardez blers eisters dels cumüns d'Engadina alta et bassa, et sudada francesa chi an servj suot nos regiment, sco p.e. s^r Burtel Gras de Lavin, stat cadet, il qual'ma fat l'honnur de'm salüdar, et volair condüir in la chia dels sunaders della honorata juventüm bè spèr il pra dela faira, et reserveg quella honnur fin dopo jantar, Andreia Nuot Bastian de Fettan, chi es dopo gnü del regiment eir cun seis congè militarj sco'ls auters ch'eug sves naj tgnü l'honnur de'ls scriver, es maridâ in Engadina alta, et habitescha in Zuoz; s^r anvolt Steiven Nicolaj de Fettan, chi es marida avant trais onns; Raduolf Peer, chi es marida quista prümavaira, essendo gnü l'onn passâ in semester; s^r Peider Burchiart de Saluz; s^r Andrea Balsler Bina de Fettan sco eir blers auters plüs dels cumüns: dimpersaj eir blera sudada hollandaisa chi an servi suot il laudabel regiment grison, colonel Frideric Schmid von Grüneg de Malanz, general major delas trupas armeas de las 17 Provincias unidas in il pajais bas dit Hollande, sco eir ün chi a servj suot la guardia schwizra in la residentia et capitala del Hague, nominâ Jon de Latuor Sechia de Fettan (chi es amo ün pa paraint à regard dela descendencia dela branche Secky de ml Dumeng Secky, chi eira frar de ma chiara tatta mastralessa Algiona Andriella de Fettan [...]) chi per far il verben sudada per la compagnia del signor Salis del Gebeu de Coire et signor Planta de Zuoz, amo ün pa paraint à causa ün de lur veilgs spusâ

üna delas filgias del guvernatur Travers de Scanff, sco quaj ch'el a saimper recrutà à minch' onn, l'jviern stand à chiasa in Fettan et l'esta pro'l regiment in Hollande, spaziseiva cun ün bellissem hom, bain fat, spadlü quaremaing sco'n uors, et tuot vestj à verd, forsa chi eira ün seis paraint dela vart de sa duonna causa ch'el es ün Bretigueur.³² Et la faire tant di Ardez co dj Scuol es stata magnifica et grandamaing ornada de lieut eistra, et bleras persunas in uniforms militaris de sudada, per fin sudada del chiasstê de Tarasp, propremaing mis, alla austriacha, cun giabanas fick cuortas, plü cuortas co l'uniforme del raj de Prussia, tuot de pon alb, bain putzchia blanchi, sco chi fuossen stats pro'l regiment sves in il plü grand entretien de propertat et netaschia d'habilliamaint, sco quai chi es il solit suot tuots ils regiments regulars et bain disciplinats tant d'infanterie co de cavalerie, 'm aviand ils antedits sudats frances eir dit, chia la garnison de Mez sia fick brillante, il regiment de Navarre infanterie sea amo quà in garnison, et particularmaing bellissem regiments de cavalerie, mo non m'an savü de'm dir ils noms; eir in quistas faires eiren blers s. h. chevaux, chi schgnüigniven joigneusamaing, et causa chi es à mez il pra ün aual moragen vel palüaint, las pouvras bestias gians surj vea et sir y nan libers dela temma d'esser fondats chiafuol in l'aua, eiren tantüna frisks, sans et schgnüignans tant co refraischits et lavats ils peis de l'aua ammuraivelmaing per rhetoricar bain uscheâ: ma l'incontra il s. h. muvel bovil, et principalmaing ils s. h. boufs, giascheiven sü'l tships vel gason verd, de granda stanglantüm, chj es natüral aviand stovü touta esta lavurar, et particularmaing il ultim mais stovü lavurar dj et not oder cun arar oder cun manar fain menü gio dels auts munts cun'ls tiralgiums, et rasdivs dela prada grassa cun chiarra, oder cun las granezas, oder cun arar ils chiamps cu'l fargun (cun la flianna et quadrea s'arra bè la prüma vaira à semnar ils hüerdis) et erpchiar ils seiels et furmains; quaj chj es fick remarcabel in la faira dj Ardez, ch'aviand per l'ordinarj grands s. h. boufvs de pumpa, fan granda parada il dj de faire cun quels, ils fand purtar grondas brunsinas, tallocks et somchspoins³³ per il pra de la faira intuorn, ün vuliand avoir l'honneur d'avair ün plü bel bouv co l'auter, imperò quist anno a tgnü quella honnur ün vaschin de nos honorat cummün de Fettan cioè s^f Filla de Schucanj demeurand in Guarda, a ün bellis-

³² La duonna da Jon de Latur Sechia derivaiva da Jenins.

³³ Zampuogns.

sem bouv grand bain fat cun bellas cornas d'ün bel pail alb grischaint sainza üne suletta tache d'autras colurs, naj vis eir ün bel bouv quel dj d'üna colur brünaunta cun rais vel sriblas nairas et cotschnas ondantatas colur de maron. NB. per non invlidar quista remarca militaria dels s.h. chevaux, il cheval es d'üne voluntat et valor incrojabla, ün escadron de cavalerie animada in feu et furia fa ün effet irresistibel; zappland els sves cu'ls peis l'jnemj de rapchia.

Per non esser reprochâ de ma cuinada Nuota et chier frar, de non ils avoir manâ inguota de faira, naj priè s^r Jachen Padruot Rosio von Porta de Fettan, de portar nan per alg pluetzchiers d'buna maila et paira et brümlas sco quaj ch'el a tgnü eir la buntat de purtar in chiasa mea acuratamaing, 'l essendo fick obligiâ et naj cumprâ eir per maj sves, et mangiâ excellentissima paira, creschüda in il Tirol, et quist ann stat bler plü pomaraida co'ls auters anns, l'ann passâ non essendo stat quasi ingüns cromers del Tirol,³⁴ gnand tuots ils früts et pomaraidas sü del Tirol, sco eir aint de Partens, mo la plü part in temp d'jviern cun schlitras per rapport dela buna vea planiva dela naiv ch'ün po passar sur cuelmens, ch'in temp d'estâ non es y possibel à regard delas nau-schas sendas, stuviant transportar aint de Davo et Partens cun chevaux de sama, sco quaj chj sun stats fingia in Fettan il dj de nossa faira avant quella di Ardez, cun pomaraida et perfin chioresas secas nairas et cotschnas, las vendand ün ster combel per dua stera d'seiel rasa, et tuot chj a gient cumprâ, essendo l'ann passâ non sun stat ingiünas chioresas quasi, non solum in Bretigeu mo eir in autras provincias plü domeistas, essendo gnüdas praginadas in temp chia la boschia eira in flur, sco quaj chj vain per l'ordinarj à minchonn praginas pac ô bler, et sch'y ma non fuos stat pragina gnis al main mez ô $\frac{2}{3}$ de plüs früts l'onn, causa üna part pac ô bler dela flur dela boschia a aminch'ann crudâ, et Dieu völg'El eir preservar de dons et disgratias per rapport dels früts, mo benedir et far creschar in abundantia â nüz, utilitat et bain star dels patrons cultivaturs et lavuradurs, in bun uso et döver del prossem et public cummün. In temp de faira es il plü grand dalet per ils uffants, vegnen de tuots ils cummüns per comprar et mangiar paira et maila, et per quaj naj dat eir eug alg pluetzchiers al filg de Dumeng Nuot-

³⁴ Al cumanzamaint dals ons 1770 regnaiva üna terribla crisa agrara in bod tuot l'Europa.

demen de Fettan, nominâ Jon Stappan Nuotdamen, à regard ch'ün de lur paraints es stat maridâ cun üna Stappanj dj Ardez vel Sent, chj es ün bel, frisch et galliard uffantet: promenand uschea sü'l pra dela [faira] in conversatiun cun'l multo illuster et nobel signor capitanej Vidal Seckj de Fettan, pensiunâ del regiment grison Schvarz de Coire al srvezen de sa majesta il raj de Sardigne et Piemont, 'l dumandand scha'l vol gnir à jantar in mea compagnie, non pudiand avoir l'honnur, ch'el fuos retenü vel convenü à jantar cun üna bain ampla compagnie assemblada vel congregada insembel in l'ustarea de Chianova, non'm aviand in vardat mentiunâ ingiün par nom, et causa mea curiositat es sainza fard, non aviand savü lur noms non nai podü honorar à meis stylo cun scriver quels, et ingiavinar non saj eug. Sun bleras persunas, ch'eug sun obligiâ d'interlaschar à memorizar, per rapport ch'eug non sa adüna lur noms. Naj recepü grondas politezas tant in la faire dj Ardez co in quella de Scuol, genéralmaing dels honorats vaschins dels dits duos honorats cummüns sco eir dels eisters et eistras dels auters cummüns per fin dels Tirolers, vuliand bain tard dopo la faire trata gio montar à cheval per gnir à l'ustarea à jantar, stante Tirolers-bels hommens qua spera, vuleiven per lur buna buntat tgnair polimaing il frain et la staffa del s. h. cheval, naj eir tgnü l'honnur de'ls ingratzchiar polimaing, et de'ls dir in buna civiltat sincermaing, chi non s'dessen dar tanta fadea et molestia, chi eira ün lur bun effet courdialmaing, et chi'm permetten la libertat de montar militarmaing, chi es eir plü nobel, 'ls aviand fat grand plaschair quel s. h. cheval, et dscheiven, der ist bey meinem Lieb charmant! chi es üne expressiun alla tirolese. Accablâ in buna vardat et effectivamaing de bun cour, bain vis, estimâ et respectâ de buna buntat generalmaing et particularmaing; chi es ün seng de buna ammur, ils paraints sves gnüts sü'l pra dela faira à'm toccar man et salüdar, et perfin ma jumfra neza Anna Saluz Dutschessa, 'm fand l'honnur d'invitar in chiasa sea à jantar, mo naj tgnü l'honnur de l'ingratziar infinitamaing, in l'istes temp recomandâ de salüdar instantamaing de parte mea à seis chier bap s^r m^l Steiven Dutschessa meis estimatisssem s^r barba et cumpar, à sea d^a dunanda maestralessa Uorschla Padrotsch Dutschessa nada Andriella de Fettan et à ma figlioulla Uorschla Bart Dutschessa chi es bella et bain gronda, mo sa sour Anna Saluz es creschüda, bella, civile, virtuusa et gentillette, et in etat de s'maridar, la giavüschand buna furtüna, benedictiun, bain star et perfeta sandat.

Avant co rivar in Ardez à la faire naj tgnü l'honnur de tocar man et salüdar il multo illuster et nobel signor reverendo Cla de Stopanj di Ardez, sco eir de giavüschar il bun dj al multo illuster et nobel signor mastral Dumeng Jachen Rosio von Porta de Fettan, chi es seis sör, el preidgiand à Davos zur Frauenkirch, sco eir avant de gnir our del pra dela faire naj tgnü l'honnur de salüdar al multo illuster et nobel signor reverendo Schimun Benedictus de Tschlin, chi preidgia in Guarda et Jarsun, sco eir al multo illuster et nobel signor reverendo Jon Könz chi preidgia in Saminiaun, filg del multo illuster et nobel signor reverendo preses Jachen Könz dj Ardez³⁵: et uschè sun eug arrivâ in l'ustarea del multo illuster et nobel signor Bart Jon de Stapanj dj Ardez, chi a spusâ avant alg anns duonna Uorschla Men Binna de Fettan, la qualla' ns aviand preperâ et accomodâ ün bunissem jantar, naj tgnü l'honnur de jantar agreabelmaing in la compagnie del multo illuster et nobel signor reverendo Jon Men Binna de Fettan, s^r anvolt Jon de Pola à Porta de Fettan, s^r Anvolt Men Luot Binna de Fettan, meis s^r cumpar anvolt Peider Gries Vuelpj de Fettan, s^r Nuot Könz de Guarda et Dumeng Mengiarda dj Ardez, et nos plü grand discuors a conversâ supra il bun vin et vinars de la Valtelina, ils üns dschand chia'l pretsch del vin sara melgier quist ann à regard dela bella apparance delas vignas et öas, auters dschand chia'ls signors non venden lur vin veider co al pretsch ordinarj fin chi non sean sgürats de remplir lur buots et buschins cun bun vin nov spetand de dj in dj üna abondanta vindemia, auters dschand scha no eir augmantand il pretsch de nos chiaschöl et tschigrun chi no per solito aminch' ann trafichain et bäratain cu'ls Valtlinaschs per tant vin et vinars, schi quatras la povra lieut non mangieran ingiün vin et non bavaran ingiün chiaschöl et tschigrun,³⁶ et chi baiva il melgier vin? quels chi an et chi pon! ecco la raschun! et eug eir dscheg almain schi non crescha vin in nossa Engiadina schi avaino buns schlers fraischs et melgierrs co in Valtelina per il podair plü bain conservar, et effectivamaing il vin de Valtelina plü velg ch'el vain s'forma et s'melliorescha deplü in plü, à tal chia la Valtelina es ün

³⁵ I nun es per cas ch'el ha vis uschè blers ravarendas: Quels giaivan bler e jent a las fairas. Intuorn 1780 vaiva gnü lö perfin il colloqui da Sur Tasna a la faira d'Ardez, quai chi nu para dad esser stat güsta favuraivel per la punctualità e disciplina dals ministers (Synodal- und Kirchenratsarchiv, Protokoll des Unterengadiner Kolloquiums 1645 – 1856, A 22, p. 68 – 72).

³⁶ Forsa ün sbagl, forsa ün paradox vulgü.

bun pajais pudiand furnir in anns d'abondantia bler bun vin de bleras varts, et ün vin fick estimâ causa ch'el s'conserva in chie climat et pajais del'Europa, sco quaj chia nossas Trais Ligues furneschen eir amichann in bleras provincias, bler s. h. muvel bovil, paing, chiaschöl et tschigrun. Donc per demonstratiun evidainta il lat essendo de creatiun plü antique et plü velg co'l vin es eir donc jüst per rapport de sa jüsta ancienetat, chia las prümas parts cioè las Trais Ligues, il Herrschaft et la Baronie d'Haldenstein, chi an uschè bellas fluors et öas rösinas co la Valteline, pudiand la belleza de lur wapnas s'egalisar in il grand ornamaint, sean ils chefs, superiurs, regents, plenipotentiaris de commandar üna part plü pitschna et dela creatiun del muond innan bler plü juvna, per rapport chia'l lat es la mamma nutrice vel bëlla de tuots ils uffants et crastians, et il vin es üne delice chi non po servir co als creschüts et bè ad üne part, lieu de grand plaschair et recreatiun amusante [...].

Sco chia in temp de faire ordinariamaing s'rechiata bler pövel redunâ insembel et quattras las ustareas interamaing remplidas da lieu, sco quaj chia eir la chiasa del multo illuster et nobel s^r Jon Bart de Stapanj di Ardez eira quel die 21 7^{bris} 1773, et la plü part m'aviand fat l'honnur de salüdar et tocar man, sco eir cun jantar sves gratiand il multo illuster et nobel signor mastral Jon Clalüna et m reverind à tabla, et eug aveg l'honnur del offrir üna zipla d'rost à mangiar et üna zena d'vin per baiver, sün chie s'adressand sper il multo illuster et nobel s^r Nuot Könz di Guarda, essendo nuder del dit honorat cummün et buns camarads, dschand, t'algordasch Herr Vetter, brueder, quantas ch'no vain bavü insembel del bun d'Valtelina! et l'auter, tü s^r Vetter, m^l Cla Lüna tschantschas sco ün minister ecclesiastic sves! certenamaing respond'el, il preidgiar d'ün fidel pastur es quist, creta, speranza, chiarita, et il volair, savair, podair, perchie nonesy la vardat chia tü brueder Könz, esch hoz gnü nan de Guarda à nossa faire in creta d'ir in l'ustarea et mangiar ün bun jantar, sün spranza de volair pajar sves, essendo saveivasch de podair eir paiar, siand rich et chiaritabel! et il reverendo Binna vuliand eir el explichiar tgnet per il plü flaivel, incleand tras chiaritat chia'l s^r m^l Jon Cla Lüna' ns vules far l'honnur à tuots de la tabla ad invidar à nozas de seis filg, per cultivar la bona amicitia, et scha barba Albert dj Tarasp chi baveiva sa coppa in ün chiantun non aves interrompü il discuors, cun dir, he bain! vo auters de Fettan! vo non'm laivet, cioè far far la pont d'Enn (tschantschâ cun

spiert) per podair passar et repassar libramaing sco del temp velg sainza temmas de risquas, sco chi es dvantà la disgratia quista prüma-vaira passadâ cun vos Chiasper Jon Binna Nuot Bastian de Fettan in quella terribla aua (Dieu völgâ preservar et perchüRAR ad ün et scodün de talas sorts privels, disfortünas et disgratias de malvantüraivlas auas de quella sört non giavüschadas tristas accidentias) causa vos bel pichon,³⁷ et scha la pont fuos statta fatta inandret non fuos stat ingiün exposâ à grands privels: schi aves il multo reverendo Binna fat à l'hura squasj üne preidgia d'ammur cun volair explichiar las positions charmantas del bun amj prepostas à l'honnur delas nozas; mo tuots sustgnand ils drets et libertats de nos honorat cummün de Fettan dscheiven, no non vulain brick schmerscher et metter à perdre nos ils plü bels boschs sur il cummün per far laina et manar gio pro la pont, no volain salvar per no nos bels böschs chi sun garnicoton, verds florizants et conservar nossa bella necessariamaing cioè per bun adöver, bun et honnet uso, et de la bain impuender virtuousamaing scha Dieu! che busdra! no saran bain no ils patruns! et per adusir ün pà il discuors animâ'm dschet s^r Clauot de Maurj de Scuol, bun amj! He! signor lieutenant Schmid! naj l'honnur de'l far inpringis cun üne zena d'vin? Ah! s'algordaivat! cur vo eiret gio Scuol à schola pro'l reverendo s^r Jachen Fet Rauch, quants spas et baffunarias insembel! co ch'eug s'feiva mangiar cerisas et baitslas gio dels boschs et in il hüert de s^r anvolt Josch à l'honnur! et la prüma vaira chie plaschair ch'no aveivan à tschüffar rampots in il Enn! et co chia nos buns baps et chiars baps eiran gronds amis, clomeiva adüna in chiasa à salüdar, et vo ma non sedegnaivet! et eug naj tgnü l'honnur del assüRAR ch'eug sea bunissem amj non solum dad el sves, de tuots ils de Scuol et auters cummüns, mo eir de tuotta lieut de bain, et specialmaing grand amj de tuotas las persunas chi entendent bain la noble raillerie, et essendo eir 4 auters signors pro la maisa pitschna vea d'vart cioe il multo illuster et nobel signor mastral Martin Rosio von Porta de Fettan, al qual aveiva tgnü l'honnur sü'l pra dela faire d'avertir scha'l vules gnir à jantar in mea compagnie? et es eir gnü in l'istessa usterea mo causa bleras fatschendas de marchiansea es el arrivà presaint ch'no eiran à tabla in quista conversatiun; seis neiv s^r Peider Jon Rosio von Porta de Fettan, et duos amis del honorat cummün de Luvins s^r Roman Andri, et ün stand sco ün giat in ün chiantun,

³⁷ Pionch.

in sandat sea signor lieutenant Schmid! vain dit ch'el sea ammaturo de la lectüre! si signor reveritissime! naj alg bels authurs de physice et geometrie, mo vuleiva dir trigonometrie! grands celebres inventurs tudaischs de scienschias! famus Wolfius Logarithmorum! et chie incleivet tras logarithmos meis bun amj? [...] Ils signors dela tabla'm laschand saimper l'honnur de far il tranchier-maitre dels buns trats à l'honnur de la nobla simetrie, et servind uschea cun ün bain assaisannâ rost d'agneu, per avoir in il istes temp eir l'honnur de podair continuar nos discours de part et outra, naj divisâ quel fin la coa et quella laschâ illaisa et tuota intera, à l'honnur de la buna cuschinunza duonna Uorschla Jon Bart de Stapanj dj Ardez, nada Binna de Fettan,³⁸ aviand tgnü eir l'honnur de baiver à sa sanda, et de l'offrir üna zena d'vin, ils auters giasts dumondand la duonna ustera per ils far purtar oura de baiver, dschet, chi ajen ün pa d'patientia, eug sto il prüm dar ün pa d'teta à meis chier uffantet: uschea bain bavü, bain mangiâ et abundantamaing jantâ, per non perder temp à gnir à chiasa d'not, aviand invidâ à jumfra Uorschla Jon Sechia filgia juvna de m' Jachen Könz Rosio von Porta de Fettan da gnir pro sunaders a vera la bella et honorata juventüm del honorat cummün dj Ardez, 'm dschet ch'ella s'lasches increscher de Fettan, et ch'ella völgia ir pro sa camarade ma jumfra neza Gretta Riet Sechia de Fettan, et gnir à chia da dj, giand dimena uschè à pè tras tuot il lung del cummün aint, tuot la lieut stand à plaz avant lur portas à regard del bellissem temp, passand spèr il palazi del signor commissari juncker Jon Planta de Wildenberg, naj udj à clamar il nom sig^r Schmid, et guardand de tuotas las varts non naj podü vera co l'aua del cörn culand splendidamaing in seis bülg, fand alg pas in avant naj tgnü l'honnur de toccar man à meis s^r barba Buolf Carl von Hochenbalchen, et à s^r Michel Carl von Hochenbalchen de Scuol sco eir à s^r Michel Carl von Hochenbalchen de Scuol sco eir à s^r Jon Pitschen Violand de Scuol, chj aveiva servi alg temp sco cadet suot nos regiment d'Salis Marschlins, chi gniven aint del pra dela faira, 'ls giavüschand uschea il bundj et sandat, sun eug arrivâ pro'ls sunnaders, condüi in chiasa in compagnie s^r Peider de Craista Rosio von Porta, del s^r cumpong juven de Stapanj frar juven de s^r Linard chi serva in Hollande et China, de s^r Jachen Könz del Palazin fand eir ustarea, pos dir in vardat la gronda honnur chia la dita

³⁸ Quist sto esser stat ün' allusiun tradiziunala, vair il text da las nozzas.

respectabla juventüm'm a fat, immediatè cessü lur trasschia per'm honorar, et aviand tgnü l'honnur de dumandar l'incomoditat à jumfra Nuota Filgia de m^l Not Prinz Giuelf à sutar trais danses et chi sauta bainissem virtuusa juvna, et per lur buntat reïtereiven, vive il signor lieutenant Schmid de Fettan! vive! et eir eug, vive la honorata juventüm dj Ardez! in compagnie de blers auters cumpongs dels auters cummüns eir chj eiren la presaints, et per non gnir à chiasa massa tard, naj tgnü l'honnur de remetter 12 crüzers à Moises de Lavin, bunissem sunader, et tgnü l'honnur eir in il istes temp de giavüschar il bun dj à l'intera estimatissima et virtuusa compagnie de juventüm del dit honorat cummün dj Ardez, returnand sulet tras tuot il lung del cumün aint a pè in l'ustarea pro'l qual essendo ün bülg, ingio essendo la duonna plavanessa del multo illuster et nobel signor reverendo Gulfin dj Ardez preneiva üna cröa d'aua dels cörns, naj tgnü l'honnur de la salüdar cun tras meis chiapè fand mea hümbra reverentia et decenta salutatiun.

Dopo avoir fat quint cun il signor uster, et paiâ eir per il flöder et fain dat al s. h. cheval, et bavü üna sü'l à dieu, insembel il Johannes Segen, in compagnie del multo illuster et nobel signor reverendo Jon Men Binna dj Fettan (chj es frar de la duonna Uorschla Jon Bart de Stapanj dj Ardez nada Bina de Fettan, aviand amo ün frar s^f Nuot d'Albert Men Binna, chi es cadet suot il laudabel regiment de Salis grison, in la compagnie del signor guvernatur Andrea de Stapanj de Sent, tuot ils Binna de Fettan generalmaing sun stats spiritus in l'arithmeticca, et quists sun particolarmaing, il reverendo ün bun et sublim predicatur, de capacita spiritusa et qualita fina, sun de natüra blondina et albs chi ordinariamaing es dotata de duns nobels et intelligents sive spiritus et qualifichiats) et signor multo illuster et nobel mastral Martin Rosio von Porta de Fettan persona estimabla, sun gnüts innan insembel à pè in forma de promenada, et eug dopo avoir dat il trinckgelt à lur fantschella Nuota Barguetta dj Fettan, et fat sellar et bridar il s. h. cheval'ls giavüschand la buna saira, sandat et prosperitat sco eir à lur vaschin il multo illuster et nobel signor ductor Ludwig dj Ardez chi eira là presaint, il qual il dj dopo la dumengia es stat in chiasa mea per vera co'l umfladüm de meis chiar frar sea, [...] ils Ludwigs dj Ardez an saimper versâ et cultivâ ils stüdis de medicina, seis propi bap eira uschè famus doctur ch'el aveiva fat batir fuorns expres per distilar bunas medicinas et apts buns urgents. Gnand uscheâ naj tgnü l'hon-

nur pro'l bülg grand à mez il cummün storschand in la vea triangularj à gnir à munt, de giavüschar la buna saira et infinitamaing salüdar al multo illuster et nobel signor mastral Peider Bonerandj de Lavin cun duos auters amis cun el, il qual a ün bellissem filg suot nos regiment de Salis grison cadet in la compagnie del multo illustrissem et nobillissem signor guvernatur et colonel Andrea de Stapanj de Sent paternaing consideratissem et estimatissem amj, grand uscheà in bun pas in temp bellissem et serainissem, scuntrand pro nos plan de la muostra oura som'pont de l'aual dels mulgins de Fettan eisters chi gniven cun lur s. h. muvel de faires, als quals aviand dumondâ ingionder chi sun? ün'm respondet ch'el fuos de Sent! et ils auters cun replichiar la seconde domanda, ingionder? de S. Merea,³⁹ et dscheiven forsa il davant davo non saviand co bain dir avuonda de bun cour per far honnur à lur chargè, il chie a fat plaschair ad els et eir grondissem plaschair à maj et ils naj giavüschà la buna saira et buna sandat et buna furtüna.

*Las bacharias (11 e 12 November 1773)*⁴⁰

Las bacharias in nossa regiun sun ün tema, chi'd es gnü trattà da differents auturs. Martin P. Schmid sarà stat il prüm: 150 ons avant co tschels s'ha'l occupà diversas jadas cun quista üsanza da lavur e da festa. Aint il text seguaint ans dà'l üna descripziun chi's pudess caracterisar sco vaira-maing etnografica perquai ch'el distingua differentas «modas da paiais».

Anno 1773 die 12 (S^t Martinus Pabst. et insaina del pesch 3 dits in domengia et hier) novembris à Fettan. Sco chi es il solit de far bechiarea per provisiun de chiasa, in temp d'utuon à l'ordinari, mezchiand primieramaing il muvel gras de saif cioè à quintar de las fairas, fin als ultims d'novembris, dand suainter plüs oder main eivnas de gras, et per ingraschantar d'daia al bestiam bovil, bun fain gras, rasdif, grut, e feuillias de jabus, et bren et sal, sco als porcs, bren, flus, ravitschas, scotta, lavadüras et lat sgrammà et intêr, fand quella bechiarea secon-damaing à l'ordinarj il plü n'il mais de decembris; uschè s'observa eir

³⁹ Forsa ün' allusiun a sia grond' amur Maria Stupan da Sent.

⁴⁰ Martin P. Schmid, Chiantun verd in chronographia rhetica..., Staatsarchiv Graubünden, A 722, p. 666.

l'insaina à mezchiar, et sco l'insaina del pesch renda la chiarn lomma, avain eir no fat bechiarea d'ün s. h. armaint bovil, aviand passâ 15 rüps, chiarn netta, 80 noudas saif, et a çustâ 38 renschs, et il cuost à l'ingra-schantar;⁴¹ s'mêzchiâ in tuota fuormâ, pichiâ sü cun tretschas per ils schnuoils davo sladand oura ils gialuns, spadlas et patrinas in tanta parada, co quaj chia'ls mêzchiar à Dresden suainter lur planet prove-deiven cun bunas chiarns alla sudada del raj de Prussia, à l'honneur de lur manövers, [...] in auters lous mêzchiand sulamaing ils mêzchiar da manster, et scodün cumprâ à proportiun chi an dabsön, et quaj chiarn fraischia, sainza insalar aint sco quia per provisiun de tuot onn, non aviand mêzchiareas commünas, mo particularas, scodün s'provedant, et chiasadas chi pon mêzchiar ün armaint gros l'onn, sun de las principalas, las 3 parts d'lieut la plü granda part del temp non insajand chiarn dadaint ils daints, essendo cuosta bler,⁴² per far salsitz, liongias, murtadellas et anduotchiels, s'faia provisiun de spezchiareas et sal, fand spaiz et jüzar ils curtès et maneras de stalgiar et zappar, ant dj il cop, tour il sang et tour gio las uralgias et ils gnifos et lura tant ils mez-chiers co las lavunzas baiven vinars et maingien bellas rasdüras oder fuatschas, fattas à posta per quaj, tuots ils vaschins et amis grand à vera, schi sun bels gras, dschand, cun bain mangiat cun sanda! Huoi schi s'adegnaj à tour ün zanin d'vinars! Dopo bain bavü vinars per non esser expostas al fraj, schorchen gio'l chiör, brüen gio'ls peis, et tschanfletschs, pilgien gio'l saif del butatsch et laven la bölgia, per far aint liongias cun la stilgia, et la grossa salsiz et il fundal scunflâ sü per far plains in bölg, et la bölgia restante per la conservar sü vain eir scufflâ sü et sechiada, à tal chia'l bler vinars chi vain consümâ ladaman, il pischain chi consistâ à l'ordinarij our da 3 plats, tschoppa cun farina, lgirom ustrj et sang cun maila et baccuns d'pan, la cur-schina davo mêz dj cun vin, la tschaina be buna manestra, kraut et chiarn fraischia, et il vinars avant co ir à dormir, las tschiörladas als amis, paraints, vaschins et à quels chi jüden mezchiar, chi es la paie fixada, il insallar aint la chiarn, et il dj sequent clear oura las cuderas

⁴¹ Pel solit la bacharia d'eira üna chosa chasana, e na integrada aint il marchâ; na uschea pro'ls Schmids chi stuvaivan cumprar il bouv (I: 609), perquai la valütaziun in munaida.

⁴² Quist es üna pretaisa exagerada, chi til serva per metter in üna glüm speciala lur aigna bacharia. Charn d'eira üna nudritüra vaira derasada, eir scha natüralmaing na distribuida egualmaing (Jon Mathieu, *Eine Region...*, op. cit., p. 280 sg.).

(NB. quist s. h. armaint a tgnü üna specie da cudera plü gronda co ün poing, sco quaj chia avant alg onns in üna s. h. mueia, cumprada de Gi Nuota Tunna vain chiatà in la bölgia üna culla sco quaj chi schiatta in ils chiamuotschs dels plü sulvadis) our del saif, zappar il saif, et far grafflanas, sco quaj ch'no avain hoz fat et culà il saif aviand dat d'insaia à tuots ils vaschins et paraints, grafflanas chiaudas, à la moda. Els eir honnorand et tschnà in chiasa abundantamaing con vin laprô, tuots quels chi an jüdà mezchiar cioe barba Balser Rosio von Porta, seas duas filgias Barbla et Uorschla üna duonna gravida et abiadi Uorschla Sechia, nos mêrs, et s^r Schimun Curadin Rosio von Porta; es üna moda fick chiara et custavla et tuot quaj cuosta plü co $\frac{1}{4}$ vel $\frac{1}{3}$ del armaint ch'ün fa bechiarea, et causand blera fadea, aviand plü co 2 dits grondas struotzchias, et tour our d'SAL-lamuoira⁴³ et metter à füm: non obstant essendo stat eug à la chiatscha, causa il bun temp, ils chians aviand chiatschâ merveilliusamaing, abain las chiavras giand à pasch confuonden las passivas delas leivras 'm sun divertj rojalmaing à l'honnûr de meis soinch S^t Martin, sco chi es à la moda in auters paiais, à quia non vaina usità uschea. Mo aminchia paiais a sa moda!

Nozzas (1. december 1773)⁴⁴

Trais eivnas plü tard: Nos cronist es invidà a nozzas e'ns dà ün rapport fich detaglià da quist evenimaint. Ed ün evenimaint sun las nozzas in üna società paurila. Quai nu's tratta be da copular duos persunas, dimpersè id es da maridar duos chasadas, la gliend ed il fuond. I's badarà in legiond il text seguaint cha'l pêrin sco tal nun es vairamaing aint il center da las ceremonias Important es il festagiar insembl da las parantellas ed il tour sü da la spusa aint illa chasa dal spus. Quista «müdata» para dad esser quai chi structurescha las differentas üsanzas culturalmaing fich elavuradas da las nozzas: ün'eivna avant splüdir, lura invidar a nozzas, la vielgia üna tschaina «sco nozzas», ün grond pischain avant baselgia, cusir sü ils cranzs – tuot quai ha lö pro la spusa. Davo baselgia as vaja lura via pro'l spus, i's giainta, fa plets, dà da la lengua, i's tschaina. Uossa las nozzas in il sen stret

⁴³ Cun quist möd da scriver voul el exprimer sia idea d'etimologia.

⁴⁴ Martin P. Schmid, Chiantun verd in chronographia rhetica..., Staatsarchiv Graubünden, A 722, p. 721 – 727.

sun glivradas (plü tard as scusa amo giò ils cranzs in chasa dal spus). Il bal chi vain davo es pustüt roba da la giuventüm eir scha'ls nozzadurs til han organisà: El ha lö in differentas chasas...

Magnifica celebratiun del aut laudabel et honorabel stadj del soinch matrimunj à l'honnur de la degna, honorabla et chasta copulatiun nuptialla, celebratiun matrimonialla et regulara fonction de las bellas nozas, fattas et salvadas publicamaing avant l'intera laudabla raspada in baselgia de nos honnoratissem cummün de Fettan die 1. (domengia) decembris anno 1773, tanter las seguaintas honnoratas, chastas et prudaintas persunas, il illuster et nobel signor anvolt regente Tumasch, filg del illuster et nobel signor anvolt Jon Franz de Fettan, et la nobla et illustra jumfra Chiatrina, filgia unica del illuster et nobel signor anvolt Andrea Trol de Fettan; als quals in il stadj del soinch matrimunj oder sionchia lay augustamaing units et maridats, giavüscond del Segner benedictiun, prosperità et felicitat, bain star et tuot bön et bain accioe ch'ils possen s'ammarr ün l'auter, fond bunas ouvras, plaschavlas, acceptas et agreablas à la völgia de Dieu, suainter temma del Segner, per podair dar laud, honnür et gloria al tuot omnipotaint et omnisceaint Dieu huossa et in eternum. Amen!

[... L'autur ans indichescha il text ed exordi da la preidgia del splüdir, salvada la dumengia il 24 november dal ravarenda Peider Dumeng Rosio von Porta il juven. Lura manzuna'l il listess per la preidgia delas nozas, chi ha lö ün'eivna davo. Il ravarenda Jon Men Binna ha tschernü per quist'ocasiun ün text our da la Genesis: Ed Enoch, haviand genui Methusalem, schi chaminet el cun Deis spazi da traiacent ans, et genuit filgs e filgias...].

Anno 1773 die 30 novembris à Fettan. Sco quaj chia la jumfra spusa la dumengia passada es ida ad invidar à nozas als plü strusch praints, vaschins et amis, uschè sun its ils chiambrers⁴⁵ la sanda die 30 9bris. Ün dels chiambrers fand il pled et discuors ad invidar à nozas in las chiasas de lieut de certaine distinctiun et reverends ministers, et in chiasas plü particularas et commünas disch il oratur, chi es per l'ordinarj ün dels plü struschs paraints dela vart del spus, il qual eira illuster et nobel s^r Clatschück, second filg del illuster et nobel signor anvolt Jon Franz, dschand sulamaing, de la part del s^r spus oder dela j^{ra}

⁴⁵ Pels differents significats da «chambrier» vair Dicziunari Rumantsch Grischun, tom 3, p. 212.

spusa s'invidaino à nozas sün dj d'daman! et ils chiambriers pitschens sbragind sün quaj tanteraint, pilgay curtès, furclettas et sduns, et guarday de non far fall da gnir à nozas! Ils chiambriers avant co ir ad invidar baiven et mangien de fraj, rasdüras, fuatschas alvadas et fuatschas grassas etc hõz indj dand eir buna manestra chiauda et schoppa cun oufvs etc et la saira dopo tuot invida tschainen da chiaut sco nozas invitand lapro eir als signors ministers et algüns dels plü struschs paraints et prosemms vaschins et ammis etc et quaj notamaing in la chiasa de la spusa, la portiun delas nozas tocca à la spusa de far, las colatiuns de fraj et tschainas de chiaut de tuot' eivna als chiambriers, schi y d'inviden ad eisters da bliers cummüns, van ils chiambriers ordinariamaing in temp d'jviern in schlitra et d'esta à chiaval in numero 2, 3 oder 4 ils mercurdits et mardj Sur Valtasna et jövgia et venderdj Suot Tasna, et la sanda in il lö delas nozas, et la colatiun delas nozas: il jantar delas nozas, la tschaina, schussir gio ils crans, il past del lündeschdj et mardj etc tocca in chiasa del spus.

Sco chia'ls spus et spusas contingentamaing à far las nozas an blier à far l'eivna de las nozas, vea per'l eivna aviand schneders ò schneiderinas à far la vestimainta al spus et à la spusa, fand eir pan et rasdüras sco eir bechiarea de s. h. fdès per las nozas, et davo mèz l'eivna la giöfvgia cuschinand las fuatschas alvadas, preparand ils rosts stuffats et tuottas las mazarias de chiadafö etc il venderdj cuschand las fuatschas grassas etc et la sanda fand aint las maisas et imprastand oura ils talliers d'zin: uschea ils spus et spusas an amo plü blier de far la domengia, la spusa deviant à buna hura ir in tuotas las chiasas ad invidar las chiambrieras, et il spus egalmaing, non pudiand sulet ir in tuotas las chiasas dels chiambriers et hommens ad invidar à culatiun, sco quaj chia la spusa davo mez dj sto eir ir ad invidar las dunans à maisa davo, charge'l ad algüns nozadurs paraints ad ir ad invidar in üna part d'chiasas. Els ils spus non pudiand s'dispensar à far lur toccanta invitatiun in chiasas dels signors reverends ministers; de sorte chia tuots ils nozadurs et nozaduras vers las 9 ò las 10 horas avant mez dj assamblats in chiasa dela spusa, ils cumpongs juvenes à maisa insembel, ils hommens et signors reverends ministers eir mis à üna tabla, aviand tgnü eir eug quella honnür in quista occasiun, à la maisa et in compagnia dels 2 antenominats signors predicaturs da mangiar la culatiun in cerimonia nuptialla et antiqua consvetudine, ingio al ordinarj sezen las persunas delle prüma distinction, chi eiren presaints effective il signor capitanej

Vidal Secky, il signor landammâ regente meis cusdrin Peider Martin Rosio von Porta, seis bap il signor mastral Martin Rosio von Porta, il frar seis barba signor mastral Jachen Rosio von Porta, il signor mastral Cla Magnöla Crastan, il signor capo regente de cummün anvolt Nuot sar Chiasper à Porta, meis s^f barba Peider Andriella, s^f barba anvolt Nuot Nuotpadrotsch de Schucanj etc et las juvnas et chiambreras eir insembel sezand à tabla plü decentamaing sainza üna sün il bratsch de l'otra sco à nozas,⁴⁶ ingio ils cumpongs juvenns tuots per moda sezand gio sün ils bratschs delas mattans schi völggen mangiar et far vera co chi san plaziar, oder non ir à nozas, es ün fat uschè degutant ch'ün saies per esser libers à tals genemaints mettant à tabla plü persunas co quaj chia'ls bancs pon contgnair, mattuns et mattans tuots ün sur l'auter serrats insembel plü fick co ün buschin herrings ô pêschs insalads, chia à minchia noza avant co chia'l jantar sea lgivrâ, sun obliadas bleras juvnas da bandunar la tabla et ir a respirar, avions ô mal in il cour de tanta stretüra, chi deriva de surchiargiar il estomac cun malgiar suventas jadas massa, et chi es ün grand inconveniaint schiaudant lur las natüralas feblessas, al chie ellas natüralmaing sun suotapostas, et las nozas in comodita regulara sun laudablas et approbablas à quella veilgia moda, mo tuota vilainie disaprabla. Per la culation vaina servj vin chiaut in abundantia et dopo eir vin natüral per quels à chi gusta de baiver, fuatschas grassas, et in grondas nozas dand à scodüna persuna üna fuatscha grassa et suventas jadas eir üna et meza per ün, ultra quellas servidas in general à tabla et mangiadas, sco eir fuatschas alvadas d'furmaint oder d'iörda, ouvas, malcorvs, patlanas, vuischlas plusas et rasdüras etc. Tuots uschea mangiand et büvand allegrusamaing à lur bon appetito libramaing spettand chi vegna suna preidgia, ils hommens s'retirand our d'stüva in chiasas vaschinas, sco quaj ch'eug naj eir tgnü l'honnûr in compagnie dels dits signors dad'ir in stüva da meis s^f barba Peider Andriella per'ns àschüdar fintant tuot eira pardert ad ir in baselgia; et las chiambreras stand tuotas pro la spusa à cusir sü seis kranz, sü som'la barete, in planiv il kranz fat in bella forma raduonda et à cusir sü il kranz del spus, il kranz del spus vain cusü sü sü'l chiapê dela vart del bütel chiapê, il kranz à l'ordinarj

⁴⁶ Per nun avoir problems cronologics: Uossa discuorra'l üna pezza (fin... «disaprabla») da las nozzas, q. v. d. davo baselgia. Davo continua'l cul raquint cronologic.

fat in forma piramidialla largia; ils duos kranzs cusüts sü, las spusas fand lur adieus à lur cumpognas bütschand à tuotas, et cridand d'algre-tia, chi es il plü grand pas à far, et chi dumonda il plü bler temp, chia in temp d'jviern non s'vaia à preidgia co à las 12 et quaj in bel orden, la spusa luand gio las chiambreras duas à duas, pitschnas cun las pitschnas et grondas cun las grondas, ils hommens tuots insembel marschand il prüm, dopò tuots ils juvens accompagnand il spus, tanter el stand 2 dels plü prossems paraints chi eiren seis frar s^r Clatschück Jon Franz et seis cusdrin Peider Burchiart de Saluz, et la 3^{vla} compagnie las chiambreras, accompagnand la spusa, honorada de duas dunnans davant, las quallas eiren la multo illustrissima et nobilissima signora land-ammina regente Barbla Dusch Peider Rosio von Porta nada Schmidina von Grüneg de Fettan, mea estimatissima cusdrina et cumar, et l'illustra et nobla Barbla Men Pazeller nada Trol de Fettan; in quel interim chia'ls hommens, juvens et juvnas cun trais pitschens intervals de distantia d'observantia in marschand in dit bel order aint da baselgia, reteigna il minister predicatur à preidgiar in quel momaint, fin chia tuots ils nozadurs aint à som' baselgia sun tschantats, continuescha il predicant seis discuors sün chianzla à l'honnôr del spusalizi tratand per l'ordinarj la doctrina, perchie s'va adüna massa tard à preidgia, cun giavüschar vantüra bun succes et sanda als novamaing conjugals, la administratiun matrimoniala suainter intitutions christianavlas del signor reverendo minister honorada et celebrada ils spus à man dret et las spusas spêr els, ils spus il prüm s'mettand à gnuoillias, dan 1, 2 oder 3 annês d'aur à las spusas sun lur confirmatiun schi! tschantschada in secretamaing al predicant, dopo la dita cerimonia ecclesiastica vain suainter consvetudine chiantâ la chianzun nuptialla: à tuotta lay cun cretta: tuot bain via'l'orma et corp: ruaino chia Dieu'ls detta: tras seis soinchissem spirt: etc. et las femnas gnand our d'baselgia al solito spettan tuottas in plaz per s'far dar tocs d'fuatscha grassa et insaia de las nozas à las chiambreras, gnand davo las dunnans in lur prüm order cun la spusa our d'preidgia avant ils chiambriers, ils quals eir in lur prüm order cun il spus gnand our d'baselgia avant ils mascels, ils nozadurs gnand cun ils hommens, s'fadimand tuots ils cumpongs dad' our'l üsch d'baselgia bütschen il spus et giavüschen vantüra al introit del nov stadj matrimonial. Arrivats ils chiambriers, il spus in quel interim va in chiasas dels signors reverends ministers à ls far gnir à jantar las nozas, et las

chiambreras cunla spusa davant la porta del spus, cloccand sün porta la fan uvrir, ingio la spusa vain recevüda d'ün discuors d'ün ecclesiastic ô politic, suainter chia'ls paraints del spus ordineschan, in quista occasiun a recevü la spusa il multo illuster el nobel signor reverendo Jon Men Binna, et à l'honnur de la receptiun sporschen ils da chiasa üna meza d'vin et malcorvs als nozadurs stantibus la spusa gnand bütschada dels paraints del spus, s'meta à tabla cun la juventüm sü som' maisa la plaziand quel chi a tgnü l'honnûr il dj d'avant la samda da far il pled ad invidar à nozas, il spus non s'mettand à tabla, mo deviant servir à jüdar portar aint ils trats delas nozas, las quallas consistiven da 4 bunas maisadas in stüva, et eir plus dels uffants sün stüva d'sura non aviand podü mangiar our in tabla causa il fraj, las duas sü d'sura las chiaffas del pan vain dit la maisa del minister et las duas maisadas sü d'sur la pingia vain dit la maisa dela spusa, et la belteza dela nozza consista de la juventüm, et quels chi per massa strettüra non pon sezar gio sün il bratsch delas matans s'mettan à l'autra maisa ditta del minister, ingio causa gniva chiatscha dela stretüra dela maisa de la spusa, aves causâ la tabla à quels cunter la paraj qualchia incomodita scha'l signor mastral Martin Rosio von Porta non aves dat suda et fat incleer raschun, ch'no aveivan bain bavü et mangiâ, Dieu ludâ! à l'honnûr delas nozas bain cuschinadas et composadas, las cuschinunzas eiren ellas 4, la nobla et illustra Gi Mengia Litta (es üna buna prusa femna zapiaia ün pa et s'a da juvna in sü stovü sinservir d'ün bastun per chiaminar et fa ustarea da vinars) Andrea Trol nada Clatschüchk Sechia de Fettan, madastra dela spusa, l'illustra et nobla Onna Mullin (üna gronda bella femna) de Scuol, duonna del filg d's^f anvolt Jon Stalvies de Sent, sour della mamma dela spusa, l'illustra et nobla Gi Uorschla Padrotsch Andrea Bischoff de Scuol, nada Trol de Fettan, sour del bap dela spusa, et la nobla et illustra Gi Chiatrina Stuppan Burchiart de Saluz, nada Clatschüchk Sechia de Fettan cusdrina et cuinada del bap dela spusa; et essendo il cumpong juven s^f Andrea Balser Binna stand in la maisa dels hommens et suainter buna apparentia intentionâ eir el a far forsa las prümas nozas per non star tuotas seis dits in statu cöelibatu, s'impiseiva à sa spusa amo non dit oura, chi sezeiva in il chiantun de la maisa delas nozas sper la jumfra spusa effectivê, tramettet nan la coa del rost, sün ün tallier d'zin cun ün bel mantin alb, et eug essendo aveiva l'honnur de servir à la tabla, sezand sün bratsch de jumfra Anna Dumeng Rosio von Porta sper la spusa,

non pudek far outra in co leer oder explichear l'adressa, chi es à la moda in de ditas sorts occasiuns, chia la jumfra spusa des acceptar il presaint, sulamaing in memorianza del plaschair ch'ella aves de jüdaïr del titre de jumfra al nom de duonna, in la prüma occasiun ch'ella dormira cun seis chïar hom, per podair esser il lündesdj dalunga titrada duonna spusa, per consequentia donc an stovü necessariamaing dormir quella not insembel, dopo schusi gio ils kranzs dela juventüm, dscheiva per s'excüsar ch'ella d'üna coa uschea non aves ingiün buonder, fand passar la planna ad outras chi an la tschera eir da gnir spusas, las qualas dschand ch'ellas fessen grand cas de podair gnir patronas de tant mo vivaint! deviant de l'autra vart udir ils frequents discuors dels signors ministers, aviand fat 4 plets els duos à l'honnûr de baiver in sanda dela spusa et spus (il vin eira bun et cur las nozas sun bellas sto esser eir il vin bun et gustaivel) et 4 autres plets, scodün 2 discuors, tant co per ingrätzchiar de lur nozas recevüdas, co de la part del spus de l'honnûr recevüda, discuors nominâ'l quint, sco eir il pled de las gratias chi consista in oratiun discursiva et Bap Nos! essendo bain tard las chiandailas et lgüms fingia illüminadas in stüva, avessen continuâ ils discuors amo plü löng, scha las juvnas impatiantas de star oder per ir pro sunaders, cumanzeiven ad ir our de tabla et la buna jumfra Marea cusdrina de la spusa, filgia del s^r anvolt Burchiart de Saluz, il qual servind à tabla dschand baffunerias sco eir Men Bazeller divertisseiven tuota la compagnia, giet eir our da stüva essendo sa bella calur cotschna eira d'alba, d'ammâ la da l'cour, et'ns aves displaschü scha la buna jumfra Marea fuos statta incomodada d'indigestiun, essendo sezeiva genadamaing sper la spusa, aviand tgnü l'honnûr de la servir sco à las outras juvnas cun dabaiver et da tuottas sorts d'spaisa bain accomodada et candida, s'aviand uschea podü refraischir, eira ella cun sa bella calur alba et cotschna sco quaj ch'ella eira il prüm sanna, frisca et bain disposta, la jumfra Marea es üna bella brava et dabain juvna, de bun deportamaint et gentille, frisca, ferma et galliarda et de bun character Dieu sea alavant! et perchüra El ad ella et à tuotas outras dad ongni disgratia, disfortüna et adversitats, las giavüschand tuot bön, perche las völg bain d'ün cour et character honnet, sincer et nobel. Uschea dopô avoir tgnü eir il plaschair et l'honnûr de mangiar il desert de las nozas, chi à l'ordinarj consista de fuatschas grassas, fuatschas alvadas et rasdüras et vin, schi avant co gnir à chiasa suainter la moda, ils de chiasa cioè 4 frars, il s^r anvolt Andrea Trol, marchiadant

de tuotas sorts bellas cromareas, il s^r anvolt Padrot Trol, il s^r Peider Trol, cumpong juven et bun chialgier et barba Jachen Trol worsinger⁴⁷ et bun chiantadur, offrind amo üna zena d'vin, aveckg l'honnur de baiver à lur sanda, 'ls giavüschar la buna saira, et'ls ingrätzchiar della honnûr et bonna amicitia.

Essendo sün nos giavüschar de chambrers, eiren arrivats ils sunaders l'illustrer et nobel s^r Thöna Guadeng de Sent, et'l illustrer et nobel s^r Chiarl Eien de Sent, spettand nos orders in chiasa dal illustrer et nobel barba Steiven Nicolay, avechk l'honnûr dels toccar man, dschand ad ün dels chambrers de'ls far avair de mangiar et de baiver suainter il solit delas nozas, et dopo ch'no averan il plaschair de'ns divertir: schi essendo meis cusdrin et cumpar signor land-ammâ regente Peider Martin Rosio von Porta gnü sü de Sent il dj davant, 'm dschet à las nozas ch'ell aves üna chiarta per maj del multo illustrissem et nobillissem signor capitanj et chevalier Jachen de Stoppanj de Sent a'm remetter, avant co gnir in chiasa mea à spargniar l'uniforme de Sal-is, giabana d'schiarlatta, chiautschas de bel pon nair, et chiamischöla alba, et trar aint giabana verda, chiautschas verdas, chiatschos albs, chiamischöla alba et chiapê d'chast ûr idem uniform d'Sal-is per salir d'algretia et plaschair, sun it per receiver la chiarta in chiasa sea, aviand tgnü l'honnûr de giavüschar la buna saira à tuots de chiasa sco eir à ma chiara signoranda multo illustrissima et nobillissima signora mastrlessa Margueritta Schmidina von Grüneg de Fettan, nada Stoppanina de Sent, in il istes temp aviand tgnü l'honnûr de toccar man et reverir al multò illustrissem et nobillissem signor Vincens de l'Ammebertin de Ville in Valtelina, cun il qual et in compagnie del s^r cusdrin land-amma et seis cusdrin s^r Peider Jon Rosio von Porta aveckg l'honnûr de juar üna partida de chiertas à triset à 4, et aves continuâ il jeu plü löng per profitar del plaschair et l'honnûr de lur bonna compagnia, sch'eug aves daschü disobligiar il plaschair dels sunaders à l'honnûr de las nozas, pro'l qual divertissamaint musical il signor Vinsens' ns fet l'honnûr cun sea presentia in il plaz Valfurada sco eir sün Padruns in Tromarina [...].

In temp nuptial essendo il divertissamaint musical il plü grand plaschair, non es dubj chia la juventüm y manquen, et las mattans aviand drizâ la chiasa dels sunaders in il canton vaschin de las nozas per mel-

⁴⁷ «Vorsinger» in baselgia.

liora comodita del spus, spusa et nozadurs, in chiasa de Bettin, duonna del illuster et nobel s^r Jachen de Schucanj de Valfurada, causa an ün bel palanckzin à sutar, ingio il prüm dela saira aviand tgnü il plaschair de s'divertir, 'ns aviand fat il plaschair d'honnurar la compagnia hommens et eir dunnans, tanter las quallas eiren eir quistas 4 la multò illustrissima et nobillissima landamina regente Peider Martin Rosio von Porta, nada Schmidina von Grüneg de Fettan, mea estimatissima cusdrina et cummar, la multò illustrissima et nobillissima Nuotta Peider Peider Schmidj von Grüneg de Fettan, nada Steffenina de Guarda, mea estimatissima cuinada, la multò illustra et nobla duonna Uorschla Jachen de Schucanj, nada Saluzina de Fettan, et la multo illustra et nobla duonna Onna Schimun Curadin Rosio von Porta de Fettan, nada Crazina de Susch, bunas vaschinas et amies gnand in chiasa mea à plaz sco eir autras plüs, et schabain eir lur hommens et chiars marits eiren cun ellas, 'ns avessen fat grand plaschair et particolare honnûr schi fuossen statta plü löng et avesen sutà cun no, à bain il multò illustrissem et nobillissem signor capitanj Vidal Vidal Secky a fat la politessa de sutar cun ellas, s'respondet polimaing ma chiara cusdrina Barbla landamina regente, chi eira noblamaing vestida sco cur ella fet nozas, chia'l signor capitanj s'regorda bain ch'ella aia tgnü quella honnûr de sutar cun el quella vouta in chiasa de meis signor cusdrin Martin Schmid von Grün-Eg de Fettan Lieutenant, et sün meis giavüsch 'm dschet ella eir ch'ella völgia suttar et star allegramaing in l'occasion da meas nozas sch'eug fes tant plü bôt! sco eir'ns fet l'honnûr de sutar il illuster et nobel s^r Durj Bastian Schwars de Scuol, et il illuster et nobel s^r Men Tal de Scuol, chi eiren gnüts pro nos sunaders à'ns far honnûr à las nozas, in compagnie de l'illuster et nobel s^r Balthisar Nuot de Schucanj de Fettan; et causa ils üns fand, vive ils chiambrers! et algün, vive quels eir chi non sun nozadurs! et causa la gronda fula de lieut spectaturs et particularmaing tuots ils uffants et buobs del cummün chi salligven d'allegretia quâ, essendo quella chiasa de Gibettin es lur propi plaz ordinarj, schi per non ils affrontar et incomodar in lur plaschair et accioe ils chiambrers sean libers de tal stretüra, et fand vera ch'els essendo paiand als sunaders ils commanden et sean patruns das divertir à nos plaschimaint sainza offender ad ingiüna creatüra la minima chiausa nülgia, ordonneschans als sunaders da gnir cun no, et tuota la compagnia marschand in chiasa del signor anvolt regente Padruet Trol, in la

qualla buna stüva chiauda'ns divertind summamaing, ün momaint dopo'ns fand darchieu l'honnûr els 4 sco eir auters blers plüs, il multò illustrissem et nobillissem signor Vincens Amm'bertin de Ville, il multò illustrissem et nobillissem signor capitanej Vidal Vidal Secky de Fettan, il multò illustrissem et nobillissem signor banderal et mastral Peider Peider de Saluz de Fettan, et il multò illustrissem et nobillissem signor landammâ regente Peider Martin Rosio von Porta de Fettan, dels quals ils 3 ultims signor'ns honnoretten eir à far 3 et sutar, et essendo il signor banderal a sutâ cun la duonna del illuster et nobel signor anvolt regente Padruet Trol, Onna Ustin nada Saluzina de Fettan, aviand fat difficulta per spas ch'el sco hom non possa sutar cun mattans juvnas, dschet eir per spas il s^f anvolt, guarda bain che tü fast duonna! et dopo la traischa finida il cumuvantet eir ad el la völgia de sutar quattras dschand, scha auters sauten cun ma duonna, et ma duonna sauta, schi völg eir eug far tant, aviand tant drets sco hom et patrûn d'chiasa de suter et star leier! Sün qual divertisamaint arrivetten eir il s^f spus et jumfra spusa, aviand eir eug tgnü l'honnûr de sutar cun ella, 'ns aviand uschea divertits grondamaing, schi per'ls complaschair aveschans l'honnûr dels accompagnar in lur chiasa delas nozas incirca las 12 uras à schusir gio ils kranzs suainter stilo da veilg nan practicâ uschea; schabain es à la moda ad invidar à schusir gio ils kranzs als plü struschs paraints dels chiambriers et chiambreras, an tgnü quella honnûr las sequentas honoratissimas personnas, jumfra Mengia Nuot Vidal Secky, jumfra Mengia Nuot de Schucanj, jumfra Onna Dumeng Rosio von Porta, jumfra Neisa Jachen Rosio von Porta, jumfra Neisa Jon Rosio von Porta, jumfra Uorschla Jachen Rosio von Porta, jumfra Mengia Balthisar Rosio von Porta, jumfra Gretta Riet Secky, jumfra Chiatrina Martin Secky, jumfra Marea Buchiart Saluz, Onna Jachen Schucanj, Neisa Steiven Nicolaj, Greta Giargölj à Porta, et Aita Nuot sar Chiasper à Porta, et quistas 4, jumfra Barbla Jon Saluz, jumfra Barbla banderal Saluz, jumfra Neisa Chiasper Saluz, et Uorschla Clatschük (ditta Ruffianna) de Schucanj de Fettan, per non laschar chia'ls sunaders sunnen sü per inguota, an bain vulgiü entretenir l'honnûr del plaz, dand la preferentia al divertissamaint musical, la jumfra Barbla del banderal sutand legeramaing bain, à bain pitschnetta mo lesta et bain formada de statura, ch'il fuos certè evidaint scha ella fuos edücada in auters paiais cun nobla instructiun ad imprendar à sutar, ch'ella infalliblemaing sutes il plü agreabel-

maing co qualumque outra buna sutunza et bain gratusamaing,
 aviand eug per quaj eir tgnü l'honnûr de suter cun ella sco cun las
 outras prusamaing diversas jadas. In quaj chia'ls auters continüeiven
 pro'ls sunaders à sdivertir, schi nuo aveiven l'honnûr da mangiar et
 baiver avant co schusir gio'ls kranzs, à l'honnûr de dita ceremonia
 vaina per l'ordinarj presentâ sün maisa sco quista vouta, buns rosts
 fraids, fuatschas alvadas d'fuormaint, fuatschas grassas, rasdüras
 lommas et vin, büvand in sanda del nouv pêr, sco quaj ch'eug naj tgnü
 l'honnûr dels giavüschar tuota sanda, prosperita, felicitat et benedic-
 tiun, s'ammand ün l'auter dacourmaing, vivand in temma da Dieu,
 fand bunas ouvras suainter Sea volunta, ad El acceptas, agreablas et
 plaschivlas, 'l dand laud, honnûr et gloria. Aviand tgnü l'honnûr de
 schusir gio ils kranzs et quaj in tuot bun order insembel vantüraivel-
 maing jumfra Neisa Jachen Rosio von Porta, et jumfra Chiatrina
 Martin Sechia, et la jumfra Neisa charmée de portar sco spusa, exami-
 nand ils kranzs mettand ün sün seis chieu et ün sü l'chiapê de s^r
 Andrea Binna, dschand, oh, co quaj va bain! in revange del presaint
 del s^r Andreia à las nozas, representâ in ün mantin alb, per s'regordar
 tant co d'üna coa! et ella per quaj in quel momaint sco seng d'ammur
 aviand tgnü l'honnûr d'esser bütschada tendramaing del s^r Andrea B.
 Binna, chi da cour dschand, oh ma chiara! ma dutscha! per non la
 laschar in extasi fet el il pled cun giavüschar sanda als novamaing
 maridats, ils quals parderts ad ir à dormir insembel'ls laschessans lur
 plaina liberta, et returneschans cun ün nov spus et spusa allegramaing
 pro'ls sunaders sperand chi fetschen eir els tant pü bôt nozas, et chi'ns
 inviden eir à nuo à podair jüdair quellas. Aviand tgnü l'honnûr de
 conduire spus et spusa maridats insembel, avains tgnü eir l'honnûr de
 condüir duos novamaing inammurats insembel oder impromis non
 aviand amo dit oura, pro'ls sundaders, et à l'honnûr de lur mariage'ns
 aviand bain et plaschaivelmaing divertits squasi fin las uras 4 et
 avessans continuâ à star leiers sincermaing fin dj cler oder alba del dj,
 aviand fat la domengia bella et buna aura et quella not ün temp serai-
 nissem, bellissem et clerissem, il tschel splenduraint de cleras stailas,
 fand lapro bun fraischiet; scha las mattans juvnas dopo scodüna
 aviand paiâ à stilo ordinario al patrun d'chia, 1, 2, oder 3 parpaiölas
 d'pluetzchiers per ün per avoir laschâ suta in stüva sea, ün pa stanglas
 avessen vulgiü continuar à sutar, schi per ir in chiasas lur in tuota secu-
 reza an ils cumpogns juvenns tgnü l'honnûr de las manar in tuota buna

reigla, per podair survgnir suainter la moda dad' ellas, barschadellas, oder fuatschas grassas, oder fuatschas alvadas à mangiar pro'l vinars oder aquadevitta cun ils sunaders, sco quaj ch'no avain eir recevü, et fuossans its gient in chiasa da jumfra Mengia Roman Nuot de Schucanj, aviand tut üna meza d'vin et ün pan in sea ustarea per ils sunaders, scha s^r Andrea Binna per'l complaschair non aves giavüschâ dad'ir in chiasa da jumfra Neisa Jachen Rosio von Porta, ingio büvand l'aquadevitta, fand quint, paiand als sunaders 3 renschs, per il vinars 24 x^{rs}, per la meza d'vin de jumfra Mengia Roman de Schucanj 16 x^{rs} et paia à Cla Jon Plouda Pedrot, per esser stat gio Sent à far gnir sü ils sunaders, 24 x^{rs}, fa in tuot la somma de renschs 4 et crüzers 4, dels qual naj tgnü l'honnûr de bain avoir paiâ ün mez thaler frances, et aves gientissem pajâ tuot per non laschar divisar il rest sur tuots ils chiambrers gnü üna bagatella d'inguotta per ün, aviand dat amo 8 crüzers als sunaders per far sunnar sü üna bella serenada in plaz et vuliand cummanzar à sunnar per la jumfra Neisa, sün giavüsch et buna intention de s^r Andrea Binna per la duonna maestralessa Barbla et s^r mastral Jachen Rosio von Porta, chi dormiven tranquillemaing in chiambra, dschand, à quia in stüva non faraj carnaval d'quaj s'rouv eug in gratia! giavüschand la buna saira oder il bun dj al illuster et nobel s^r Guadeng Gistun dj Ardez, stand qua in chiasa à maisa per ir à schola pro'l reverendo Jon Men Binna, il qual'ns a eir fat l'honnûr d'esser stat pro sunaders in compagnia dels 4 cioè cun ils duos de Scuol; cummanzeschans dimena oura in Ronsch à far sunnar las mattinadas, et aveschans l'honnûr de dar üna bellissima serainada avant la chiasa de ma signoranda multò illustrissima et nobillissima signora maestralessa Margueritta Schmidina von Grüneg de Fettan, nada Stapanina de Sent, il tuot à l'honnûr da quella chi demeureiva quaint cun ella, sco eir in plaz jübland, vive quellas! vive l'alba!⁴⁸ aviand bain löng sunna la serainada in dit lö, eir alg möds davant las faneistras de jumfra Onna de Lurais Dumeng Rosio von Porta et de jumfra Barbla Jon Saluz, sco eir continuand la serainada avant las faneistras del spus et la duonna spusa, per ch'els aien eir quel plaschair et dalet ad udir lapro,'ls aviand giavüschâ tuota contanteza, satisfaction et bainvölgienscha, schi per'ns schiauder et refraischiar continuand la serainada vers Ftang,

⁴⁸ «L'alba» forsa aint il significat da parti frances: duonna Margueritta d'eira la sour dal manader, guvernadur Andrea Stupan.

gieschans in chiasa da meis s^f neiv Nuot Riet Sechia, ingio aveckg l'honnûr dels regalar l'aquadevitta per 3 bz ð 12 x^{fs} et dat als sunaders amo 8 crüzers per lur fadeas delas serainadas, chi fa in tuot 4 bz per la bella serainada, et tuot paiâ cun ün $\frac{1}{4}$ thaler de franc d'undesch bazs d'nossa munaida, naj amo recevü oura del uster, et mis in buorsa mea 4 bz sainza quintar ils auters chiambrers, schi fuossen gnüts tuots ils invlidats à nozas, fuos stat üna grondissima noza, aviand il spus et la spusa blers paraints squasi tuot il cummün d'üna vart oder l'otra et particularmaing cusdrinada et suvrinada, ma per l'ordinarj à gronda noza grond parmal. Schi per far et gronda noza et grond parmal, sun main invidadas 40 chiasadas chi eiren sün la lista, et cun ün pled, chi a par mal, stritsch sü ün pa d'sal! Schi eiren nos 8 pro'ls sunaders à continüar il plaschair et divertissamaint meis s^f neiv Nuot Riet Sechia, s^f Andrea Balser Binna, s^f Andrea Steiven Nicolaj, s^f Balser Martin Nuot de Men, s^f Clautot Jon Fratschöl, et s^f Peider Jon Rosio von Porta et s^f Men Padruot Pazeller eiren in chiasa lur et eug Martin Peider Schmid von Grün-Eg de Fettan. Scrit die 3 e 4 decembris anno 1773.⁴⁹

*Szenen aus dem Volksleben im Unterengadin des 18. Jahrhunderts
im Spiegel einer Zeitgenössischen Chronik*

Obwohl sich markante Persönlichkeiten schon früh für eine Bündner Sozialgeschichte eingesetzt haben, ist diese bis heute ein Stiefkind geblieben. Ein Grund dafür liegt – vor allem für die Zeit vor 1800 – im Mangel an Quellen, die uns über den bäuerlichen Alltag berichten. In dieser Sicht ist der «Chiantun verd in chronographia rhetica illustrada dels anos 1773, 1774, (1775), 1776, 1777 etc.», ein zweibändiges, bisher in der Literatur wenig beachtetes Manuskript von fast 2000 Seiten, ein Glücksfall, finden sich doch darin neben Abschriften historischer Dokumente viele Alltagsschilderungen und manchmal auch längere ethnografische Texte über das Unterengadin des 18. Jahrhunderts.

⁴⁹ Las nozzas nu paran dad esser stattas finidas dal tuot eir davo tuot quista festatscha. Plü tard scriva nos cronist: «Anno 1773 die 8 decembris la domengia 8 dits davo las nozas suainter stilo üsità an tgnü l'honnûr las honnoratissimas juvnas nozaduras, de plaziar la spusa, duonna Chiatrina T. Franz nada Andrea Trol de Fettan» (I: 798).

Der Autor, Martin Peider Schmid von Grüneg, wurde 1743 in eine Familie hineingeboren, die der «kleinen Aristokratie» von Ftan angehörte. Nach dem Schulbesuch in seiner Heimatgemeinde und in den umliegenden Dörfern begab er sich 1762 nach Frankreich, wo er als Fähnrich in die Kompagnie eines Verwandten eintrat. Zehn Jahre später – er war inzwischen zum Leutnant avanciert – kehrte er aus einem Urlaub in Ftan nicht mehr in den Dienst zurück, sondern begann stattdessen an seiner Chronik zu schreiben (bis mindestens 1782), obwohl ihm dies von seiner Umgebung schwer angekreidet wurde. Seine Aufzeichnungen folgten keinem klaren Plan: Alles schien ihm würdig aufgeschrieben zu werden, um es dadurch zu «verewigen» und zu «ehren» (das dominierende Stichwort seiner Chronik). Seine Schreibweise ist oft recht verschachtelt und assoziativ, seine Weltsicht harmonisierend und von seiner sozialen Stellung her beeinflusst. Trotz – zum Teil gerade wegen – seiner Eigenheiten ist das Werk von grossem historischen Wert. Über das spätere Leben des Autors ist wenig bekannt. Wir wissen nur von seiner recht bescheidenen Ämtertätigkeit und von seinem Tod als Junggeselle im Jahr 1821.

In der Folge werden vier längere Texte aus dem «Chiantun verd» publiziert. An der Schilderung des *Gemeinwerks* sind vor allem die Hinweise auf den sozialen Kontext von Interesse, der aus den juristischen Quellen nicht zu entnehmen ist. Der Text über den *Jahrmarkt von Ardez* ist wichtig, weil es über die alten Viehmärkte der Region kaum Quellen gibt; er unterstreicht besonders den sozialen, festlichen Aspekt dieser Institution. Die *Metzg* wurde schon von mehreren Autoren ausführlich beschrieben; Martin P. Schmid scheint in unserem Gebiet der erste gewesen zu sein. Seine Schilderung einer *Hochzeit* führt uns in die kulturell reich ausgestalteten Bräuche ein, mit denen man in den bäuerlichen Gesellschaft des alten Unteren-gadins nicht bloss zwei Personen, sondern zwei «Häuser» miteinander verband.⁵⁰

⁵⁰ Eine weniger ausgearbeitete deutsche Version des Abschnittes über Leben und Werk des Autors, sowie deutsche Übersetzungen der Texte über das Gemeinwerk und die Metzg bei Jon Mathieu, *Eine Region...*, op. cit., S. 489–493, 84 f, 279.

Dus decrets dils spirituals da Lumnezia sco fontauna dalla veta populara dil 18avel tschentaner

dad Ursus Brunold

Perdetgas a scret da glied cumina dil 18avel tschentaner, jeu patratgel a diaris ni autobiografias sco p. ex. «Lebensgeschichte und natürliche Abenteuer des Armen Mannes im Tockenburg» d'in Ueli Braeker – ein pigl intschess romontsch tochen ussa diltuttatfatg nunenco-nuschentas. Dumandein nus suenter las cundiziuns da viver e la mentalitad dalla glied sempli, sche essan nus dependents da fontaunas a scret dall'elita spirtala da gliez temps, sco p. ex. dils spirituals. En quella semuossa la veta populara il bia ella glisch da glorificaziun ni da critica.¹

A caschun dalla ordinaziun dils archivs parochials en Lumnezia hai jeu cattau a Camuns e Lumbrein dus decrets dils plevons e spirituals dil capetel da Lumnezia che dateschan dils onns 1742 e 1743.² Essend che quella ordinaziun stuevan vegnir prelegidas giud scantschala, ein ellas redigidas en romontsch.³ Cun lur admoniziun han ils spirituals l'intenziun da dismetter certs abus ch'existan sco ei para ella populaziun lumneziana, sco l'ediziun suandonta muossa a nus.

Il decret exista en duas variantas (A e B). Ellas varieschan en cuntegn e lungatg, aschia ch'igl ei giustificau da publicar omisdus texts.

¹ cf. Kramer, K.-S., Zur Erforschung der historischen Volkskultur. Prinzipielles und Methodisches, en: Rheinisches Jahrbuch für Volkskunde 19 (1969), 7–41.

² Bien engraziament a v. mistral e scolast G. L. Arpagaus, Camuns, ed al plevon da Lumbrein, sur Sigisbert Berther, ils quals han surschau a mi quels manuscrets per la publicaziun.

³ Bunamein tuts documents d'avon 1800 en nos archivs parochials da Lumnezia ein screts en tudestg ni latin, a Camuns e Cumbel, nua che paders caputschins han pastorau dapi il 17avel tschentaner, era en talian.

Els serefereschon sin il capetel dils 2 d'ost 1742 a Camuns;⁴ la varianta B ei eventualmein in sboz.

La scripziun ei senza reglas claras. L'ediziun proceda tenor ils principis suandonts: Ei vegn scret grond mo nums e l'entschatta da construcziuns. Las letras «u» e «v» distinguel jeu tenor las reglas actualas. L'interpuncziun ei applicada conform al senn. Ultra da quei setegn l'ediziun vid igl original.

2 d'ost 1742

Varianta A

Fegl dubel da pupi. El sesanfla egl archiv parochial da Lumbrein (signatura: B 1). Il fegl ei screts da sur Petrus Tini oriunds da Casti, da 1732 tochen sia mort 1760 plevon a Lumbrein, dapi 1743 vicari episcopal, pia parsura dil capetel spiritual lumnezian.⁵ All'entschatta dil text ha el scret zatgei pli tard las annadas «1742 et 1743». Il fegl cuntegn pia era cuortamein il decret dils 9 da matg 1743, che nus edin tenor la versiun dil pader da Camuns.

Ils pfarrers, plevonts è spirituals digl entir venerabil
capitul de Longneza allas lur pleiffs è confidadas nuersas
lur salit è sacerdotala benedictiun.

Digl temps en nau cha nus da Diu essen à vus stai tschentai avont scò voss pasturs è mussaders dellas vossas olmas, havein nus era nagina caussa giù adina per cor aschia fig scò da vus manar, intruidar et paschentar sin il dreig pasetg⁶ è via dil salit, da pflanzegiar ent igl bien et las vertits è da rigischar ora il mal, che impedescha il salit dellas olmas, scò nossa greva obligatiun à nus camonda. Vasend pia cha d'ensaconts onns ennau en⁷ bein biars vezis è disuordans cun gronda ruina

⁴ Ils 2 d'ost ei la fiasta dil perdun da s. Franzestg. Quei gi serimnavan ils spirituals da Lumnezia tier lur capetel, alternativmein in onn tier ils paders caputschins da Camuns e l'auter onn tier quels da Cumbel. Las tractandas principalas da quella sessiun fuvan mintgamai l'explicaziun da tschun cass teologics, treis davart la teologia morala, il quart davart la teologia dogmatica ed il tschunavel davart damondas liturgicas e dil missale. Mira Archiv parochial Camuns C 11, p. 486. Il datum digl onn 1742 sedat ord il fatg ch'il decret che nus publicchain alla fin sereferescha sin ils conclus da quei capetel (p. 11).

⁵ Mira J.J. Simonet, Die katholischen Weltgeistlichen Graubündens, en JHAGG, annada 1919, p. 191.

⁶ = pastget

⁷ = ein

dellas à nus confidadas olmas schlechegiai ent, havein nus s'afflau obligai de vus dar d'entellir il nies grond displischer, che nus vein schon giù ensaconts onns ennau da stuer veer.

1. Qualmeing sin la fiasta è solemnitat de Soing il christ las feglias cambreras⁸ enten staigl de far honor è portar reverenza aigli santissim, sch'han ellas da disputar per la praecedenza è tras lur luschezza tener s'è perturbar la processiu cun gronda irreverenza dil santissim sacrament, mal exempel et murmuriu dil pievel. Sur quei samgiontameing ils minders cun caschiun da sigittar sin tala è sin autras fiastas bucca solettameing prenden caschiun da beiver è surbeiver, vegnir malperina et d'entscheiver scandels, scò era per sesezi la devotiun lau tras veen feig schminuida è daventa pli zenur che honor à gli ss. sacrament, sonder era metten en prigel de far mal avurdau et enquala disgrazia è schwentira, ô à sasezi ô ad autras persunas ch'en dentuern, scò laider! ils cass et exempels ch'en v'è nau daventai à nus datten perdetgia pli cha avonda.⁹

Cun tutt sch'hà il venerabil capitul afflau chei seigi pli cun Diu è pli bein faig de dismetter tont allas feglias il far tschiup'è sin la fiasta de Soing il christ, scò era als minders da sigittar sin quella è sin autras fiastas: perdunonzas, compagnias,¹⁰ solemnitats è processions; è comandein che mintgin deigi comparer tschella visa tier il survetsch da Diu enten siu ordinari liug suenter siu stand cun modestia, devotiun, humilitonza è reverenza.

2. Vein nus era afflau nossa obligatiun de scomandar scharffameing als giuvens da sà trer en il tscheiver da bagordas enten vestgiadira da femnas et era allas feglias il sa trer en en vestgiadira da maschgels.¹¹

⁸ «Las cambreras (buobas vastgidas en alv cun flurs) van odavon als augsegners mintgamai ellas processions grondas...» DRG 3, p. 212. Mira era Hans Krömmler, *Der Kult der Eucharistie in Sprache und Volkstum der deutschen Schweiz*. Basilea 1949, p. 125–126.

⁹ Gian Caduff fa buca menziun da discrepanzas denter ils mats ed il clerus en siu cudisch «Die Knabenschaft Graubündens», Cuera 1932, p. 179–187.

¹⁰ fiastas da confraternitads.

¹¹ H.-G. Wackernagel, *Altes Volkstum der Schweiz*, Basilea 1959, p. 274 citescha per quei usit da tscheiver arcaic in exempel da Basilea dil 15avel tschentaner. Egl archiv cirquital da Lumnezia a Cumbel sesanfla in scamond (document nr. 11) davart il far mascaradas («... so jemandt befunden werde in der mascarada Mansoder Weibspersohnen...»), saltar e dar giugs per daners, relaschau ils 24 da schaner 1667 dalla dertgira dalla Foppa e confirmaus e publicaus ils 23 da schaner 1674 a Vella da mistral e dertgira da Lumnezia.

Pertgei quella fuerma de sa transvestgir ei da Diu sezzi enten soingia scartira per esser ina caschiun da biars puccaus, streingiameing scommandada.

3. Ni savein nus ni pudein cun conscientia pli dissimular è vertir ils strapaz che davenen enten enquala pleiff sin las perdunonzas cun far matinadas, beiver, saglir è saltar è lau tras dishonorar è strapazar ils firaus è fiastas tschentadas sì da Diu è della s. baselgia per attender alla oratiun et als ss. officis è per ratscheiver ils ss. sacraments è perduns è per rugar da Diu, tras l'urbida et intercessiun dils ss. patruns da mintgia liug, sias gratias, duns è beneficis. Per quella fin vein nus concludiu, serrau giù è commandau è commandein à tuttas nossas pleiffs che tutts quels dissuordens deigien da cau denvì esser dissmessi, cassentai è scommandai.
4. Perquei ch'il saltar suenter il meini de tutts ils ss. paders ei la ruina è perditium della innocenza, castiadat è zichtiadat è la caschiun de biars puccaus consunt della malzichtiadat, aschia scumandain nus quel sin tutt temps è per adina scò glei schon da Diu sez scommandau, et era tras igl ludeivel oberkeit stau scumandau sutt greva fallonza digls 5 de zercladur 1679 è publicau giù dellas scantschiallas da quest venerabil capitul.
5. Havein nus era cun grond displascher stuiù entellir qualmeing ils giugs enten nossas pleiffs prenden feig sura maun en tal visa, ch'ei veen giugau giis è noigs ora cun entardar il survetsch da Diu cunsunt soingtias domeingias è firaus cun grond donn dellas olmas è bucca meins della rauba de biars. Aschia sche giè che nus essen bucc intentionai de scummandar ina hondreivla recreatiun suenter il stand de mintgin, scha lein nus auncalura haver scummandau è scommandein tutts giugs fermes è chars,¹² pertgei cha quels en bucca da spass è recreatiun, sonder caschiun da scandels, da surbeiver, pupiras, schmaladictiuns et auters grefs puccaus è la ruina digl tgierp et da l'olma.
6. Deigi à nagin esser lubiu, sonder scharffameing scommandau sin giis de processions scò era sin perdunonzas da haver venal ò metter

¹² Tenor la notizia dorsala contemporanea da nies manuscret setracta ei da «lusus chartarum», pia da giugs da hartas (per daners).

ora kroms,¹³ vin û vinars è pettas pizgneutas¹⁴ û pommas¹⁵ entochen ch'ìls ss. officis en bucca tutts finì, scò glei schilioc daventau cun grond mal exempel, dissuordens et impediment della devotiun; è sur da quei deigi mintgin pfarrer û spiritual dil liug haver bien adaig chei vegnig bucca encunter faig, cun agid dils signurs giraus.¹⁶

Tutts quests pungs scò nus quels à vus mettein avont per far avonda à nossa obligatiun, che nus vein da render quint à Diu per las vossas olmas, aschia eis ei vossa obligatiun de prender si, far obedienscha è salvar quels cun in bien cor è portar freig enten patientia. Quei vegnien ils buns è devotius fideivels catholics maneivel à far, ils quals bein saan è crejen: Tgi che teidli ils pasturs della s. baselgia, teidli Christum è tgi che sprezegia els, sprezegia Christum sez. Per quei vein nus era aunc ussa mess sì naging stroffs û paenatienzas spiritualas per quels che vegniessen bucc ad esser obedeivels, pertgei che nus vein speronza che mintgin è scadin vegnig sez à capir quont da baseings ch'ei seigi da scomandar las surnumnadas caussas. Auncalura encunter tutta speronza che enqualtgin less esser renitents è mal obedeivels, vegnin nus ad esser sforzai de duvrar ils mittels che Dieus ha à nus dau enten maun, è lau tier lein nus era sa volver è ver supplicau in lodeivel magistrat è oberkeit da nus assister, dar bratsch et agid è, cun lur authoritat da Diu dada suenter obligatiun è sarament ch'els portan cun nus ensemel, rigischar ora è cassentar il mal è pflanzegiar il bien; sina quei quei che nus suenter questa vita mortala pudejan dar in bien quint dellas nossas nuersas à gli divin pastur è giest derschader è nus cun vus ensemel, ô charas fideiflas nuersas, tras ina buna vita è la divina gratia pudejan contonscher il s. parvis. Amen.

¹³ deriva dal tudestg e vul dir creflis, dultschs.

¹⁴ vul dir «piziulta». Per quella indicaziun engraziel jeu a Felix Giger, redactor dil DRG.

¹⁵ = puma

¹⁶ ils davos tschun plaids ein vegni aschuntai dal medem maun zatgei pli tard.

Varianta B

*Fegl dubel da pupi. – Archiv parochial Camuns, B 3/6. Screts probabla-
mein da sur J. Jacob Castelberg da Mustér, plevon a Vrin da 1741 tochen sia
resignaziun 1745, 1755–1759 caplon a Sedrun, morts ils 12 da zercladur
1759 ella vegliadetgna da 59 onns.¹⁷*

Ils pfarrers è spirituals digl venerabel capitul de Longaneza
allas lur pleifs lur salit e sacerdotala benedictiun.

Con grond displischer vein nus leider viu qualmein sin la fiasta è
solemnitad de Soing il christ las figlias cambreras enten staigl de far
honor è riverenza agli sanctissim, schan ellas de disputar per la preze-
denza è lau tras retener et perturbar la processiu cun gronda irre-
verenza digl soing sacrament, mal exempel è murmuratiun digl pievel.
Sur quei simigliantamein ils minders con caschiun de sigittar sin la
fiasta bucca solletamein metten en prigel de far malavurdau, sonder
prenden caschiun de beiver ensemen, vegnir malperina et entheiver
scandels. Cuntut schan ils signiurs spirituals de nies venerabel capitul
enflau che ei seigi pli cun Diu e pli bein faig, de dismetter il far tschiupì
e sigittar sin la fiasta, nua che dat lau tras scandels et disuordens,
sonder che mintgin deigi comparer tschella visa tier la processiu
enten siu ordinari liug suenter il siu stand è compagnar il sanctissim
cun devotiun, humilitonza e riverenza.

Per il secund pung vein nus anflau nossa obligatiun de scomandar
als giuvens de setrer en da bagordas, enten vestgiadira de matauns il
scheiver è prender lau tras caschun de ira entuorn per survegnir de
beiver, pertgei quella fuorma de se transvistgir ei de Diu sez enten la
sointgia scartira scomendada, è ven cau tras cultivau è manteniun il
puccau della eivradad, che ei ina mumma de tuts vez è fontauna de
tuts puccaus e lasters sco era teniu si la fiasta de Bachus in jester diu dil
vin, che vegniven enten simigliantas uisas undraus della paganiglia.

Per il tierz pung savein nus ni pudein cun conscienza dissimular è
tollerar ils strapaz che daventan sin las perdonozas cun far mitti-
nadas cun beiver, seglir e saltar e lau tras dishonorar e strapazar ils

¹⁷ Simonet, J.J., Die katholischen Weltgeistlichen Graubündens, en JHAGG, annada
1920, p. 58 e 96.

firaus e fiastas schentadas si de Diu a della sointgia baselgia per attender alla oratiun, als ss. officis è ss. sacrificis et retcheiver ils ss. sacraments e perduns. A quella fin vein nus fermamein serau giu, concludiu et commendau e comendein allas nossas pleifs e nuorsas à nus confidadas, che tuts quels disuordens deigien vegnir dismissi e custentai et oravont ils spirituals deigien en talas cashiuns bucca gidar u cooperar tier il mal con dar de beiver alla giuventegna, per bucca daventar particeps dels lur puccaus e manar las olmas ad els confidadas a cul saung de Diu compradas enten perditium, e possi cau den via bucca pli vignir gig u faig avont, sco leider ei daventau, ils prers datten luft, ei buenten si sco tons gliemaris è per quei en ei la caschiun de tons scandels, dabats a tut schliet che daventa en simigliontas occasiuns.

Tuts quests pungs sco nus quels metein a vus avon per far avunda a nossa obligatiun che nus vein de render quin à Diu per las olmas, ad aschia eis ei vossa obligatiun de prender si a salvar quels cun bien et aung pli bien cor e portar frig enten patientia, quei vegnien a maneivel a far ils buns, devotius è fideivels catholicgs ils quals bein san a crein, tgi che teidli ils pasturs della s. baselgia teidli Christum, tgi che sprezegia els, sprezegia era Christum sez. Uss auncalura encunter speronza che enqualchin les esser renitenz è malobedeivels lein nus sevolver è ver supplicau in lodeivel magistrat e oberkeit, da nus assister, dar brath et agid et cun lur authoritad de Diu dada, suenter obligatiun a seramen chels portan, rigischar ora il mal a pflanzigar il bien.

¹⁸ mira Christoph Willi, Die Kapuzinermission im romanischen Teil Graubündens mit Einschluss des Puschlavs, s. l. 1960, p. 23 e 221.

9 da matg 1743, Pleif

Fegl dubel, pupi. – Archiv parochial Camuns, B 3/6.

Il text ei secrets da pader Marcantonio da Carpenedolo, plevon a Camuns da 1742–1757. Dals 1734–1738 ha el pastorau en Surselva a Sevegin, Sagogn e Danis, da 1738–1741 a Beiva.¹⁸ Divers plaids tradeschan l'influenza taliana.

Decretum

venerabilis capituli Leguntici in menstruali conferentia Pleifij,
die 9 Maij 1743 capitulariter habitá conclusum et ex cathedra
in quavis ecclesia parochiali aut beneficiata publicandum.

Ils pfarrers e spirituals dil entir venerabil capitul de Longanezza allas lor pleifs é confidadas nuorsas lur salit é sacerdotala benediction.

Con grond nies displaser vein nus laider! viu d'ensaconts onns ennau, qualmeing sin la fiasta del Soing il crist sco era sin autras solemnitats e fiastas specialas de mingin liuch ils minders, con casson da sigitar, bucca soletameing meten en prighel da far mal a vardau et enqual sventira ú a sesezi ú ad auters che een dentuern sco pir laider! ils cass et exempels che een vi e nau curdai a nus datten perdeghia pli che avonda, sonder era e principalmeing prenden cassun da beiver e surbeiver, vegnir malperina et entsheiver scandels. Persesez aber era tras somigliant sigittar la devotion bocca pauc veen sminuida et impedida é deventa lau tras pli zenor e mal exempel che honor a gli ssm. sacrament, a Diu et als soings.

Con tutt sch'há il venerabil capitul schon avont ensaconts onns giú afflau chei seigi pli per l'honor da Diu e per il salit dellas olmas de dismeter il sigitar sin tala é sin autras fiastas et ha ordinau é comandau che mintgin deigi comparer tschella visa tier la prozesion enten siu ordinari liug suenter siu stand e compigniar il santissim con devotion, humilitonza é reverenza sco ei descha a gli vierm della tiarra encunter siu scafider Diu é signur de tuttas caussas.

Questa nossa ordination essen nus tornai a renovar il onn passau sin il capitul de Camons ils 2 d'avuost 1742 et era lau tier garregiau l'assistenza, bratsch et agid d'in sabi oberkeith, il qual era con tutt iffer, sco lor sarament comporta, ei con nus concurius é per quella fin mess avont agli lodeivel cumin de s. Michel, sin il qual quella caussa ei era

vegnida dismessa é cassada en tal uisa che nus vein giu in special legrament é spirituala consolation giú della iffrica assistenza et buona obediencia duuida a lor babs spirituals. Aber questa nossa consolation há laider! bucca cuazu dig, essend che sco nus stuein udir sin il passau cumin de s. Gieri quella aschi ludeivla ordination del cumin de s. Michel tras il dar ent d'ensaconts con il pli maun deigi esser puspei rotta é cassada, senza patertgiar sco nus supposein che ei lau tras veglian era snegar l'obediencia allas ordinatiuns dil ven. capitul é far enconter a quellas.

Aschia con tutt zvar che nus podeien bucca creer che quei seigi diventau per malitia e per romper era las ordinatiuns faggias dal ven. capitul, scha auncalura considerond che en quella maniera vegniess l'autoritat spirituala strapazada d'ensaconts, ils quals lessen far il ein-grif ails dreigs dils spirituals e della s. baselgia, da dels numnadameing voler regier e comandar sur dellas proccéssiuns e solemnitats et autras caussas che pertegnien tier al honor e survez da Diú ó regiment spiritual dellas olmas. Avein nuos en consciencia bucca podiu dissimular, sonder s'afflau obligai da vos visar, che nus sil capitul de Pleiff ils 9 de maig celebrau, muert las surmanadas casuns hagian denievameing serrau giú, concludiu e scomandau il sigitar sin quella e sin autras fiastas, processions, perdononzas o solemnitats sco era nus tornein a scomandar, pertgiei che als spirituals e plevonts et bucca ad auters auda ei tier l'autoritat da ordinar, regier e comandar sur las fiastas é processions, con tgei honor e solemnitat che ellas deigien vegnir celebradas digl pievel.

Scò nus aber mettein a vos avont quei paternameing e con tutta carezia da babs spirituals da Diu a vos tschentai avont per far avonda a nossa greva obligation che nus vein de render quint à Diú per las vossas olmas, aschia eis ei era vossa obligation da prender si, far obediencia. Quei vegnien ils buons a devotios fideivels catholics maneivel á far, ils quals bein san é crein che tgi teidli ils pastors della s. baselgia, teidli Christum, é tgi che sprezegia els, sprezegia Christum Jesum setz.

Con quella speronza pia chei vegnien á nus render obediencia tutts ensemel, lein era nús saconsolar et haver admoniu mintgin é scadin enten buntad á caretia.

Auncalora enconter tutta speronza che enqualchin less esser renitens ó malobedeivel sche vegnin nus ad esser sforzai era da patertgiar

ora e dovrar auters metels, ils quals Dieus e la s. baselgia a nús há dao enten maun. E deien esser avisai, che sche ensetgi compara sin quei gi con uvaffens en quel liug, sa ven bocca a far la procession é laú speras da savolver da nievameing e suplicar in lodeivel oberkeit da a nus assister, dar brasch et agid e, con luor autoritat da Dio dada souenter l'obligatiun é serament che els portan cun nus ensemel, rigischar ora tutt il mal e planzegiar ent il bien, sinaquei che nus souenter questa vita mortala podein dar in bien quint a gli divin pastor é giest derzader é con vos ensemel contonscher il s. parvis. Amen.

Ulterius circa hanc materiam conventum est inter nos, ut casu quo nollent obedire, sed comparerent cum schopetis, omittatur interim processio pro hac solemnitate et alia die infra octavam, qua similes absunt rumores et parochus commode fiat hoc anno usque dum ven. capitulum de ulterioribus remediis deliberare valeat.

Insuper omnibus sacerdotibus serio interdicitur, ne inobedientibus pro illo festo aut potum aut pecunias pro potum prebeant.

Ego Franciscus Caduff parochus in Pleiff affirmo ut supra.

Ego Petrus Tini parochus Lumbreinij assentior et affirmo.

Ego Joannes Jacobus á Castelberg parochus Wrinij assentior et affirmo.

Martinus Rodolphus Caduff parochus Jgelij assentior et affirmo ut supra. Julius Soler parochus Supra Castri affirmo.

F. Lodovicus á Bedizolis capucinus necnon missionarius apostolicus affirmo ut supra.

Laurentius Caduff parochus in Avignone affirmo ut supra.

Jacobus Tgeitgel parochus Ternaensis affirmo.

F. Marcus Antonius a Carpenedulo capucinus et missionarius apostolicus affirmo ut supra.

Sigisbertus de Ture beneficiatus Morrisensis affirmo superius facta.

Florinus Antonius de Runs beneficiatus comunitatis [?] affirmo.

Gasparus Brazeroll parochus in Valle S. Petri affirmo.

Chasper Buchli 1876–1910

da Hans Chasper Tgetgel

Meis bazegner Chasper Buchli es nat a Susch als 8 lügl 1876. Seis bap d'eira Christian Buchli, oriund da Versam e sia mamma Mengia, nada Pult da Sent. El es mort fingià dal 1910 davo cuorta malatia, laschond inavo üna duonna giuvna cun tschinch uffants. Da manster d'eira'l magister. El ha dat scoula a Strada/Martina, a Lavin ed ad Ardez. In seis temp liber as dedichaiva'l cun grond zeli e cun tuotta paschiun al disegn ed a la pittüra. Dad el ans sun restadas eir diversas lavuors in scrit, preparaziuns per sias uras da scoula, referats ch'el ha tgnü illa conferenza da Sur-Tasna ed üna lavur plü lunga sur da la Protecziun da la Patria a la quala el ha agiunt diversas illustraziuns.

Il principi da nos tschientiner es stat per nossa val ün temp da grondas müdadas. Tuot chi d'eira inchantà da la cretta in svilup e progress. Aint ils «Fögls d'Engiadina» da quella vouta as chatta blers inse-rats tudais-chs e'ls artichels briclan da plets e fuormas talianas. Chasper Buchli dombra sper il stradun da Lavin a Zernez na main da 16 placats da reclama «chi sbrajan cun lur culuors feras ill' armonia da la natüra». El as dosta eir cunter renovaziuns vi da nossas chasas «chi offendan l'ögl e l'anim d'ognün chi ha sen estetic». El fa disegns dals cumüns da Susch, Lavin ed Ardez, el disegna chasas, mobiglia, urdegns ed üsaglias, e prouva da scolar uschè l'ögl da scolars e cre-schüts per las proporziuns. «Quaist' armonia es qualchosa chi nu's po bain declerar, que es alch chi as sto resentir», disch el in ün referat, tgnü ad Ardez. Ed el cuntinua: «Nus vain fat il secul passà progress müravglius sül champ da technica, scienza e trafic, avain però negligi lapro nos svilup estetic. In nos pövel dorma il sentimaint artistic, no stuvain darcheu avrir ils ögls pel bel.» Chasper Buchli nun es nimia stat sulet a tour sü il cumbat cunter tuot ils privels chi imnatschaivan nossa lingua e cultura. Dal 1904 nascha l'Uniun dals Grischs, ün on plü tard la Lia per la Protecziun da la Patria (Schweizerische Vereini-



gung für Heimatschutz) e dal 1909 la Lia per la Protecziun da la Natüra (Schweizer Bund für Naturschutz).

Per nus hoz sun divers disegns e pittüras cha Chasper Buchli ha fat da valur documentara. El ha disegnà l'aspet da nos cumüns intuorn il 1905 e nus vezzain fich bain che chi s'ha müdà i'ls ultims 75 ons.

Ün bel documaint es il disegn da Susch, quella vouta, avant la fabrica da la viafier, ün lö d'importanza pel trafic sur il Flüela. Quai es ün purtret dal cumün avant il fö dals 19 avrigl 1925. Pro quel terribel incendi sun gnüdas desdrütts 44 chasas a la riva schnestra da l'En. In fuorma da prospect ha il disegnadur agiunt aint ils chantuns dal purtret las ruinas da Chaschinas e'ls duos hotels. Nus vezzain il grond travasch da chavals e charrozzas davant l'hotel Rhätia.

Pro'l disegn da Lavin vezzaina las chasas refattas davo il fö dal 1869. Reconstrui hana be plü la mità dals edifizis desdrüts, laschond uschea spazi intuorn mincha chasa. Quellas han survgni ün tet planiv, e l'entrada da tablà tras la porta d'chasa es svanida, forse per evitar uschè plüchöntsch novs desasters da fö.

I para bod cha'l disegnadur haja vulgü divider oura quista part dal cumün in schmachond main ferm sün seis rispli.



Süls Munts d'Ardez (purtret in öli)

Paginas 140, 143 e 144: skizzas in rispli per ün purtret in öli

Die Lärche (Larix) XXI.



1. Standort: an Bergabhängen in grossen Beständen bis 3000 m. ü. M.
2. Blütezeit: April & Mai
3. Blütenstand: Zapfen (einkönig)
4. Blüten: eingeschlechtig. Stempelbl. dunkelrot Staubgefässbl. gelb.
5. Bestäubung:
6. Samen: geflügelt, wird v. Hinde ausgestreut
7. Blätter: Nadeln
8. Verwendung: Holz zum Bauen & Brennen. Harz - venet. Terpentin



Gemeiner Huflattich.


(*Tussilago Farfara*) XIX



A. Die blühende Pflanze B. Blätter C. Oberer Teil des Schaftes mit dem Blütenköbchen in natürl. Gr; a Röhren- b. Bandblüten, D. Band-, E. Röhrenblüte, vergrößert a. Fruchtknoten b. Federkrone c. Röhre der Blumenkrone E. d. Staubbeutelröhre D. Griffeläste F. Frucht mit der Federkrone - Bis zum Koch.

1. Standort: lehmiger Boden (Acker; Bach- & Wegränder.
2. Blütezeit: März, April
3. Blütenstand: Köbchen (einhäusig)
4. Staubgefäßblüten: in der Mitte des Köbchens je 5 Staubgefäße.
5. Stempelblüten: am Rande des Köbchens
6. Befruchtung durch Insekten
7. Samen: Federkrone (Ausbreitung durch den Wind.
8. Blätter erscheinen nach dem Verkühen (winterlich)

9. Stiel mit schuppenförmigen Blättern bedeckt.
10. Verwendung: gegen Husten & Heiserkeit, weil sehr schleimhaltig.



ELB




Vers Susch vezzaina las chasas da Surpunt üna attach a tschella. Ellas sun stattas schaniadas da l'incendi. La veglia punt da crap collia amo cun seis duos archs Sutröven cun las chasas da Plans. Dal 1921 ha'la fat piazza ad üna punt da lain. I mancan eir amo la viafier ed il stradun modern e las pacas chasas e stallas novas. P'ls ultims 75 ons il purtret dal cumün nu s'ha plü müdà fich ferm.

Our d'ün quadernet n'haja tschernü ün pêr skizzas cha meis baze-gner ha fat süls Munts dad Ardez. Quai ston esser stats per el lös predi-lets. Là vara'l chattà recreaziun e forza per sia lavur. In quels lös varà'l fat eir sias observaziuns vi da fluors e plantas ch'el ha lura disegná e descrit in möd minuzius. Quella lavur vara'l fat per as preparar sün sias uras da scoula.

Dal magister da quella vouta daja amo ün pêr scolars. Els tuots van uossa vers ils 90. Üna da sias scolaras s'algorda ch'el d'eira ün hom cun blera pazienza, ün chi vaiva jent a seis scolars.

◁ Lavin cun la punt da crap (disegn in rispli)





Chasper Buchli es gnü influenzà ferm da seis magister Hans Jenny, l'autur dal cudesch «Alte Bündner Bauweise und Volkskunst». In quels pacs ons chi til fütan amo concess davo il temp a la Scoula chantunala s'ha però sviluppà pro Buchli ün agen stil. Seis disegns e sias pittüras sun ün s'approsmar in pitschens pass als gronds misteris chi sun sün quist muond.

Mulins e rodas-mulin ella Cadi

Emprova da sclarir igl origin e destin dils indrezs cun roda d'aua

da Tobias Deflorin e Paul Tomaschett *

(emprema part)

1. In tema captivont

Lein menar anavos la roda dil temps per sis decennis. Igl ei ils anno 20 da nies tschentaner. In di da stad plein sulegl. La crotscha da posta descenda il Cuolm d'Ursera viers la Val Tujetsch. Ils passagiers admiran pezzas e vals. Tuttenina sepresenta Tschamut culs aults chischners dadens l'ucliva. Els spetgan la raccolta dils ers che undegian el vent. Tgei smarvegl!

Quei maletg singular ha impressiunau fermamein las regurdientschas da Tobias Deflorin: «Cu jeu erel in mattatsch hai jeu viu mez quels chischners, diesch en tut. Tgi che vul buca crer, miri fotografias da quei temps. Enteifer dus decennis han ils chischners da Tschamut anflau la via en pegna. Senza els semeglia l'ucliva ina gaglina splimada.»

Tgi che rauenta da chischners, patratga allas monas segal e dumiec messas a madirar. Ed ils lecturs ch'ei aunc cudischi cun ers da garnezi san era da graun e mulins e frina da paun.


«Mulins. Quei plaid resuna aunc savens en mias ureglias. Per nus buobs da Rueras eran mulins, resgias e falluns cundrezs tecnicos marveglius. Bia gadas havein nus astgau contemplar il trafficar dil muliner Giossi, mirar co el svidava il graun ella termososa e mulava e turnava a moler entochen che la frina empleneva la trucca. E nus eran plein marveglias pigl indrez da rodas e transmissiuns, per la tecnica da scalinar las molas-crap e l'inschignusa mecanica da sclauder. Ed il bien muliner perdeva mai la pazienza da rispunder a nossas damondas.»

* Tobias Deflorin († 1977) ha relaschau in interessant inventari dedicaus allas «Rodas mulin en la Cadi», ina lavur da 9 paginas inclusiv l'introducziun. Sias retschercas ein la basa dil present artechel. Dapli endriescha il lectur ella remarca finala.

2. Modas da moler duront mellis onns

Mulins cun bratsch



Dapi ch'ei crescha graun vegn la gronda part dalla raccolta manizzata, smaccada u pisada. Duront mellis onns ei quei succediu en moda fetg sempl: en ina buora da lenn dir cavada ora u sin ina platta crap concava. Ei vegneva mess ils garnetschs el murter u ella pella e pitgau ditg e liung sissu. La persuna incaricada cun quella lavur sesurveva d'in pisun, d'in mogn u d'ina zuola per far il fretg pli e pli manedels. Il pisar era ina lavur monotona e stentusa. Duront tschentaners han ils legiunaris romans manizzau sin quella moda il graun per lur diever. E suenter ha ella aunc ditg fatg buns survetschs. Duront la davosa uiara han ins apprezziau ella per far bren, giutta e panetscha.



Mola primitiva: crap concav e crap da smaccar. Maletg ord H. Gleisberg, Geschichte der Mühle, p. 111.

Murter e pisun da crap han mussau la via ad ina nova invenziun: quella dallas duas molas crap tschentadas ina sin l'otra. La plattasuten era greva e statteivla, l'otra pli leva e movibla. En quella han ins fatg ina ruosna, catschau lien in fest u in pal e fatg girar ella sin la plattasuten. Denteren vegneva il graun ruts, smaccaus u mulaus. Carstgauns ed animals han giu la missiun da muentar la mola horizontala entochen che l'aua ha cul temps supriu quei niebel pensum.

Las molas respectiv mulins cun bratscha han prestau buns survetschs el tenercasa neolitic e dil temps da bronz. La dunna da casa fageva girar in mulinet menond entuorn la clavella respectiv fest menziunau. Quei bastava per in diever mudest. Quei tip da mulin era enconuschents als Etruscs. La fumitgasa romana stueva luvrar in stendiu di ora e pudeva silpli moler frina per otg personas. Quei mulinet a maun ha preservau bia carstgauns dalla fom, cunzun en temps d'uiara e d'autras calamitads. Ton il museum retic a Cuera sco il museum dalla claustra da Mustér possedan mintgin in bi exemplar da quei mulin a maun muentaues cugl agid d'in moni da lenn.



Mola cun bratsch. Dessegn da Martin Zwimpfer.

Mola cun bratsch. Cun quel vegn la mola-su menada. Museum claustral, Mustér. Foto Paul Caminada, Thalwil.

Per dumignar molas pli pesontas duvra'ei las forzas unidas da sclavs, insumma da glied degradada. Ils pussents imperis dall'antica possedevan sclavs detgavunda. Lur lavur era buca fetg attractiva: far girar dis en e dis ora la mola-suren stargend il tuorn per in sughet mess en in latsch entuorn culiez. In trest capetel, quella veta dil sclav che stueva far frina per siu patrun e sez endirar fom.


La medema lavur fagevan era asens, cavals e bos, denton buca pli bienmarcau ch'ils sclavs. Igl animal, mess sut alla menadira da moler, pudeva girar en rudi ch'el vegneva matutins. Ell' Italia ed en autras tiaras ha quei sistem cuzzau entochen avon tschien onns. Ed el ei aunc oz buca svanius diltut.

Mulins d'aua

Digl origin dalla roda d'aua fatga per muentar in mulin san ins aunc buca tut. Tgei sistem ei il pli vegl? Ils specialists manegian ch'il moviment hidraulic hagi entschiet cun la roda horizontala, numnada pli tard savens roda bassa. Ils Chines, Grecs ed auters pievels antics han enconuschiu la roda horizontala, e quei el tierz secul avon Cristus, gie forsa aunc avon. Il mulin bass, vul dir la roda horizontala cun siu ischel vertical che meina il crap-suren, ei in indrez sempel, mo buca fetg productiv. Strabo, il geograf grec dil davos tschentaner avon Cristus, scriva che quei mulin cun roda da palas ademplat prestavi buca dapli ch'in asen, pia ina mesa forza cavagl.

Ils Romans han empriu bia da lur expediziuns egl Orient, era sil camp dalla mecanica, ina domena per la quala ils Grecs savevan nuota propi s'entusiasmar. Ils technichers romans han fastisau sigl intschess bizantin ed ell' Egipta las famusas maschinas per alzar l'aua ord la profunditad, per exempel ord in puoz, flum e lag. Quella tracziun mecanica era enconuschenta sil pli tard el siatavel tschentaner avon Cristus. Ina roduna muentada da carstgauns, d'animals u dil current dall'aua sez empleneva sias cellas che svidavan, arrivadas sil tgiembel, l'aua preziosa en in grond vischi. Da quel anora menavan liungas canals l'aua per dustar la seit a gliעד, biestga e planiras schigentadas.

Ils inschigniers romans han in bi di cumbinau las enconuschentas tecnicas orientalas ed inventau il mulin cun rod'aulta, numnada dall'entschatta enneu roda verticala. Vitruv, il renomau architect digl imperatur Augustus, descriva detg bein quei mulin da graun en sia ovra «De architectura»: Sigl arver horizontal che porta d'ina vart la roda d'aua, ei montada, parallelmein cun quella, ina secunda roda verticala, numnada roda d'empalms. Ses dents tschaffan en ina roda da fis che meina in arver vertical. Quei ischel fa girar il crap-su, la rudiala vitala dil mulin. Denter la mola fixa e la mola currenta vegn il graun mularaus.




Mulin d'aua roman, il mulin ault tenor Vitruv. Dessegn ord H. Gleisberg, Geschichte der Mühle, p. 123.

Il mulin ault ei staus in'invenziun da num. In gir dalla roda corrispunda a tshun turs dalla mola. Tut priu presta igl indrez treis forzas cavagl, quei fuss sis ga dapli che la roda bassa ni dudisch ga dapli ch'il mulin a maun. Il mulin roman era stgis da moler 1500 kilos graun en in di, lein dir en diesch uras. Ei duvrava silmeins 40 sclavs per far la medema lavur en quei temps. Igl ei buca da sesmarvegliar che Karl Marx ha numnau la rod'aulta romana «la fuorma primitiva da tutta maschinaria».

Mulins ell' Europa

Il niev mulin d'aua ei buca sederasaus schi spert sco ins pudess s'imaginar ei. E quei per pliras raschuns. Numerus uals e flums talians ein schetgs duront la stad. Egl imperi roman vivan milliuns sclavs che lavuran bienmarcau. Igl emprem acceptan ils habitonts dalla Gallia transalpina las novaziuns che vegnan da Ruma. Il sid dalla Frontscha enconuscha gia el secund tschentaner suenter Cristus in stabiliment cun 16 rodas aultas, bein il pli imposant implont ch'ei ha dau zacu.

Dil quart tschentaner ensi ei il diember da sclavs sesminuius fetg. El medem temps penetreschan ils mulins in detg toc viers il nord. Els s'igniveschan per exempel sillas rivas dil Rodan, era a Genevra. Entochen igl onn melli sederasan els bunamein en tuttas regions dil nord dallas alps. Cheu flessegian ils dutgs ed uals en abundonza. Las claustras dils benedictins e pli tard dils cisterciens eregian mulins conform alla regla da lur grond fundatur. Ed ils signurs seculars dil temps miez targlinan buca d'imitar igl exempel dils paders. Il proprietari dil flum e dallas rivas, pia il signur che posseda ils mieds necessaris, fa construir mulins che surveschan als basegns d'in circuit economic. Egl 11avel e 12avel tschentaner han tuttas cuntradas dalla Seine al Rodan e dil Rein al Danubi lur mulin d'aua, ch'ils documents numnan magari «edifeci», in plaid che lai sminar sia impurtonza. Nuota da far curvien ch'ins utilisescha la roda marvigliusa per pellas d'olivas, da puma, da coniv e glin. El 13avel e 14avel tschentaner sederasan novs indrezs: per mular e trer ils fols, per tenscher e resgiar. Ils nundumbreviels menaschis d'aua cun lur uors e dutgs, lur irals e canals dattan in niev aspect alla cuntrada. Els encuraschan mistregn e commerci, midan vias e mieds da transport.



Mulinet cun roda zanistrera, entuorn ils 1270. Ord M. Daumas, p. 464.

Ins sa perseguitar il svilup ellas differentas tiaras. La Frontscha duei haver mo ver diesch rodas hidraulicas el 6avel tschentaner, denton tschiens el 12avel e schizun mellis el 13avel. Ils cisterciens da Clairvaux possedan persuls ils 1120 / 1140 in miez tozzel cundrezs cun rodas d'aua. Per l'Engheltiara registrescha il famus «Domesday Book» da 1086 exactamein 5624 mulins. Ils economists han quintau ora ch'ei tuccava in stabiliment sin circa 50 casadas.

Mulins el Grischun


Pliras valladas grischunas – ni meglier detg, dall' anteriura Rezia – ein enconuschentas per lur interessantas culturas prehistoricas. El temps da bronz han agricultura e tratga da biestga giu fluriu buca mal. Dils emprems tschentaners da nossa era cristiana ensi sviluppeschan la Foppa e la Cadi ina admirabla maniera da cultivar ils ers. Il viver e luvrar, patertgar e plidar dils purs da gliez temps han impregnau nossa cultura entochen sil di dad oz. Il testament dils 765, fatgs digl uestg Tello da Cuera, conferma ina liunga tradiziun economica e menziunescha denter auter era garners (farinarij) respectiv mulins. Dat ei da quei temps aunc spirontamein mulins a maun, ton a Sargans, a Sagogn sco a Schlans? Il mulin d'aua conquista plaunsiu las valladas dil Rein, dil Lag Bodan ensi e suls pass alpins. Mo nua ei sia avanguardia egl 8avel u 9avel secul?

Igl urbari imperial dil 9avel tschentaner enumerescha in triep mulins sigl intschess dalla Rezia da Cuera. Ils indrezs da Flem, Pleif e Degen, Luven e Vuorz tonschan il pli datier dalla Cadi. Pil tschentaner suandont ein mulins documentai a Zir, Termin e Domat ed en auters loghens. Las claustras da Faveras e Mustér han mulins sin lur possessiuns; quellas ein denton caussas spatitschadas, aschia ch'igl ei buca pusseivel da concluder enzatgei valeivel pil svilup dils mulins ella Surselva. Digl 11avel tschentaner ensi crescha il diember da menaschis d'aua senza dubi. Mo ils documents zuppegian pacificamein suenter e relatan pér el 13avel tschentaner da divers mulins a Cuera ed a Sagogn.

S'entelli ch'ils mulins da quei temps havevan in detg bien num. Els eran edifecis buca mo nizeivels, mo biaronz indispensabels per viver e subsister. Lur svilup astgass interessar buca pauc il perscrutader dalla

veglia canzun da sontga Margriata. Tgi che interquera lien la davosa e pli gronda empermischun dalla diala al paster petschen, encorscha prest ch'il bi mulin che mola segal e salin ha da far nuot cun la prehistoria. Ei quei passadi da colorit propi aultmedieval buc in dils pli prezius curals dalla famosa canzun?

Ei vonza cheu ina damonda che po forse occupar il lectur dapi in'uriala. Tgei tip da mulins ha il temps miez promoviu? Abbazias flurentas, pussents signurs e marcaus progressivs fan ir lur mulins cun la rod'aulta zanistrera, la roda verticala che va anavos stuschada dall'aua che cuora suten. Cuminonzas pintgas e fleivlas tegnan cul mulin bass, pertgei sia roda ademplat ei semplia e habla da prestar quei ch'ei basegna pils habitonts d'ina scheina u d'ina ucliva. La rod'aulta, quella che gira cun la forza d'aua che vegn surengiu, ei enconuschenta; mo sia muntada crescha pér dil 14avel tschentaner ensi. Ei vegn il 18avel tschentaner avon ch'ella conquisti la Cadi. Quei endriescha il lectur en cuort.



Mulin cun rod'aulta, entuorn 1340. Ord M. Daumas, p. 464.

Mulins ellas planiras

Tgei mulins havevan ils habitonts dallas planiras, leu nua che las auas palandran plaunlur viers la mar? Mulins sin punts e sin navs e surtut mulins da vent. Las empremas construcziuns exponidas al vent pon haver lur origin egl Orient, avon varga 2000 onns. Ils Arabs trans-

mettan la tecnica als Engles e Hollandes. Las cruschadas promovon la derasaziun ella Frontscha ed ell'Engheltiara. El 17avel tschentaner contonschan ils mulins da vent lur triumf ella Hollandia.

Crappa per molas

Sco gia allegau s'annunzian certas midadas el 14avel tschentaner. Ina dallas pli impurtontas pertucca il mulin ault, il cundrez cun roda gronda. El 13avel tschentaner entscheivan miniers a scuvierer cavas. Ei reussescha ad els d'explotar crappuna da granit ni outra silmeins schi dira e dar ad ella la fuorma da molas-mulin. Quellas rudialas grossas e grevas han corrispundiu oreifer als basegns dil mulin grond che ha fitgau pei pli e pli dalla fin dil temps medieval ensi.

Ei fuss iertg da supponer che la Cadi, stada neu e neu detg reha en minas da metal e fuorns da cristallas, hagi buca giu cavas da molas, ton fixas sco girontas. Ils miniers da Medel e da Punteglias ein senza dubi stai stgis da cavar ora molas e da mussar quella lavur als indigens. Tgi che vul sefar in'idea da quell'explotaziun, po ir a mirar la veglia cava da craps-mulin situada en in englar greppus damaneivel dalla fuortga sil Munt S. Gieri dado Vuorz. Ella Cadi ha ei dau e dat granit detgavunda, e bien leutier, deno quel da Punteglias. Ins ha duvrau el gia daditg enneu: per plattas, petgas e paricarrs. Il granit da molas stueva esser stags e cumpacts, denton buca memia grops e senza aveinas da spat, per ch'el rumpi buc. Ils tagliacrappa scalpravan ora la fuorma giavischada, ina lavur che basignava bien egl e dabia temps. Transport e montascha pretendevan buca meins forza ed inschign. Igl ei schizun vegniu impurtau molas, malgrad ch'il bien granit muncava buca tier nus.

La renaschientscha fuola via alla tecnica moderna. Ils arts mecanics gaudan ina tscherca carschenta. Anno 1569 publichescha J. Besson siu interessantissim «Theatrum instrumentorum et machinarum». A. Ramelli sa buca ludar avunda la matematica sco basa da tuttas scienzas en «Le diverse et artificiose machine» (1588). Lur ovras reha mein illustradas che vegnan da Lyon e Paris cattan spert lecturs e translataders ell'entira Europa.

Il mulin grond ella Cadi

Plaun a plaun han las novaziuns era bess lur undas en nossas regions. A Mustér dat igl avat Bernhard Frank (1742–1763) al pader econom il camond d'ereger in mulin alla moderna, propi in grond e ferm. Il prenci-avat numnau era, sco siu secund successur Columban Sozzi e pader Giusep Fluri da Sumvitg, in um zun cudischius culs problems dalla fisica e dalla mecanica. El engascha plirs capavels mistergners dil Toggenburg e digl Appenzell (cheu deva ei da quei temps excellents muliners) che baghegian entuorn ils 1750 in mulin a Trun ed in a Mustér. Aschia ei il mulin grond, il schinumnau tip tudestg entraus ella Cadi. Ed il convent da Mustér cun sias finanzas sgurdinadas ei staus bi leds che la claustra da S. Gagl ha alla finala pagau ils mistergners, varga 77 flurins en tut.

Il niev mulin grond presta bia dapli ch'ils auters mulins da quei temps. Lezs eran – sco pader Placi Spescha raquenta – tuts mulinets bass, vul dir indrezs cun roda horizontala che pudevan silpli satisfar als basegns d'enzacontas famiglias, als habitonts d'in uclaun u ad ina pintga part d'in vitg. Il mulin ault ha tuttavia buca bandischau il mulin bass. Lez ha surviu vinavon a loghens pigns e da lur persei. Vitgs pli gronds ed umens iniziativs han imitau igl exempel dalla claustra. Els pon haver baghegiu beinenquel mulin grond, mo era resgias ed auters cundrezs cun rod' aulta. Quei ei succediu gia avon ils 1800 ed els emprems decennis dil 19avel tschentaner. Pader Placi Spescha scriva ils 1804 circa cun satisfacziun ch'ils mistergners indigens (scrinaris e ruders) hagien imitau il niev art. Ed el numna in Toni Cagienard da Trun, in Giusep Anton Berther da Mustér ed in Gion Antoni Beer da Tujetsch, meisters habels da construir ils novs indrezs schibein sco ils jasters. S'entelli ch'igl intent dils novs mulins corrispundeva diltuttafatg als projects economics da pader Placi. Anno 1802 ha el vuliu endrizzar a Rumein, nua ch'el fageva il beneficiat, in mulin cumpraus per bia daners a Luven. Mo ils vischins han buca honorau siu engaschi pil beinstar general, els han refusau l'installaziun.

Pader Placi Spescha ha persequitau plein marveglias il svilup dalla scienza e tecnica da siu temps. Igl emprem mulin a vapor endrizzaus anno 1784 sper la Tamisa a Londra porta buca mo ina tecnica rèschnova; el annunzia el medem temps ils mieds moderns da cumpra, transport e vendita. Mo pér la secunda mesadad dil davos tschentaner



Mulin Bearth da Fuorns, canals e rod' aulta. Carta postala Th. Locher, Dübendorf.

arva la via allas novaziuns che Leonardo da Vinci haveva per gronda part skizzau gia ils 1500: rodas e palas da fier, turbinas e motors.


3. Rodas d'aua, lur fuorma e funcziun

Aua survetscheivla

Il mulin viva dall'aua. L'aua da mulin decida nua ch'igl indrez sa vegnir baghegius e tgei ch'el po prestar. Tschentar il mulin datier dil flum furibund ei detg prigulus. Ei tucca da tener distanza. Consequen-tamein ston ins tschaffar l'aua in tschancun plinensi e menar neutier ella en in ual u dutg, il schinumnu pluschein. Ei il quantum d'aua memia strebels, dat ei nuot auter che retener ella cun in mir da fer-mada. Cun quei uor u rempar pon ins era contonscher la pendenza necessaria. El survescha dil reminent era da serenera, oravontut per retener gliet e glera. Il davos toc flessegia il dutg-mulin sin in iral ni enzacontas canals. Quellas surmuntan ina distanza da diesch meters u il dubel sche la topografia pretenda. Primarmein vegnevan ellas cava-das ora d'in bi lenn larisch u pégn. Cun catsch ferm e rapid sforza l'aua sin la roda-mulin e cuora suenter in turnighel spimont vinavon schi schubra e frestga sco avon. Tgei aua generusa, survetscheivla che muenta maschinas per ch'il carstgaun sappi sevestgir e senutrir!

Il sistem da rodas

Il capetel dus ha dau in tagl ord l'istoria dils mulins. Lur mecanis-sem exterior, specialmein il sistem da rodas ei semidaus ton sco nuot




(seniester) Roda d'aua aulta: effect da pressiun e peisa.

(dretg) Roda d'aua zanistrera cun palas radialas en fuorma d'erizun: effect dalla pressiun. Dessegn da Marc Meyer.

atras las epocas dall'era cristiana. Las rodas romanas e quellas dils mulins da tshels onns ein fetg semeglientas. Ei exista denton dapi varga 2000 onns dus tips ch'igl ei lev da distinguer: la fuorma horizontala e la fuorma verticala. L'emprema numnan ins en romontsch semplamein «roda bassa» (Stockrad). Tier il tip vertical decida il cuors dall'aua. Ins ha da far cun ina rod'aulta (oberschlächtiges Wasserrad) sche l'aua vegn da surengiu. Flessegia l'aua denton sutora, setracta ei d'ina roda zanistrera (unterschlächtiges Wasserrad). Els davos cass stat la roda d'aua sidretg, mo sia rotaziun ei differenta.

La roda bassa

La roda bassa, numnada beinsavens roda horizontala e tier nus era roda ademplat, ha in vegl origin. Ella ei neu e neu vegnida plazzada el mulin sez, el plaunterren sut il palancau che porta las molas. Quei ei atgnamein ina rodetta cun siu diameter da 70, 80 centimeters ni pauc




Roda bassa cun 10 palas dil mulin da Cavorgia. Museum sursilvan, Trun. Foto dil Museum retic, Cuera.

dapli ch'in meter. Sias 10, 12 u dapli spadas da ruver han savens la fuorma da pala ni magari da caz u tschadun. La roda horizontala ei adina montada sin in ischel vertical, numnaus arver u rudeischen. Quei impurtont purtader, da lenn larisch sche pusseivel, tonscha in pèr meters ensi, traversa l'emprema mola e fa ir la mola-suren. La roda bassa che vala per la precursura dalla turbina hidraulica, rotescha tut tenor il catsch dall'aua. Setta il current cun forza dalla vart neuaden, lu gira la roda, ed el medem temps cun ella igl arver e la mola-su che fuorman in esser.

Il sistem horizontal ei ina construcziun semplia, senza endentadira e transmissiuns. Perquei ha ei dau darar pannas e reparaturas. Mo la roda bassa ei plitost fleivla, ella lavura vess e plaun. Il lectur vegn a vesser per tgei diever ella ei secumprovada. En mintga cass ha la roda ademplat giugau ina gronda rolla el temps miez e gia avon sco aunc ditg suenter. Ina dallas pli veglias illustraziuns da quei sistem datescha denton pèr dils 1430. Aunc en nies tschentaner tecnisau ha ei dau nundumbreivels mulins bass: el Tessin e Valleis, Grischun e Tirol, Bosnia e Rumania, Portugal ed Irlanda ed en biaras outras tiaras denter il Caucasus e las Balearas.

La roda zanistrera

La roda zanistrera tschentada sidretg ei pli gronda e ferma che la roda bassa. Ella ei plinavon piazzada ordaviert parallelmein cul mulin respectiv culla preit silla vart digl ual. Ina fuorma fetg veglia e zun derasada savess ins numnar roda da gaveglia (Strauberrad). Sin ses bratschs en fuorma da crusch – sche igl ei minimum quater spadas – ei montaus in solid gavegl. La fatscha da quei tscherchel porta in tschupi da dudisch u schizun il dubel palas plattas destinadas da retscheiver il current d'aua. Cul temps han ins aschuntau ina spunda al gavegl e partiu igl entir funs dalla roda en in diember cellas u caums. L'aua sto esser cheu pulit abundonta ed haver in bien catsch leutier. Ella flessegia beincapiu sutora, stauscha las palas ni emplenescha ils caums ch'entscheivan a rotar anavos, pia el senn zanistrer. La roda messa sigl ault ei unida cun in arver horizontal che trasmetta la forza sin in ischel vertical. Quel camonda il davos la mola-su. Dapli detagls suonndan prest en connex cun la rod'aulta.



Mulin ault tenor Ramelli. O canal d'aua, E roda zanistrera, L roda d'empalms, I roda da fis, H mola-su.

La roda zanistrera, seigi ei lu la meglia u mendra execuziun, presta dapli che la roda horizontala. Mo ella sa buffar sco ella vul, ella contonscha silpli in nez da 35%. Ni detg cun auters plaid: Dall'aua che sburfla encunter las palas, ei mo ina tiarza propi rentabla.

La roda zanistrera, quella zun respectabla invenziun dils Romans, contonscha in'emprema fluriziun digl 8avel al 10avel tschentaner, sper flums, mo era sin navs e punts. Treis, quater tschentaners pli tard eis ella aunc adina en voga. Il pli instructiv maletg da quella tracziun sesanfla en ina fibla illustrada d'ina abbadessa dil 12avel secul. Pil 15avel tschentaner dat ei in tschuppel illustraziuns, schizun el Valleis e Grischun. Ina tabla ella veglia baselgia da Valeria a Sion representa ina semplera roda da gaveglia cun in mulin ed in muliner. Sin ina gronda pictura murala che ornescha la baselgia da S. Gada a Mustér stat denter auter in mulin cun ina roda da gaveglia da pressapauc 16 palas. Che quei maletg dils 1460 circa, cun siu mulin che semeglia fetg ina caplutta, tradescha il stil talian e buca la fuorma dil mulin sursilvan, vegn mintgin a capir. Tgi che s'avonza per in e dus decennis entaupa la roda da gaveglia sin pliras picturas da Hans Memling. Ed aunc ell'ovra che Ramelli dedichescha biabein 100 onns pli tard allas maschinas da siu temps dominescha la roda da gaveglia.

La rod' aulta

Cul svilup dalla tecnica dil 14avel e 15avel tschentaner gauda la roda che retscheiva l'aua da surengiu pli e pli gronda cuida. Il Luttrell Psalter dils 1340 cuntegn in dessegn che muossa in baghetg da cumparsa gotica, ina rod' aulta cun l'aua che croda en ses caums ed in dutg ualti lad cun rischas per pigliar ils peschs che sepiardan en quei revier. Igl emprem mulin ault dil territori alpin vegn menziunau per Zuoz, e quei en in document dils 1538. Cumparegliau cun la Cadi ei quei fetg baul. Lezza sto aunc spitgar varga 200 onns sin quella novaziun.

Il mulin ault ha neu e neu fatg impressiun al viandont e visitader e cul temps schizun giavinu neutier fotografs. Gia igl exterior dat spert en egl: las liungas canals-mulin, il sclusadur e la roduna. En nossas vals havevan las rodas in diameter da treis, quater meters, darar dapli. Ella Bassa enconuschevan ins autras grondezias. La roda gigantica da Wollerau – ella va puspei – mesira varga otg meters. Richterswil duei

haver giu ina roda d'in diameter da 11 meters, bein ina dallas pli grondas dall'entira Europa.

La rod'aulta ha cul temps survegniu differents numms ella Cadi. Gia quei fatg regorda a sia impurtonza d'antruras. Ins scheva roda gronda a Sumvitg, roda da cups a Dardin, roda da peisa a Disla ni simplamein roda dad aua u roda mulin. Quei davos num vegneva dil reminent era duvraus per las rodas fallun, da resgia e fravgia.

La gronda rod'aulta ei buca fatga pigl intern dil baghetg. Ella sto star dador il mulin, datier dalla preit secapescha. Sias duas spundas ensiaran in diember cellas, vul dir caums, cauls u cups. Quels pon tschaffar in pulit quantum aua, s'empleinan e sesbassan menond la roda, sesvidan e sesaulzan vits da l'otra vart. Cun la roda gira era siu arver che tonscha enzaconts meters viaden el baghetg. Leu rotescha ina secunda roda, la roda d'empalms. Quella ha in cularin da dents che tschaffan ella roda da fis montada sin in ischel vertical, numnaus tscheu e leu il fier grond. Quel penetrescha atras il plantschiu su che porta las molas, siara el triaghel dil crap-sura e fa girar quel sin la mola-suten.

Cumparegliu cun la roda zanistrera ha la rod'aulta in grond avantatg. Siu effect deriva buca mo dalla pressiu, mo biaronz dalla peisa che sforza ils caums engiu. Consequentamein drova ella buca tanien aua e presta tuttina varga il dubel dalla roda zanistrera. Siu grad d'efficacitad munta a rodund 75%. Quei ei in'indicaziun che freda da productivitat moderna.

4. Mulins che molan segal, dumiec e salin

Baghetg e dretg

Ord spir entusiassem per las rodas rescun ins bunamein d'emblidar il mulin. Tgei cumparsa haveva il baghetg da moler da tschels onns? Igl ei in baghetg sempel che semeglia fetg las tegias da cuolm, denton buca quellas ch'ei daventadas casettas da vacanzas. Habitava il muliner cun sia famiglia sut il medem tetg, era la casa secapescha empau pli gronda ni haveva in baghetg annex. Tschentaus sin mirs schetgs, encunter munt directamein silla tiara, era ei ina mudesta construcziun da lenn cun silpli dus locals e dus barcuns e sissu in tetg da slondas



Fallun cun roda zanistrera e mulin (sur via) ella Val Cuschina a Dardin. Dessegn cun rispli da J.R. Rahn, uost 1903. Maletg dil Museum retic, Cuera.

encarpau. Era igl intern ston ins s'imaginar primitivs, dotaus d'utensils e vischala fatgs da scrinaris, ruders e fravis: tgiradurs e curters, brentas e brocs, curtaunas, minals, bineras ed auter. Bia lenna consumavan las canals cavadas ord bialas plontas pégn. Ei deva fraudaders che eran buca maufers. Perquei ha per exempel la vischnaunca da Medel stuiu scumandar el 18avel e 19avel tschentaner repetidamein da pinar canals-mulin ellas schetgas.

Il mulin ha mai fatg parada sper cadruvi e via lada. El steva da siu persei, agl ur d'in quartier habitau u in pulit tschancun ordeifer. Las rivas dils flums laterals han la preferenza. Sper il Rein stevan mo quels da Selva e da Surrein ella vischnaunca da Sumvitg. In sco l'auter ha giu da sbatter cun lavinas u auas grondas. Mirond las fotografias dils vegls mulins e falluns pon ins dir ch'els mavan detg bein a prau cun lur ambient.

Tgi che baghegia e manischescha in mulin, sto observar certs uordens. Leschas fetg veglias han rugalau la veta economica dall'Europa, cumpriu las valladas reticas. La Lex Visigotorum dil 7avel secul relevescha ch'il mulin ei possess dil vischinadi. Ni detg autramein: Ils vischins ein conproprietaris dil mulin. Tenor la Lex Bajuvariorum dil tschentaner suandont duei il mulin guder in schurmetg tut special. Tgi che dat fiug ad in mulin, paga treis ga quei ch'el vala e stat siat ga buns per siu mobiliar.

Tgi che fa ir in mulin ni baghegia in niev sto setener vid las prescripziuns dil vischinadi. Quei illustrescha igl uorden ch'il vitg da Breil ha fatg anno 1780 per sia resgia. Tenor quel sto il possessur dalla resgia mantener $\frac{3}{4}$ digl iral, il vischinadi denton mo $\frac{1}{4}$. In impurtont paragraf circumscriva il diever dall'aua: Igl emprem dretg han ils mulins existents ed ils suloms (resp. fiugs), la resgia da vischinadi il secund. Tgi che baghegia ulteriurs mulins sin terren niev astga buca far donn d'aua als menaschis vegls. Quei tuna bunamein plaid per plaid sco in artechel dalla Lex Salica dil 7avel/8avel secul.


Nos uals menavan pli baul en general aua avunda, abstrahau temps da schitgiras. Allora deva ei buca darar tensiuns e dispetas, seigi pervia dall'aua da schuar ils praus ed orts ni pervia dil provediment dils buntadés. Differenzas pli grondas selain constatar per Trun, Rabiús e Segnas.

Mulins bass – mulins da dretgs

Ils mulins bass, numnai aschia pervia da lur roda d'aua bassa respectiv horizontala, han satisfatg duront tschentanners als basegns da nies pievel muntagnard. Quei tip da mulin dalla pareta d'ina fetg semplia tegietta ha pudiu dar damogn cul moler entochen l'arrivada dil mulin grond el 18avel tschentaner. Il baghetg dil temps medieval era probabel da mir, sco quei ch'il Mulin Crap da Rabiun, il pli vegl representant da quei gener el Grischn, lai supponer. Il mulin bass (Stockmühle) duei vegnir dalla Frontscha, ni silmeins dil Valleis. Influenzas lumbardas ein secapescha buca sclaussas. Ils Vallesans han enconuschiu baul e derasau fetg il mulin pign en lur vals. Entuorn ils 1300 ein libers Gualsers immigrai sur la Furca ed il Crispalt en Surselva. Negin dubeta ch'els havevien en lur miez umens cudischi cun mistregn e tecnica.

Avon tschentanners vivevan ils habitonts dalla Cadi spatitschai en enzacons vitgs e nundumbrevilas uclivas. Las biaras ein daditg svandadas. Mo paucs loghens havevan in'andanta via da comunicaziun. Mintga pur produceva sez il bia da quei ch'el duvrava per sia casada, oravontut il graun. Ver tschien mulinets bass – per temps zatgei dameins u dapli – fagevan la frina. Ils vitgs eran beincapiu bia pli pigns che ozildi. Sin quater, tschun entochen diesch famiglias che eran parentadas u vivevan ella medema scheina, tuccava ei in mulin. Ils vischins da Sumvitg possedeavan per exempel enzacons mulinets o la Val Mulinaun. Ins savess numnar els mulins da famiglias (Sippenmühlen), mulins da vischins, mulins da possessurs ni simplamein mulins da dretgs.

Il pli ditg ha il mulin bass stuiu e pudiu subsiter els «hofs» ed uclauns. Cheu ha el provediu ina entochen duas famiglias sco tipic mulin da casa, a Campieschas e Siltginas per exempel. In mulinet tunscheva era per in'ucliva d'enzacons fiugs dapli. Ins patratgi cheu a S. Benedetg e Clavadi. Loghens empau pli populai, uniforms u dividi en pliras parts havevan silmeins dus e treis mulins. Cheu vegn endamen Dardin e Darvella, Laus e Disla, Fuorns e Cavorgia, Mulinatsch e Selva. S'entelli che quels ed auters uclauns e vitgets han buca tuts manteniu lur mulin cun roda bassa entochen alla sava da nies tschentaner. Anno 1925 haveva la Cadi mo aunc treis, quater mulins cun roda bassa en stan cumplet.



Mulin bass tenor Ramelli. A canal d'aua, M roda bassa, G mola-suren, I termos, O truca da frina.

En in mund nua ch'ei existeva mo trutgs e schampras sendas havevan ils mulins bass ina muntada maisudida. Cheu fageva mintga cumproprietari siu agen muliner, mulava en roda tenor ils dretgs respectiv dis che tuccavan ad el in meins ora. El saveva era vender u comprar dretgs tenor giavisch e basegns. La cuminonza dils possessurs era responsabla pil baghetg e siu manteniment, fageva las reparaturas necessarias en lavur cumina.

Il mulin bass ei staus tier nus el temps medieval ed aunc ditg suenter la marvigliusa maschina da moler graun. Entochen el 18avel tschentaner eis el staus igl indrez unic e senza negina concorrenza. El valeva per in scazi prezius, bia pli custeivels che las meglieras nuorsas e las vaccas miserieras. Buca per nuot dat la venerabla canzun da sontga Margriata la plema al mulin. La fascinonta diala-zezna sa pertgei ella empermetta la fin finala al paster petschen «in bi mulin che mola il di segal e la notg salin senza mai metter si buc in». Quei bischu d'in mulin ei nuot auter ch'il mulin bass, quei indrez ch'ei stgis da moler di e notg. Il paster pign, in mattatsch carschius si en in uclaun u en ina scheina d'in vitget, sa ch'in tal mulin magic munta vivonda per veta duronta. Mo el resta stinaus refusond l'empermischun generusa dalla diala.

Mulins aults – mulins communal

Sco gia descret alla liunga han dus treis models da roda d'aua aulta catschau plaun a plaun il mulin bass ellas stretgas. Ella Cadi ha quell'attacca priu si' entschatta pér el 18avel tschentaner, cun la premiera dalla claustra a Trun ed a Mustér. Glied beinstonta e vitgs en plein svilup han eregiu mulins gronds viers ils 1800 e suenter; e la moda ha tratg sco ozildi. El mulin communal respectiv da vischinadi manischescha in muliner da professiun, fittader u sez possessur dil baghetg. El e savens era sia consorta molan per ina roscha clients dil vitg e dallas fracziuns vischinontas. Il muliner, seigi el lu possessur ni migiur, ei responsabels pigl entir indrez, pil dutg-mulin e sia levada entochen alla buna funcziun da molas e bigiat. Siu mulin ei publics, accessibels a scadin pur che porta il graun, paga la multira e retila la frina.

Enteifer il 19avel tschentaner ei il diember dils mulins aults carschius, oravontut els centers sco gia descret, ferton che la periferia ei aunc ditg stada fideivla als mulins bass. Ei esisteva pia ussa mulins da dretgs e mulins communal, in sistem cumparegliabels allas alps da dretgs e da vischnaunca. L'ironia dil destin ha denton vuliu ch'il mulin grond ei arrivaus pér el mument che la cultura da garnezi haveva gia entschiet a tschessar. Mo el ei sederasaus pli e pli essend rentabels e grazia alla reit dallas vias novas che han surtratg la Sut- e Sursassiala dapi ils 1840/50. Mintgin po cumprender che quei progress ha discreditau ils mulins pigns.

Ers e graun

Avon tschentaners eran ils ers da garnezi dalla Surselva bia pli impurtonts e numerus che ozildi. Senza graun havess ei tuccau d'endar fom. Ils avdonts dalla Cadi han neu e neu cultivau bein lur funs e cunzun lur ers da segal, dumiec e salin. La cultura da garnezi tunscheva entochen siaden ellas pli aultsituadas culegnas. Entuorn ils 1740 – aschia scrivan il pader Maurus Venzin ed il predicant Nicolin Sererhard – produceva la Cadi graun en abundonza, ils buns onns schizun dapli che per igl agen diever. Ei carscheva segal, salin, pliras sorts dumiec (pestel, tredi) e la resistent mistira. Il segal taniv arrivava tochen Mustér, la salin gartegiava schizun sillas spundas suleglivas da Tujetsch e Medel. A Breil e Sumvitg purtava la salin buna raccolta, en special la salin d'atun, la schinumnada carnun.

Ei ha secapescha era dau onns nua che la producziun stgisava buca per cuvierer igl agen provediment. Ins segidava purtond graun da Sursassiala als vischins da Medel e Tujetsch. El mender cass deva ei nuot auter che cumprar garnezi ella Lombardia u ella Suevia. El 17avel e 18avel tschentaner han las Treis Ligias beinduras stuiu retrer graun dallas tiaras vischinontas. Mo muort la situaziun geografica e las miserablas vias era quei import unius cun grondas difficultads.

Onns da raccoltas fallidas, epidemias e carischias tuccava ei da viver fetg mudestamein. E tuttina! Il bia ha la Cadi nutriu sezza ses 5000–6000 habitonts – quei ei la populaziun ch'ella ha giu el 18avel ed aunc all'entschatta dil 19avel. Ils truffels ein entrai ils 1760/70 en Surselva, mo sederasai per propi pér suenter igl onn dalla fom 1816/17.



Vegl fallun da Fuorns cun roda zanistrera, canals alla moda veglia e pala da sclauder. Fotografia da Meisser 1910. Negativ tier Tgira da monuments, Cuera.

La massera metteva mintgadi sin meisa latg e purment per affons e carschi. Avon 150 onns aunc, e s'entelli ditg avon, caschava bunamein mintga pur per sesez, priu ora la stad secapescha. Viaden egl unviern e surtut la primavera caschavan plirs vischins en roda e brattavan ora in a l'auter scharun, scotga e tschagrun. La mesada apprezzava la sera quels products da latg ord priel e scutger. Ei deva la damaun ni pischada ni tuargia sil paun, era buca caffè e marena, dano ils dis d'arar, da fenar e da scuder.

Frinas per bùglias, pastas e paun

Las differentas sorts graun bein tarschinaus e conservaus els arcuns u garners deva treis qualitads frina per cuschinar e far paun: frina biala resp. féffa, frina grossa e frina nera. Il resultat dependa zun fetg da mintga garnin e garnetsch, mo era digl inschign dil muliner e dalla buna lavur dallas molas. Il spazi regulabel denter la mola-sut e la mola-su ei decisivs per la qualitad dalla muliziun.

La biala frina segal e salin – secund il diever vegneva ella barsada – surveva per far brodas spessas e suppas da frina, fermentins e bugliar-sas. Suppas da giutta, magari la famosa giutta castrada, buglias cun pestel, pul en latg, buglias da panetscha e d’aveina eran tratgas frequentas. Pader Placi Spescha recamonda entuorn ils 1800 quella vivonda a giuven e vegl. Ed allura las raubas da pasta, daventadas per gronda part specialitads da nui: scadialas maluns cun latg bugliu, spitg e bulzani, padellas flutgets e tagliarins, amplius e bizochels da casa. La frina grossa e nera surveva oreifer per far il savurus paun-casa, ferton che la casarina reservava la féffa per coccas e veschlas, pettas e tustgets. Tut priu duvravan ins probabel circa duas tiarzas dalla frina per brodas e spisas da pasta e mo ina tiarza sco frina da paun.

Retschercas profundas muossan, sin basa dalla raccolta media dils onns 1702–1711, che nossa gliעד steva buca mal puncto graun e frina. La suandonta calculaziun vala per la vischnaunca da Sumvitg. Quella raccoltava intragliauter 1509 stera salin, 2905 stera segal e 1544 stera dumiec. In ster deva quater curtaunas. Calculau plitost bass pesava la salin 5½ kg, il segal 5 kg ed il dumiec 4½ kg per curtauna. Quei fagess 33 198 kg salin, 58 100 kg segal e 27 792 kg dumiec, pia total 119 090 kg graun. Veramein ina biala raccolta, quella media d’ina roscha tschec buns onns!

Con graun e frina respectiv pastas e paun ha ei tuccau intragliauter per persuna? Ins sto deducir il graun da sem, il quantum reservaus per far giutta ed auter. Ei pudess vanzar 90 000 kg, pia 80 kg per persuna ad onn; quei fagess rodund 220 gr graun per di. Ei tuccass aschia mintgadi 180–200 gr frina per in del, pertgei ei vegneva mulau ora entochen 95% e dapli, deno la frina biala secapescha. Sch’ins metta duas tiarzas dalla frina per cuschinar, resta ei aunc adina circa 65 gr frina da paun. Considerond ch’ei drova biabein 1200 gr pasta (ferm 700 gr frina plus 70% aua plus levon e sal) per far 1 kg paun (l’evapuraziun el fuorn munta 20%) ei il quen prest fatgs. 65 gr frina dattan 90 gr paun, ina raziun quotidiana dètg aulta cumparegliau cun autras cuntradas da nossa tiara. S’entelli che quei schazetg dependa fetg dalla proporziun raubas da pasta e paun. – Ins savess far circa il medem quen per l’ucliva da Laus che ha raccoltau anno 1702 exactamein 2000 curtaunas graun, vul dir 90 stera salin, 280 stera segal e 130 stera dumiec. Cons habitonts dumbrava Laus quei bien onn da raccolta?

Ils confederai d'avon 200 onns magliavan 50 entochen 90 gr paun a di, els buns onns in tec dapli, els schliats denter 30 e 40 gr. En nos temps consumescha mintga Svizzer intragliauter 60–70 gr paun per di ed aunc inagada ton biscutins, biscotgs e patissarias. Ins savess ussa, risguardond precautamein las differentas cundiziuns da viver, cumparegliar il consum da paun dad oz e d'antruras.

Il mulin, in liug da sentupada

Tgi ch'enconuscha il graun e suonda bein sia via al paun, capescha ch'il mulin ha giugau ina rolla impurtantissima ella veta da nos perdavons. El ei denton buca staus in liug fatgs mo per consignar la mulizun e retrer enzacons dis pli tard frina e crestgas. El mulin communal fagevan ils clients beinbugen in paus per paterlar ed endriescher las pli frestgas novitads. Cheu vegneva fatg politica locala sco oz tiel coif-



Rueras entuorn ils 1840 (buca Sedrun sco il maletg ei numnaus per sbagli!). Seniester il mulin cun roda zanistrera, sut via la resgia. Litografia da Chapuy e Jacottet. Fotografia dil Museum retic, Cuera.

feur, sin cadruvi ed ell' uustria. La tecca dalla glied e la truscha dil muliner u mulinera han dau a quei baghetg sper l'aua ina temprà ch'igl ei buca pusseivel da far reviver pli.

Il mulin solitari agl ur d'in ual ramuront ha buca mo destadau l'imaginaziun da picturs e poets, mobein era cudizzau d'inventar e propagar historias da snuezi. Ei constat che certs mulins dil temps medieval e da suenter han buca gudiu il meglier renum. Po dar ch'enqualin ei daventaus in refugi da glied dubiusa, ina casa d'aventuras e barlot. Nuota da far curvien che quella vart empau obscura ha dau num e natira al «Moulin Rouge». Igl ei capeivel che nos vegls mulinets bass, ils schinumnai mulins da dretgs u da casa han buca priu il vial d'in svilup semegliont. Perencunter ha ei dau fiastas e sulazs els mulins comunals. Quei vegn il lectur ad endriescher egl inventari che suonda el capetel sis.

5. Falluns ed auters cundrezs muentai da rodas d'aua

In triep mulins varionts

Dapi il 10avel/11avel tschentaner ensi survegnan ils mulins plaun a plaun la cumpignia da variontas industriettas mecanicas. El 13avel e 14avel tschentaner sederasan quels admirabels indrezs sur l'entira Europa. Il pievel mantegn e drova aunc ditg il plaid mulin, el senn digl engles «mill», per tuttas mudestas fabricas messas en moviment cun forza d'aua. Ins baghegia mulins per fullar glin e coniv (molendinum follonarium), per resgiar e trer ils fols. Ei dat mulins che battan il fier, che fan pupi e gervosa, che manezzan scorsas e minerals, mo che san era mular e pulir, scarsinar e tenscher. Era ils mulins sursilvans han promoviu novs menaschis. Trin haveva per exempel, tenor ina scartira da 1486, dus mulins, duas resgias e dus falluns.

Falluns da glin e coniv


Ils Franzos, adina stai aviarts per tuttas novaziuns, enconuschan il fallun sil pli tard egl 11avel secul. Da quei temps dateschan silmeins ils

emprens documents. Igl ei nunpusseivel da fastisar igl origin dil fallun en Surselva. Duront biars tschentaners han purs e puras tarschinau lur glin e coniv a maun. Cul temps han ins introduciu il fallun, savens era numnaus «la pella», in cundrez per pitgar la résta da glin e coniv, per smaccar il semglin e per far ora giutta. Quel dependa semplamein d'ina roda d'aua verticala montada sin in arver che ha d'alzar in u plirs pisuns. Igl ei bein enconuscent che quei tip da roda ei stregamein unius cul famus mulin ault innovaus entuorn ils 1750 ella Cadi. Quei impurtont eveniment sclauda tuttavia buc in diever anteriur dalla roda verticala pil fallun, in indrez sempel e primitiv che basegna ni la roda d'empalms ni il sistem da transmissiun dil mulin grond.

Il fallun steva el mulin, a pèr cun quel u secattava tut persuls en in casetg empau d'ina vart. Egl empren cass setracta ei d'ina pella communal, supponiu ch'il mulin seigi publics. Per duvrar ella paga mintga utilisader ina taxa en naturalias. Sin 50 brauncas glin debitava il fullader circa quater brauncas fulladira. Steva il fallun da siu persei, lu havevan leu entochen diesch, dudisch proprietaris il dretg da fullar. Mo lur lavur seconcentrava sin in pèr meins; ella era buca repartida sigl entir onn sco quei era il cass tiel mulin bass.

Avon biabein 60 onns, di pader Karl Hager en siu interessant studi da 1919, possedevan ton sco tuttas vischnauncas dalla Cadi aunc dus entochen treis pellas e torchels per fullar e far ieli semglin. El 19avel tschentaner eran ils indrezs aunc pli numerus. Ella Val Tujetsch gartegiava il glin tut aparti bein, leu ei quella cultura era semantenida il pli ditg.

Sco gia detg eran las pellas da coniv e glin in indrez hidraulic. Il solid arver u rudeischen horizontal era munius da dents respectiv empalms. Rotava igl ischel, tschaffava in da ses dents mintgamai en in empalm dils pisuns, alzava quels e schava curdar els cun forza sils zugls tèglia-glin bein sechentai e rasai ora sin ina solida platta da granit. Ina batteria da dus, treis u quater pisuns, tscheu e leu schevan ins pitguns a quellas petgas da ruver da circa dus meters lunghezia, battevan el tact ils faschets glin entochen ch'els daventavan lonzis e loms. Ils pisuns cun lur mogns sco tscheps da lenna fagevan ina hazra canera e gronda purlanza. Fullar glin stond dis ora en schanuglias ell'aria currenta era ina lavur stentusa che ha nuschiu alla sanadad da beinenqual femna.



Fallun da glin e semglin a Sedrun cuort avon la secunda uiara. Foto Furter, Tavau.

Empau pli tard vegneva il semglin en tur. Era quel stueva sut ils pisuns, ella cava d'in crap da granit ni en in begl massiv. Pitguns dulai ein péz splattergnavan il sem svidaus en quellas pellas entochen ch'ei deva frina. Quei era l'entschatta dil schinumnu far o ieli semglin, ina fadigiusa lavur che vegneva beinsavens encoronada cun in pushegn da ventschidas che reuneva mats e mattauns en legra cumpignia.

La roda d'aua fageva era ir il fallun che surveva da pisar mistira, salin ed oravontut dumiec: il famus fallun da giutta. Ils pisuns, cun in pei magari armaus da guottas, smuttavan il dumiec mess en in begl entochen che la caultscha sedistaccava dils garnetschs. Far ora giutta era la premissa per la famosa suppa restada entochen oz ina tratga populara grischuna.

Resgias e fravgias

Resgias a maun han existiu gia millennis avon Cristus. Mo pér la forza d'aua ha lubiu da far il pass alla resgia mecanica. La Gallia duei haver enconuschiu quei art avon 1600 onns circa. Scartiras dil 12avel secul plaidan dall'existenza dalla resgia hidraulica en Frontscha. Beingleiti ei la maschina da far aissas seperfectiunada cun in patent indrez per avanzar il lenn. Che la Surselva possedeve resgias avon varga 500 onns cumprova in document da 1464 per Valendau. Ils 1750 biabein ha la claustra da Mustér buca mo eregiu siu mulin grond, mobein era ina resgia moderna sillas rivas dil Rein d'Acletta a Gonda. Quei exempel po haver encuraschau il vischinadi da Breil e probabel era auters loghens. Il 19avel tschentaner ha augmentau fetg il diember dallas resgias hidraulicas, era els uclauns e buca memia dalunsch da mises ed alps. Quei demuossan ils indrezs dalla Val Sumvitg. Dapli san ins leger egl inventari.

La China ha introduciu bien e baul la roda d'aua per trer il fol d'ina fravgia. Ell'Europa sesviluppescha quei art el 10avel secul e forsa aunc pli baul. Documents dil 12avel tschentaner relatan da fravgias el Vnuost ed ed a Morbegn ella Valtlina. Prest muenta la roda d'aua ina lievgia e ses bratschs respectiv empalms aulzan il marti grond per batter fier. L'innovaziun ei documentada per 1320. In bi dessegn ord il manuscret «De machinis» (1449) digl inschignier talian Mariano di Jacopo representa ina rod'aulta cun in arver che tila ils fols da fravi.

Fravgias ha ei segir dau bien e baul en Surselva, mo igl ei buca pusseivel da dir enzatgei pli detagliu da cumbinaziuns cun roda d'aua anteriuras al 19avel tschentaner.

Cuntscharias ed auters indrezs

La cuntscharia u respectivamein cuntscha ei in'industria che mida las pials d'animals en curom. Quel era pli baul la materia prima per calgers e terschers, bransiners ed auters mistergners. Avon il triumf dalla chemia applicava il «gerber», sco ins scheva il bia tier nus, ina cuntscha da substanzas naturalas per luvrar ora las pials brutas e contonscher in bien curom. Pil pli duvravan ins scorsas ruver manizzadas ualti fin per far il schinumnu tanin. Duront varga in tschentaner han ils enconuschents falluns u pellas maniclau e pisau las scorsas indispensablas pil bogn da tanin. En quella cuntscha messa en bigneras schevan ins trer ils tgirs duront meins.



Fallun da scorsas cun rod'aulta a Surein-Reits. Foto Meisser 1917. Tgira da monuments, Cuera.



Pella per manizzar minerals ellas minieras dalla Lorena. Dessegn dil 16avel tschentaner ell'ovra da Georg Agricola. Las ferrarezias grischunas pon haver giu semegliants indrezs cun rod' aulta.

L'emprema menziun d'ina cuntsharia cun pella vegn dalla Frontscha, en ina pergameina digl onn 1138. Tier nus ella Cadi han ils purs fatg duront tschentaners sezs il curom ch'els duvravan, aunc in pulit toc viaden el 19avel tschentaner, e quei cun modas fetg primitivas. Mo ei deva segir gia avon tscheu e leu glied pli cudischida culs misteris da pials e curom. Dils vegls cuntshapials da Danis, Breil, Surrein e Mustér san ins pauc. Ina notizia dil fravi e vitturin Gion Fidel Caduff da Rueras paleisa ch'el hagi menau anno 1858 tgirs da Tujetsch ella «gerba» da Danis e ch'il clients tuatschins hagian pagau il «gierber» en naturalias, en quei cass cun seiv, pia cun grass da lur biestga. Mo la pli renomada cuntsharia dalla Cadi fuss d'encurir a Tavanasa, in'interpresa che ha gudiu duront decennis in bien num lunsch entuorn. Detagls suondan, era per enzacons indrezs presentai cheu sut.

La miraculosa roda d'aua ha surviu, principalmein in pèr decennis avon e suenter ils 1900, enzacons menaschis stai d'impurtonza per l'economia da nossa val: las cascharias da vischinadi – pil pli creaziuns dil 19avel tschentaner –, allura las scarsinarias e tenscharias. Per trer la panaglia da cascharias, seigi a casa ni ad alp, bastavan rodettas, ferton che tenscharias e scrinarias duvravan rodas pli robustas. Ins astga buc emblidar il fallun respectiv mulin dad ossa che fageva frina per biestga, salvanoris ed auter diever. Ei ha era dau avon onns indrezs hydraulics per mular cuntials e far guottas, per pulir uaffens, armas e juvels. Quellas industrias eran surtut reservadas als marcaus.

Tgei rolla ha la roda d'aua giugau ell'exploraziun da metals? En sia ovra «De re metallica» (1556), destinada per far enconuscent ils scazis sutterrans, descriva Georg Agricola denter auter ina roda d'aua d'in diameter da bunamein 11 meters. Igl ei quei la rod'aulta che predominava ellas fondarias, quei gia dil 14avel tschentaner ensi.

Medel e Trun han giu minieras. Lur historia tonscha tschentaners anavos. Tgei installaziuns han ils miniers d'antruras baghegiu e duvrau per midar ils minerals en fier u argien criu? Quei capetel schai aunc fetg el stgir. A Trun nua che l'exploraziun ha cuzzau il pli ditg, san ins ton sco nuot dils indrezs e dalla tecnica da produenziun. Mo ins astga supponer che las ferrarezias da Punteglias possedevan rodas d'aua per trer ils fols dils fuorns da lur fondarias sco quei era il cass el 19avel tschentaner ad Andeer.

(Cuntuaziun suonda)

Cochenille/Cosnillia

Giunta a l'artichel «Il cudesch da Johann Jenny a Wilna»,
Annalas 94, 124

Sün pagina 127 vain numno suot «c) Pleds na eruieus...» eir «cosnillia 305, cosnele 319». Tres Dolf Kaiser, Turich, gnit eau rendieu attent sün ün artichel illa Neue Zürcher Zeitung Nr. 137 dal 17.6.81 «Aus Lapislazuli, Mangoblättern und Schildläusen».

Lo legiainsa: «Per fer carmin as partiva da pluogls sechantos e pulverisos dal gener Cochenille [tar Jenny cosnillia 305, cosnele 319]; per ün unic kil as druvaiva 140 000 bes-chas [femninas]. Daspö pü cu ün tschientiner vain la culur fatta sün via sintetica, ma que es tuot amüsant d'udir cha'l pluogl vain auncha hoz druvo per der culur a mangiativas ed artichels cosmetics, a bellet, Campari e salam.»

Ill' America Centrela e'ls pajais mediterrans dal vest vain quist pluogl (Coccus cacti L.) trat daspö la media eted sün ün cactus (Opuntia coccinellifera).

Johann Jenny il druvaiva natürelmaing eir per culurir sieu «Campari», sias differentas bavrandas.

G.P. Ganzoni